

757-1
THOMÆ BARTHOLINI
DE
INSOLITIS

Partus Humani

VIII

Dissertatio Nova.



Accedunt Cl. V.

JOHANNIS VESLINGI

ibid. J. Barthele-Eqvitis Leod. & Biaz.

De Pullitie Ægyptiorum

& aliæ ejusdem

Observationes Anatomice

&

Epistolæ Medicæ

posthumæ.

HAFNIE,

Typis MATTHIÆ GODICCHENII,

Sumptibus PETRI HANBOLD.

CLC LCC LXIV.

ex lib. Jo. Alph. Brone





Illustriissimo Viri

DN. ERICO RO-
SENCRANTZIO,

Toparchæ in Rosenholm &c.

Magno suo Fautori & Amico.

S. P. D.

TH. BARTHOLINUS.

I*Nfensam mihi consci-
entiam haberem, nisi
publico aliquo documento
Tibi mea officia deferrem
antequam vel plura scri-
bendi fatalis temporum in-
feli-*

DEDICATIO.

*felicitas vel mors tacitè per
præcordia serpens viventi
pausam imperet. Quan-
quam enim eâ constantia ge-
nerosum pectus animave-
ris, ut sine vel nostris vel a-
liorum laudibus, quas etiam
à tacentibus mereris, com-
modè ad gloriam tuam &
ex voto vivas; iniquum ta-
men foret ignorari nobilis-
simas virtutes tuas à poste-
ritate, cui alii operoso stu-
dio, licet haud passibus æ-
quis, se commendant. Ut*

DEDICATIO.

taceam splendidos natales
 & longam nobilium atavo-
 rum seriem, quam inter mi-
 nima reputas, propria vir-
 tus & sapientia Te magnis
 domi forisq; rebus dudum
 destinavit. Monstrasti pri-
 dem patriæ, quantum humeri
 valerent tui, in primis cū a-
 pud Rempublicam Britanni-
 cam difficilimis temporib9
 inter aliorum minas & astu-
 tiam, pro Majestate Augu-
 stissimi Regis Tui, ejusq; in-
 violata innocentia intrepide sta-

DEDICATIO.

dè stares, & patriæ securita-
tem procurares. Scilicet fa-
cile est tranquillo mari, eti-
am inexpertis, vela ad nu-
tum flectere; sed turbidam
cœli tempestatem declinare,
id demum spectatam experti
artificis prudentiâ prodit.
Jam variâ tuâ eruditione
quæ etiâ juvenis olim magno
Boxbornio fuisti admiratio-
ni, inter Clarissimos Te assê-
reres, si hac famâ animi trā-
quillitatē tueri velles. Ante
omnes Hermes Te pro suo in-

DEDICATIO.

*ter intimos Naturæ amicos
 cum Gebero adscripsit, cui
 tantū indulges, ut, quia pub-
 licos difficile, privatos ta-
 men mortalium morbos e-
 mendare posses, si extra sor-
 tem tuam Te demitteres,
 crederesve melius exerceri
 illam artem quam sciri,
 quæ seculi vitio penè con-
 culcatur. Ut igitur testator
 sit generosæ pariter & Do-
 ctissimæ mentis apud po-
 steros memoria, nostriq; affe-
 ctus erga Te & familiam Il-
 lustrem*

DEDICATIO.

lustrem, quæ bonos Viros &
doctos, vel fecit vel genuit,
quia Naturæ candidatos a-
liquo apud Te loco esse pa-
teris, meq; immerentem lau-
dare soles & amare; has pa-
gellas raris Naturæ institu-
tis plenas, Illustrissimo Tuo
nomini dico & consecro,
Deum precatus ut Tibi,
Tuis, Naturæ & nobis in
spem publicam diu supersis.
Hafniæ Cal. Nov. clc lcc
LXIII.

In Comparabili Viro

THOMÆ BARTHOLINO

Regio Professori Honorario

Cum opus de variis fœtus hu-
mani viis ederet,

CHRISTIANUS OSTENFELD

Med. P. P. & Reg. Acad. Biblio-
thecarius.

Dum patrium illustras magnis vir-
tutibus orbem

Et patris & magni nomina reddis
avi,

Tota tibi servit doctorum fama vi-
rorum

Fertur & in laudes officiosa tuas.

Dumq; tui veniunt victuri in secula
libri

Rarum naturæ parturientis opus,
Scribaces animos informes edere fœ-
tus

Suppuget, & nullo scripta legenda
die.

THO-



THOMÆ BARTHOLINI
DE
INSOLITIS PARTUS
HUMANI VIIS
Dissertatio Nova.

CAPUT I.

*Historia Partus mirabilis, &
Dissertationis occasio.*

NUsqvam magis
quam in humana genera-
tione variat Natura, & in
constanti puerperii actione inconstan-
tiam suam monstrat constantissimè:
Vel enim partus tempus prolongatur
& spacio incerto definitur, vel nu-
mero-

A

merosi foetus eduntur, vel monstrosi
tam corpore quam animo, & supplicati-
onibus expiandi. Singulorum his
annis exempla memini, quæ non va-
cat hic referre, extantq; similia mul-
ta in monumentis Medicorum, qui-
bus talia conscriptari curæ fuit. Quan-
quam verò in via Naturæ, quæ perfe-
cti foetus excluduntur, constantiam
aliquam & perpetuitatem servare vi-
deatur, aberrat tamen nonnunquam
& hic à trita via, novamq; eligit, nul-
lo vitæ miraculo majore, quasi longa
parturiendi assuetudine defatigatam
fastidiat, & antiquarum tædio, novas
semitas quærat. Huic materiæ, quam
meditor persequi, admiratio non de-
erit apud illos, qui naturæ potentiam
ex suâ inopiâ æstimant, nec pompa
rationum & sermonis, si quicquam
aliud intueri liberet, quam fidem o-
peris. Ne diutius Lectoris curiosita-
tem remorari videar, occasionem se-
quutura Dissertationis captabo ex
puer-

puerperæ cujusdam nostratis fato prorsus mirando, ut ingenti aliquo exemplo susceptum argumentum illustretur.

Annus agebatur seculi currentis tertius & quadragesimus quum in Insula Lolandia, Serenissimo Regi Danorum subjecta, mulier quædam, cui nomen Ingera, tritum ante liberorum Mater, ad secunda vota transitura nuberet Erasmo Jani in Egholm. Eodem anno imprægnata gemellos gestare se credebat. Instante consueto partus tempore, accita fuit obstetrix, exorti ex utero dolores, & omnia ad puerperium comparata. Sed frustra-
neus fuit conatus, quia nihil eniti potuit. Perstiterunt dolores conatusque parturientis per duos dies, quibus exactis evanuerunt, nec integris hebdomadibus sex ullum de se indicium gemelli dabant. Postea tamen moveri iterum cœperunt, vivosque deinceps apud se quinque annorum spatio

observavit. Exinde sensim eos inter se collidi sentiit, & velut quum panis pinsetur, comprimi & constringi, moxq; imminui & emori. Quamprimum suis indiciis gemellos expirasse constitit, intumuit umbilicus, mensuram candelabri, qva amplissimum, adæqvans, ad digiti longitudinem protensus, & nigricans. Ita distentus umbilicus per medium fuit ruptus, quasi acuto cultello dissectus, primisq; diebus binis puram aquam effudit, deinde sanguinem & pus, quos liquores statim insequuta sunt nonnulla ossicula puerilia. Patebat hic umbilici hiatus ad annos octo, ex quo frequenter interea ossicula prodire visa. Vix eo sua sponte consolidato, aliud apostema apertum fuit infraumbilicum, unde ossicula quinq; vel sex consuetis majora emanarunt. Anno sequenti, etiam hoc ulcus ex se sanatum. Posthæc ex illis sinistris ruptis nihil effluere observatum, sed ulcus
ad

ad duorum digitorum transversorum distantiam, sub priori apostemate, infra umbilicum serpit anno 1661, ex quo grandiora ossicula spatio trium dierum circa Martini festum quamplurima egressa. X. Martii 1662 ossiculum prodiit ex occipite foetus. Interea quanquam misella magnis cruciatibus fuerit subiecta, lecto tamen se affigi passa non est, sed negotiorum domesticorum causa huc illucq; obambulavit, Deum timuit, ejus coetus in templo frequentavit, & artem obstetricandi exercuit. Proximè tamen dicto festo Martini, quum majora ossicula excerneret, dolores intolerabiles, peneq; lethales passa est, ut mortis candidata ab adstantibus crederetur, seq; ad mortem evocato Presbytero & salutari viatico refecta componeret. Jam verò rectè valet & convaluit, omnesq; ventris rupturæ coaluerunt, nec ulla exinde tormina sentiit. Hoc tantum narrat, se supino corporis si-

tu, digitis explorare posse sub ultimâ illâ ventris rupturâ cavitatem quandam rotundam & vacuam, cutemq; eo loci concidere, sine tamen ullo doloris sensu. Hæc ex sancta ipsius puerperæ relatione scribo, cui adfuit Vir pietate & eruditione spectatus Dn. *Richardus Johanneus* Pastor Herritzlevianus in Lalandia, qui ægram consolatus, accuratè vidit & inspexit patentia ulcera in ægro corpore, unde ossicula rejecta, mihiq; amicis literis non solum singula perscripsit, sed thecam ossiculis excretis plenam misit.

Ipsa ossicula perfecti fœtus humani sunt rudimenta, solida, tam multa ut pro gemellis sufficiant, nonnihil nigricantia, ut gravi odore putridoq; nares offendant, & libero aëri exponi à me debuerint.

Rapuit narrata inusitatæ puerperæ series notos ignotosq; in admirationem, & oppidum rerum novarum expecta-

pectatione suspensum reddidit. Mihi super ea re diversus fuit animi motus. Temporum præteritorum recordatione mentem composui, ut nihil minus quam miraculum cogitarem similibus alibi puerperiis prælucentibus. Alio à vulgi genio animatus nihil pro incredibilibus didici habere, quod vel aliorum exemplis se tuetur, vel probabili ratione aliqua fidem, apud eruditos naturæ interpretes invenit. Huic operæ igitur immoremur, partus insolitas vias, mulierculæ hujus occasione, exemplis & rationibus Anatomicis exposituri quam brevissimè, memores *Macrobi* sententiæ l. 2. somn. scip. c. 4: In re naturaliter obscura, qui in exponendo plura, quam necesse est, superfundit, addit tenebras, non adimit densitatem. Animo nostro semper & pennæ insedit *Plinii* effatum l. 28. c. 1: Fides tantum autores appellet. Quamquam & ipsi consensu prope judicata eligere

laboravimus, potiusq; curæ rerum,
quam copiæ institimus.

CAPUT II.

Legitimum & statum partus terminum, nec in hac muliere, nec in aliis unquam variare.

IN primis mora illa diuturna in utero ab anno clō Iōc XLIII. ad annum clō Iōc LXI. plurimos offendit, nescios cæteris animantibus statum & pariendi & partus gerendi tempus esse, hominem toto anno & incerto gigni spacio, monente *Plinio* lib. VII. c. 5. post *Aristotelem* lib. VII. de Hist. Animal. c. 4. alium septimo mense, alium octavo, & usq; ad initia decimi undecimiq;. Habent tamēn & hæc tempora suam latitudinem, quod de cæteris animantibus probat *Paulus Zacchiæ* lib. I. Quæst. Med. leg. tit. 2. q. 1. n. 105. In humano genere res videtur magis confessa. Ad duodecimum

mum enim, tertium, quartum supra
 decimum mensem alii progressi, de
 quibus iusta diligentia egit *Caranza*
 Cap. XV. de Part. Nat. & *Henn. Arni-*
seus noster in Disq. de Part. Hum. le-
 git. term. Alii ad annos computum
 extenderunt. *Jacobus Fontanus* part.
 1. Art. Med. l. 5. Physiol. c. 16. ex rela-
 tione Medicorum Monspeliensium
 refert, nonnullas ibidem feminas le-
 gitimos peperisse natos duodecime-
 stres, sexdecimestres, vigesimestres,
 & vigesiquatrimestres. Quarto anno
 puerperium editum, creditur *Matthia*
Cornaci. Post annos XII mortuum
 foetum frustillatim exclusit foemina
 mediocris sortis apud *Zacutum* lib. 2.
 Prax. Adm. Obs. 157. Annis tredecim
 foetum mortuum in utero gestatum
Aegidius Hertogbuius fidem fecit. Mus-
 sipontanus foetus *Job. Dan. Horstij* &
Laur. Straußij diligentia notus, sex lu-
 stra & amplius claustra sua pertulisse
 dicitur. Post annos sexdecim *Dola-*

nus infans, *Cl. Arn. Senguerdj* commentario docto illustratus, in ventre matris repertus. Lithopædion Senonense, quod in Augusto Musæo Augustissimi Regis FRIDERICI III. Domini nostri clementissimi, asservatur, annos XXVIII. in utero materno hæsit. Lauzu Philosophus quidam Chinenſis octuaginta annis in alvo matris gestatus narratur à *Nic. Trigautio* lib. I. de Christ. Exp. apud Sin. c. 10. Omnibus fidem adhibere vix possum. Pleraq; tamen fide authorum credimus, de quibus quid mihi in mentem veniat, verbo significabo. Quamquam varient subinde tempora partus, secundum variam fœtus & puerperæ conditionem; tamen nec in hac nostra femina, nec aliis exemplis, quæ diuturnis graviditatibus annumerantur, legitimus parturiendi terminus prolongatus ullo jure dicendus. Nam ad naturæ mentem, imprægnatio desinit extincto fœtu,
& ex-

& extinctus in utero fœtus, partus esse definit. Partus antequam edatur, mulieris portio est, vel viscerum *ff. de Ventre Inspic.* At cum extinctus est in utero, res aliena est in matre. Unde qui mortui nascuntur, neq; nati neq; procreati videntur *ff. de Verb. Signif. §. 129.* Ut eapropter in tali casu verum sit quod *Hippocrates* ait lib. 1. de M. Mul. abortire mulierem, quamquam puer non excludatur: nempe quando mortuos hujusmodi fœtus, abortivos jam, gestat, de quo effato Hippocratico videndus *Andr. Laurentius* lib. VIII. Anat. quæst. 29. Omnes verò supra recensiti fœtus maturi, ad exitum se, consueto partus tempore accinxerunt. At quia causa aliqua intercessit quæ impediit quo minus justa fieret parturitio, evenit illis quod fructibus in arbore maturis, qui si non decerpantur negligentia hortulani, vel putrescunt & exsiccantur in arbore relictæ, vel decidunt &

con-

observavit. Exinde sensim eos inter se collidi sentit, & velut quum panis pinsetur, comprimi & constringi, moxq; imminui & emori. Quamprimum suis indiciiis gemellos expirasse constitit, intumuit umbilicus, mensuram candelabri, qva amplissimum, adæqvans, ad digiti longitudinem protensus, & nigricans. Ita distentus umbilicus per medium fuit ruptus, quasi acuto cultello dissectus, primisq; diebus binis puram aquam effudit, deinde sangvinem & pus, quos liquores statim insequuta sunt nonnulla ossicula puerilia. Patebat hic umbilici hiatus ad annos octo, ex quo frequenter interea ossicula prodire visa. Vix eo sua sponte consolidato, aliud apostema apertum fuit infra umbilicum, unde ossicula quinq; vel sex consuetis majora emanarunt. Anno sequenti, etiam hoc ulcus ex se sanatum. Posthæc ex iliis sinistris ruptis nihil effluere observatum, sed ulcus
ad

ad duorum digitorum transversorum distantiam, sub priori apostemate, infra umbilicum serpit anno 1661, ex quo grandiora officula spatio trium dierum circa Martini festum quamplurima egressa. X. Martii 1662 officulum prodiit ex occipite foetus. Interea quanquam misella magnis cruciatibus fuerit subiecta, lecto tamen se affigi passa non est, sed negotiorum domesticorum causa huc illucq; obambulavit, Deum timuit, ejus coetus in templo frequentavit, & artem obstetricandi exercuit. Proximè tamen dicto festo Martini, quum majora officula excerneret, dolores intolerabiles, peneq; lethales passa est, ut mortis candidata ab adstantibus crederetur, seq; ad mortem evocato Presbytero & salutari viatico refecta componeret. Jam verò rectè valet & convaluit, omnesq; ventris rupturæ coaluerunt, nec ulla exinde tormina sentiit. Hoc tantum narrat, se supino corporis si-

tu, digitis explorare posse sub ultimâ illâ ventris rupturâ cavitatem quandam rotundam & vacuam, cutemq; eo loci concidere, sine tamen ullo doloris sensu. Hæc ex sancta ipsius puerperæ relatione scribo, cui adfuit Vir pietate & eruditione spectatus Dn. *Richardus Johanneus* Pastor Herritzlevianus in Lalandia, qui ægram consolatus, accuratè vidit & inspexit patentia ulcera in ægro corpore, unde ossicula rejecta, mihiq; amicis literis non solum singula perscripsit, sed thecam ossiculis excretis plenam misit.

Ipsa ossicula perfecti fœtus humani sunt rudimenta, solida, tam multa ut pro gemellis sufficiant, nonnihil nigricantia, ut gravi odore putridoq; nares offendant, & libero aëri exponi à me debuerint.

Rapuit narrata inusitatæ puerperæ series notos ignotosq; in admirationem, & oppidum rerum novarum expecta-

pectatione suspensum reddidit. Mihi super ea re diversus fuit animi morus. Temporum præteritorum recordatione mentem composui, ut nihil minus quam miraculum cogitarem similibus alibi puerperiis prælucentibus. Alio à vulgi genio animatus nihil pro incredilibus didici habere, quod vel aliorum exemplis se tuetur, vel probabili ratione aliqua fidem, apud eruditos naturæ interpretes invenit. Huic operæ igitur immoremur, partus insolitas vias, mulierculæ hujus occasione, exemplis & rationibus Anatomicis exposituri quam brevissimè, memores *Macrobi* sententiæ l. 2. somn. scip. c. 4: In re naturaliter obscura, qui in exponendo plura, quam necesse est, superfundit, addit tenebras, non adimit densitatem. Animo nostro semper & pennæ insedit *Plinii* effatum l. 28. c. 1: Fides tantum autores appellet. Quamquam & ipsi consensu prope judicata eligere

laboravimus, potiusq; curæ rerum,
quam copiæ institimus.

CAPUT II.

Legitimum & statum partus terminum, nec in hac muliere, nec in aliis unquam variare.

IN primis mora illa diuturna in utero ab anno clō Iōc XLIII. ad annum clō Iōc LXI. plurimos offendit, nescios cæteris animantibus statum & pariendi & partus gerendi tempus esse, hominem toto anno & incerto gigni spacio, monente *Plinio* lib. VII. c. 5. post *Aristotelem* lib. VII. de Hist. Animal. c. 4. alium septimo mense, alium octavo, & usq; ad initia decimi undecimiq;. Habent tamen & hæc tempora suam latitudinem, quod de cæteris animantibus probat *Paulus Zacchiæ* lib. I. Quæst. Med. leg. tit. 2. q. 1. n. 105. In humano genere res videtur magis confessa. Ad duodecimum

mum enim, tertium, quartum supra
 decimum mensem alii progressi, de
 quibus iusta diligentia egit *Caranza*
 Cap. XV. de Part. Nat. & *Henn. Arn-*
seus noster in Disq. de Part. Hum. le-
 git. term. Alii ad annos computum
 extenderunt. *Jacobus Fontanus* part.
 1. Art. Med. l. 5. Physiol. c. 16. ex rela-
 tione Medicorum Monspeliensium
 refert, nonnullas ibidem feminas le-
 gitimos peperisse natos duodecime-
 stres, sexdecimestres, vigesimestres,
 & vigesiquatrimestres. Quarto anno
 puerperium editum, creditur *Matthia*
Cornaci. Post annos XII mortuum
 foetum frustillatim exclusit foemina
 mediocris fortis apud *Zacutum* lib. 2.
 Prax. Adm. Obs. 157. Annis tredecim
 foetum mortuum in utero gestatum
Aegidius Hertogbuis fidem fecit. Mus-
 sipontanus foetus *Joh. Dan. Horstij* &
Laur. Straußij diligentia notus, sex lu-
 stra & amplius claustra sua pertulisse
 dicitur. Post annos sexdecim *Dola-*

nus infans, *Cl. Arn. Senguerdj* commentario docto illustratus, in ventre matris repertus. Lithopædion Senonense, quod in Augusto Musæo Augustissimi Regis FRIDERICI III. Domini nostri clementissimi, asservatur, annos XXVIII. in utero materno hæsit. Lauzu Philosophus quidam Chinenſis octuaginta annis in alvo matris gestatus narratur à *Nic. Trigautio* lib. I. de Christ. Exp. apud Sin. c. 10. Omnibus fidem adhibere vix possum. Pleraq; tamen fide authorum credimus, de quibus quid mihi in mentem veniat, verbo significabo. Quamquam varient subinde tempora partus, secundum variam fœtus & puerperæ conditionem; tamen nec in hac nostra femina, nec aliis exemplis, quæ diuturnis graviditatibus annumerantur, legitimus parturiendi terminus prolongatus ullo jure dicendus. Nam ad naturæ mentem, imprægnatio desinit extincto fœtu, & ex-

& extinctus in utero fatus, partus esse desinit. Partus antequam edatur, mulieris portio est, vel viscerum *ff. de Ventre Inspec.* At cum extinctus est in utero, res aliena est in matre. Unde qui mortui nascuntur, neq; nati neq; procreati videntur *ff. de Verb. Signif. §. 129.* Ut eapropter in tali casu verum sit quod *Hippocrates* ait lib. 1. de M. Mul. abortire mulierem, quamquam puer non excludatur: nempe quando mortuos hujusmodi fœtus, abortivos jam, gestat, de quo effato Hippocratico videndus *Andr. Laurentius* lib. VIII. Anat. quæst. 29. Omnes verò supra recensiti fœtus maturi, ad exitum se, consueto partus tempore accinxerunt. At quia causa aliqua intercessit quæ impediit quo minus iusta fieret parturitio, evenit illis quod fructibus in arbore maturis, qui si non decerpantur negligentia hortulani, vel putrescunt & exsiccantur in arbore relictis, vel decidunt &

con-

nus infans, *Cl. Arn. Senguerdj* commentario docto illustratus, in ventre matris repertus. Lithopædion Senonense, quod in Augusto Musæo Augustissimi Regis FRIDERICI III. Domini nostri clementissimi, asservatur, annos XXVIII. in utero materno hæsit. Lauzu Philosophus quidam Chinenſis octuaginta annis in alvo matris gestatus narratur à *Nic. Trigautio* lib. i. de Christ. Exp. apud Sin. c. 10. Omnibus fidem adhibere vix possum. Pleraq; tamen fide authorum credimus, de quibus quid mihi in mentem veniat, verbo significabo. Quamquam varient subinde tempora partus, secundum variam foetus & puerperæ conditionem; tamen nec in hac nostra femina, nec aliis exemplis, quæ diuturnis graviditatibus annumerantur, legitimus parturiendi terminus prolongatus ullo jure dicendus. Nam ad naturæ mentem, imprægnatio desinit extincto foetu,
& ex-

& extinctus in utero fatus, partus esse definit. Partus antequam edatur, mulieris portio est, vel viscerum *ff. de Ventre Inspec.* At cum extinctus est in utero, res aliena est in matre. Unde qui mortui nascuntur, neq; nati neq; procreati videntur *ff. de Verb. Signif.* §. 129. Ut eapropter in tali casu verum sit quod *Hippocrates* ait lib. 1. de M. Mul. abortire mulierem, quamquam puer non excludatur: nempe quando mortuos hujusmodi fœtus, abortivos jam, gestat, de quo effato Hippocratico videndus *Andr. Laurentius* lib. VIII. Anat. quæst. 29. Omnes verò supra recensiti fœtus maturi, ad exitum se, consueto partus tempore accinxerunt. At quia causa aliqua intercessit quæ impediit quo minus justa fieret parturitio, evenit illis quod fructibus in arbore maturis, qui si non decerpantur negligentia hortulani, vel putrescunt & exsiccantur in arbore relictis, vel decidunt &

con-

contunduntur. Ita & hi foetus sani & vivi accuratum puerperii momentum observarunt, quo denegato, foetus vivi esse desierunt, cadaveribus adscribendi, quibus nec imprægnatio ullæ, nec nativitas rectè assignatur. Partus tamen nomen apud Authores nostros retinuerunt nescio quo suo merito. Partus enim duo notat, I. foetum ipsum necdum editum, exclusioni tamen paratum seu vivum seu mortuum, quæ significatione ubiq; toto libro *Censorinus* De Die Natal. cepit. *Celso* præcipuè mortuum foetum designat lib. 2. c. 8. & l. 7. c. 29. uti & *Plinio Valeriano* Medico lib. 4. c. 19. 29 Hoc significatu nobis in præsentî Dissertatione partus venit II. ipsum puerperium, seu pariendi actum, apud eundem *Celsum* l. 2. c. 1. *Scribonium* Comp. 89. 126. *Plinium Valerianum* l. 3. De Re Med. c. 32. ut alios taceam, eodem flexu cepit *Q. Seren. Sammonicus* in Med. c. de Concept. & Part.

Ut

Ut facili vigeat servata puerpera
partu.

P. P. Sentiat ut minimè partus quam
proximus urget.

QVO loco partum de foetu ipso
interpretatur nuperus Sereni Com-
mentator Doctissimus *Rob. Keuchenius*
in Not. nescio quam verè, quum in
primo versu foetus præcesserit, postea
sequatur partus, qui partus elegan-
ter *partitudo* vocatur *Plauto* *Aulular.*
A. I. Sc. I. v. 37.

Ultra decimū mensem cur ejusmo-
di partus seu puerperia differri pos-
sint, causam aliqui & apud gravidæ ute-
rum & foetum quarunt. In utero quidē
si vel ille capacior sit, vel nutrimento
abundet: In foetu verò, si vel frigidior
sit vel in calcitrando segnior. Nutri-
menti inopia rarissimè acceleratur
partus, quanquam id *Hippocrates* vo-
luerit l. de Nat. Puer. quia continuò
per occultas chyli vias affluit, & rarò
colligvamentum, in quo foetus natat,
& quo

& qvo alitur, in utero deficit. Præ-
viderunt hoc ingeniosi, ut nullo ali-
menti defectu, sed excrementorum
copia urgeantur puerperia. At fœtus
qvamvis frigidior, tot annorum ma-
turitatem non expectat, præsertim
qvum gemelli nostri, reliqviq; ab aliis
annotati, exitum vegeto robore op-
portunè urserint, qvo frustrati conta-
buerunt. Dicitur quidem in historia
nostra, gemellorum motum ultra
annos qvinq; ab Ingera perceptum;
sed vix inducor ut credam, motum
illum verum fuisse embryonum vi-
vorum, non qvod melancholiæ seu
pravæ Ingeræ imaginationi hic ali-
quid tribuam, sicut illa apud *Riverium*
Cent. 2. Obs. 100. qvæ à 22 annis se
gravidam ex motu qvodam imagina-
rio credebat; vel altera Belliquadren-
sis, qvæ mensem vigesimum tertium
gestare utero dicebatur, non omninò
sana mente, iudicio *Saportæ* aliorumq;
Monspeliensium, approbante *Gassendo*
l. 1. de

l. i. de Vita Peiresky: Deceptam potius puerperam nostram suspicor flatuum similitudine, quod alibi etiam divinavit *Aristoteles* l. vii. Hist. Anim. c. 4. qui flatus sensim in partium carnosarum resolutione aborti motum gemellorum mentiebantur. Hac similitudine juvenculas non paucas deceptas memini, flatus pro foetibus gestantes. Superat fidem meam, tamdiu supra terminum à Natura præscriptum, in utero superstites esse cum vita embryones. Raras eqvidem historias amplector, sed quibus probabilis aliqua ratio favet, eaq; naturalis. Quamquam enim, iudice *Hippocrate* l. de Sept. Part. mulieribus de partu fides habenda sit, nam & omnia narrant, semperq; dicunt, & semper proferunt; tamen hoc passu, quia de vita clausi adhuc materno carcere foetus loquimur, dubia apud me est Ingeræ experientia, quæ forsitan magnis ex putredine doloribus impedita, sa-

ta, satis accuratè hæc discernere non
valuit. Suspicionem meam auget,
quod sex mensium mora intercesserit
inter frustratum naturalis partus tem-
pus & redeuntem motum. Tantam
pausam vita non facit, nec ab indiciis
vitæ interea cessare potuit fœtus,
præsertim in illa matre, quæ motum
antea senserat, nam alioquin notæ mi-
hi in urbe nostra gravidæ, quæ ante
imminentem partum, nullum em-
bryonis motum observarunt, adeoq;
se uterum gerere ignorarunt, prius
quam utero exortis doloribus Luci-
næ opem implorarent: neq; interea
mortui gemelli ad vitam motumque
postliminiò redire potuerunt. Quan-
quam multa cottidie monstra nascan-
tur, plurimiq; insoliti eventus contin-
gant, necdū tamē sæculo nostro à mor-
tuis redeundi contigit ulli mortalium
potestas. Verè mortuos dico, & sex
menses defunctos, quia deficiunt nobis
herbæ Ponticæ, quibus olim *Maro* vidit
Sæpe

---- *Sape animas imis exire sepulchris.*

Nec post nativitatem vel ejus præfinitum tempus, ad uterum seu ad vitam in utero datur ulli regressus. Quod ex ingenio assequeretur Nicodemus *Job. III. 4.* numquid potest in ventrem matris suæ secundo introire, & renasci? Quamquam inter exempla sit *Plinio* lib. VII. c. 3. in uterum pronus reversus infans Sagunti, quo anno ab Annibale deleta est. Vera, an ficta, non liquet. Ex utero prospexit tantum infans ille, salvis involucris & vinculis, nec natus dici potuit. Credo igitur quinque annorum motum in gemellis vitamque putaticiam, fuisse ebullitionem quandam pravorum humorum in utero, à putredine partium carnosarum tamdiu observatam donec carne omni absumpta, nuda ossa relinquerentur, nec aliam hic protracti partus esse rationem, quam ego ex ordinario termino malim computare, quam longam gravida-

ditatem inducere. *Hippocratis* simile ferè est iudicium L. de Nat. Pueri: Si quæ, inquit, ultra decem menses utero gestare sibi visæ sunt, quod jam sæpe audiui, eæ hoc modo fallunt. Cum uteri à ventre flatum suppeditante spiritu distendantur & intumescunt, tum mulieres se concepisse existimant.

CAPUT III.

Cur gemelli legitimo partus tempore via consæta editi in lucem non sint?

QUæritur jam à Naturæ curiosis, cur gemelli hi definito mense decimo ex prægnantis utero via solita non prodierint, siquidem parturientium dolores Matrem invaserunt, & fœtus maturos indicarunt. Varia impedimenta occurrunt, quæ prohibuerunt naturalem exitum, breviter recensenda:

I. Mem-

I. Membranarum involventium densitas, quæ neq; à foetuum calcitratione, neq; pondere, neq; stagnantium lochiorum copia, neq; puerperæ nisu potuere rumpi. Remoratur non rarò felicem partus progressum nativæ tunicæ choroides crassities, & nonnunquam prorsus impedit velut obiecto vallo, quod nisi vi externa accedente, amoveri non potest, de qua dicendi in progressu dabitur commoditas. Defuit igitur prægnanti nostræ hæc laxitas membranarum, & pròvida seu obstetricis seu adstantium cura, unde auxilii defectu foetus in utero remanserunt. Et quanquam primus foetus perrupisset, alter tamen ab opere desistere coactus fuisset, quia ex observatione *Lud. Burgesia* Obstetricis Gallicæ c. XII. si singuli gemelli suas habent membranas, posterior suam tunicam nequit rumpere, qui debilior est, viresq; suas fregit ut simul cum primo prodiret.


II. Membranarum quoque tenuitas facili rupturæ opportuna, antequam lubricandis viis necessariam effundit, quam ad exitum paratus sit foetus. Hinc viæ, per quas transeundum, exsiccae laxari non possunt, nec foetum emittere.

III. Angustia vaginæ excludi foetum prohibet, siue ea naturalis sit, in feminis statura parvis, quales pleræque fuerunt quæ talia sunt passæ, vel ætate proVectis, quartum cervicem vulvæ durum admodum & cartilagineam describit *Galenus* l. de Diffect. Vulv. c. 7. adeoque extendi dilatarique ineptam: siue morbosa & ab ulcere vel scirrho coalescens. Exempla memoriæ nostræ suggerit *Hildanus* Cent I. Obs. 64 67. Apud *Fel. Platerum* post partum difficilem mulieri cervix uteri spississima ac veluti cartilaginosa invicta & transversus digiti crassitie coaluerat. Tale quoque erat internum matricis osculum prorsus connatum in muliere illa, de qua

Har-

Harvejus l. de Partu, quod nec virilis membri, nec specilli quidem ingressum admisit, neq; menstruorum egressum, & nisi robusti fœtus summo conatu partes illæ dilatatæ fuissent & disruptæ, nullus sequutus esset partus. *Tobias Knoblochius* in Epist. Med *Greg. Horstij* Sect. xvii. observavit in dissecta gravida, Scirrhum insignis magnitudinis à fundo uteri incipientem & ad os uteri desinentem, ob quam causam bona illa femina sobolem parere non potuit, sed utero perfracto in abdomen projecit. Desuit nostris gemellis validum hoc robur, si vel maximè laxior Ingeræ esset Natura. Huc facit & ligamentorum durities, quam mulieres pleræq; supra 40. ætatis annum patiuntur, sicut annotavit *Rod. à Castro* l. iv. de M. M. c. 6.

IV. Siccitas & arcta constrictio Symphyseon ossis pubis, sive ilii & sacri, impedit non tantum in mulieribus, quæ nati sunt grandiores, facilem



lem partum, sed prorsus nonnunquam retenti fœtus occasionem præbet. Refert *Pineus* l. 2. de Not. Virg. c. 6. ex observatione Anatomicorum feminas quæ nunquam conceperunt, esse longè angustissimas, easdemque habuisse cartilagines inter hæc ossa sitas admodum tenues, siccas & ferè nullas aliarum respectu. Si has fortè contingat concipere, nunquam angustias istas ossium immobilium & induratorum evadet fœtus. Experta id est paupercula Varſaviensis diris ac irritis parturientium laboribus per quatrimum divexata, de qua, quum occubuisset, testatur *Jo. Claud. de la Courvée* part. 3. de Nutrit. Fœt. c. 12. pubis ossa ita fuisse constricta & conjuncta, ut vix novacula potuerint diduci, quibus diductis, extractum esse infantem eo situ, quo prodibat, omnino naturali; unde rectè judicavit Vir laudatus, non aliò frustrati partus & utriusque mortis esse deducendam.

• cau-

causam, nisi quia hæc ossa non potuerint diduci; fuisse enim ipsam brevissimam admodum staturæ, seniculam, quadragesimum octavum ætatis annum agentem, nec antea gessisse utero. Idem de ossæ sacro iudicium esto, pro cuius dilatatione seu retrocessione ad partum facilem pugnat *Mercatus* l. IV. de Aff. Mul. c. 3.

V. Ad Matrem aliæ causæ referri non possunt, quia vegeta fuit, robusta, & dolores parturientium habuit validos satisq; diuturnos. Sed foetus ipsi ad impeditum puerperium contulerunt quamplurimum, ratione magnitudinis, virium & situs. Grandiores gemelli per angustum Naturæ iter egredi nesciunt, vel, si invalidi, matris conatum destituunt. Situs & egrediendi modus utramq; hic paginam facit. In simplici quidem foetu, quando venter pueri vel dorsum primum angusto orificio incumbit funesto omni & eventu.

In simili casu vidit

Platerus l. I. Obs. transversum fœtus situm, atq; eximiam magnitudinem, quam longitudo illius & capitis amplitudo prolixis admodum capillis constans declarabant, impedimento fuisse quo minus in partu prodire potuerit, sicq; retentum XX septimanarum spacio computruisse & vicinas partes infecisse. In gemellis verò, si simul egredi contendant, si pedibus priores exire conentur, si diverso modo ad exitum tendant, ita ut alter capite, alter pedibus enitatur, quos exeundi modos *Eucharius Rhodio* l. de Part. Hom. c. 4. *Jacobus Ruef* l. IV. de Muliebr. aliq; prolixius post veteres persequuntur. Bicipites fœtus præ cæteris incusant *Ætius* tetr. IV. serm. 4. c. 22. *Ægineta* l. III. de Re Med. c. 76. & quantum ex transmissis officulis divinare licet, si gemelli non fuerunt, bina certè capita se prodiderunt.

VI. Inter postremas causas frigidus Insulæ aër non est numerandus, monen-

monente *Moschione* de Pass. Mul. idq;
quia venter inferior inflatur, ut suspi-
catur *Viçt. Trincavellius* l. XI. de Morb.
Partic. c. 24. vel propter adstrictionem,
judice *Mercato* l. 2. de M. M. 3. & *Ca-
strense* in Exercit. Med. qvi id *Avicenne*
debuerunt, & *Isaaco* l. VI. Viatic. c. 16.
unde secundum *Avicennam* l. III. fen.
21, tr. 2. c. 21. aliosq; veteres, difficilius
pariunt mulieres in regionibus Se-
ptentrionalibus, & in ventis septentri-
onalibus, & in regionibus & tempo-
ribus frigidis. Eleganti similitudine
hoc illustrat *Ant. Everhardus* l. de
Hom. Exort. sicut enim naupegi asse-
res rigidos ignis substructi beneficio,
pro lubitu flexibiles reddunt: sic mu-
lieres in Indiâ, beneficio aëris calidio-
ris, uteros foetus exclusioni magis o-
bedientes obtinent. Iniquum certè
est puerperis nostris cœlum nostrum,
ut puerperia vix sex hebdomadibus
finiantur, qvum in Gallia viderim pu-
erperas vix uno die intra lecti claustra

contineri potuisse. Addo Lalandiam inter Insulas Daniæ valetudini esse insensissimam, ut pauci senium attingant, hincq; Laulandiam, quasi humilem terram dici monet *Jonas Coldingensis* in Dan. descript.

CAPUT IV.

Repigrationem horum gemellorum supranaturalem non esse.

OMnia si jungas quæ & Mater ad hanc cladem contulit, & gemelli, & aliæ incidentes res, quarum exactam enarrationem alii tradunt, impediti partus facilem habebimus rationem, eamq; Naturæ consentientem, ut extra naturæ ambitum evagari sit supervacaneum. Nostræ tamen Ingeræ credula superstitio persvasit, ad frustrandum partum Sagas artes suas curiosas advocasse. Ita enim ad me Confessionarius illius, Vir eruditus & fidelis sacrorum custos
Dn.

Dn. *Richardus Jobannis* Svenopolita-
 nus per amicas literas retulit; narra-
 tum sibi de quibusdam præstigiis ad-
 huc prægnanti mulieri Ingeræ obla-
 tis. Nocte quadam in lecto conqui-
 escentem anser quidam inter lecti
 stramina sub cervicali rostro perstre-
 pens excitabat, quo animadverso, si-
 ne mora ex lecto, prius tamen sancto
 crucis signo se muniens, profiliebat,
 strepentem anserem extra cubiculum
 emissura. Anser autem exporrecto
 collo ventrem ipsius undiquaq; rostro
 vellicare cœpit, quo cum nihil profi-
 ceret, apprehensum per alas in vesti-
 bulum projecit, & occlusis post se fo-
 ribus, cubitum se denuò contulit, u-
 nam ex ganzis suis in conclavi ad ex-
 cludendum ova reclusis esse rata. Ma-
 ne autem evigilans præstigias fuisse
 sensit, ganzas enim suas omnes in ni-
 dis ubi vesperi repositæ fuerant, pla-
 cidè incumbentes invenit, & ex illo
 tempore langvere & torqveri cœpit.

An

An à supranaturali causa retardari ita possit partus & ad plures annos prolongari, me repugnante; concedunt malè creduli. De Ilithyia Alcmene partum impediante, ita *Ovidius* l. IX. *Metamorph. fab. 6.*

---- digitisq; inter se pectine junctis
Sustinuit partus. Tacita quoq; carmina voce

Dixit: & inceptos tenuerunt carmina partus.

Plinius l. XXVIII. c. 6. hujus moris damna quoq; recenset ex historia Alcmene: Adsidere gravidis, vel cum remedium alicui adhibeatur, digitis pectinatim inter se implexis, veneficium est: idque compertum tradunt Alcmena Herculem pariente: pejus, si circa unum ambove genua. Miror cur hujus occultæ rei rationem à *Galeoto Martio* requirat *Georgius Merula Alexandrinus* Annotat. in illius libr. de Homine; quum mera sit superstitio ratione naturali carens, & tam vera

vera quam Alcmenæ partus. Nec unquam ab ipsis Romanis ratione ulla proditæ superstitiones, sed fictæ, nec defensæ nisi multitudine, quod de furore dixit *Minutius Felix* in Octavio. Rectè igitur *Lactantius* l. V. de Justit. c. 20. in Paganorum religione, nihil aliud videre se dixit, quam ritum ad solos digitos pertinentem. *Apulejus* l. I. *Metam.* de Saga narrat, quæ amatoris sui uxorem jam in sarcinam prægnationis obsepto utero, & repugnato fœtu, perpetua prægnatione damnavit, & ut cuncti numerabant, octo annorum onere misellam illam, velut elephantem parituram, distensam. Quid sit *repugnare fœtum*, explicat *Beroaldus*, nempe cum jam maturus exire non potest ex utero materno, quasi coërcitus, vinctusq;. Rectius tamen Mss. & alii Codices editi legunt, *repigrato fœtu*, quæ vox alibi in *Apulejo* usitata, & autoritate *Martiani Capelle* l. I. de Nupt. Phil. defenditur ab *Elmen-*
bor-

borstio in Ind. Apul. Repigrari ita foetus in utero materno per Sagas concedit quoq; *Martinus del Rio* in Disq. Magic. quem sequitur *Caranza* Cap. XV. hanc solam protractæ graviditatis causam agnoscens. Meminerint tamen, nisi aliis exemplis se tueantur, *Apulejum* circa Asinum aureum occupari, nec pro veris historiis omnia recipienda, quæ ex ingenio scribit. Severum est Severi de Albino iudicium apud *Capitolinum* in Vita Clodij Albini, quod ille naniis quibusdam anilibus occupatus inter Milesias Punicas Apulej sui & Judicra litteraria consenuerit. Ne eodem fulmine feriantur creduli, sedulo cavendum. Persuaderi mihi non patior, vera esse quæ de Saga *Apulejus* prodidit. Folia sunt artis, & meræ nugæ, quæ de Sagarum potentia sparguntur, nam si iniquo numinis ministerio uti possent pro lubitu, pleriq; foetus in generis humani detrimentum repigrarentur. Peponibus illudunt, ipsaq;
illa

illa Saga *Apulejo* imposuit, neq; enim gravida verè fuerat amatoris uxor, sed aliud morbosum seu uteri seu ventris onus gestavit, cujus eventus graviditati similis, falsò Sagæ imputabatur. Dubium occurrit ex *Binsfeldio* l. de Confess. Malefic. ubi maleficos ope diabolica adjutos posse impedire vim generativam inter conjuges probat ex Jure Canonico, & ex ipsa ratione: Potestas enim Dæmonis est major potestate hominis, sed opere humano potest aliquis fieri impotens ad carnalem copulam, ut per castrationem, ruptionem, herbas, vel medicinas. Idem momentum ad repigrationem fœtus procedit, quæ vario puerperæ situ procuratur & lapidibus. De lapide in Cervi vulva reperta tradit *Plinius* l. XXXVIII. c. 19. custodire partus. De cinere erinaceorum Idem l. XXXIX. c. 14. & vermiculis in gramine collo alligatis. De ætite testatur *Dioscoride* s. l. V. c. 161. gravidis continere partus, cum lubri-

cæ sunt vulvæ & parum tenaces, sinistro brachio adalligatum. Consentunt *Plinius* l. XXX. c. 14. & l. XXXVI. c. 21. *Lemnius* l. 4, c. 12. *Claudius* sect. 2. Consult. 34. *Boetius* l. 2 de L. c. 198. aliiq;. Quanquam aliud sit abortum præcavere, aliud foetum jam maturum retardare. An fecunditatem præstigiæ amoliantur, dubitat *Jo. Vierus*, qui l. 3. c. 35. serpentes sub ostii limine positos irridet, ut & alterum, de olla in fundo putei recondita, qua ad congressum impotens factus quidam Comes dicitur. Cur enim in illis regionibus ubi serpentum numerus domos pervagatur, non omnes sterilescunt feminae? Cur non omnes ex communi puteo aquam usurpantes languent? Dæmon quomodo illis illuserit ibidem *Vierus* exponit, qui demum lib. VI. c. 25. per compendium probat Lamas nihil posse neq; per se, neq; per incantationes, neq; per Dæmonem, neq; Dæmones per ipsas ea præstare posse.

posse. Naturalia remedia *atruia* habet *Hippocrates* l. I. de Mul. quem hoc nomine excusat *Maur. Cordaeus* Comm. VII. quod aliena illa sint à Coi ὀγκῶ, adeoq; culpa librarii irrepsisse in contextum, quod memoriæ gratia in margine Author annotarat. Nam talia remedia vocantur sterilitatis venena, illorumq; auctores ut homicidæ puniuntur in Bulla *Sixti V.* cujus edicti rationem reddit *Jo. Henr. Meibomius* c. XV. n. 63. Comm. in Jusj. Hipp. Graviditas tandem illa Apulejana, tam vera est, quam est illa decennialis Elephantis, cui ibidem assimilatur. Antiqua enim ea fuit traditio, sed apud vulgus solum, & fabularum Milesiarum conditores. *Plautus* Stich. Act. 2. Sc. 1:

Audivi sæpe hoc vulgo dictum dicier,

Solere Elephantum gravidum perpetuos decem

Esse annos. ----

C

Pli-

Plinio quoq; l. VIII. c. 10: decem annis gestare in utero *vulgus* existimat. Quo spectat testimonium *Achillis Tatij* l. IV. Erotic. qui de Matre Elephantis, annos decem in utero semen informandum continere scribit, deinde exacto annorum hujusmodi curriculo in lucem edere foetam jam senescentem. Si verum dicamus, tot anni non sunt, quot verò sint, incertum est, authorum quorum fide stamus dissensu. *Aristoteles* l. VI. Hist. Animal. c. 27. sesquiannum affert, vel secundum alios, annos tres, quem terminum sequitur *Ælianus* l. IV. de Anim. c. 31. ut mirari subeat *Plinium* l. d. ejusq; compilatorem *Solinum* Polyh. c. 25. quod biennium Aristoteli affingant. Quamquam verò ex eodem *Aristotele*, temporis hæc controversia exinde oriatur, quod coitum observare facile non sit; *Strabo* tamen l. XV. de India, terminum partus certum definit, nempe cum tardissimè

men-

menſem à conceptu decimum octa-
vum, cum celerrimè ſub ſextum ac
decimum. Quidquid de his illiſve ſit,
qvo minus ego præſtigias hic ſubefſe
credam, illud facit, qvod exemplis re-
pigratio hæc partus non careat, in lo-
co poſtea ſignandis, & Natura præ-
gnantes harum nativitatum rationes
ſubminiſtret. Divinam tamen ali-
quam providentiam acceſſiſſe, non
auſim negare. Nam, ut verè B. *Au-
guſtinus* l. X. de Civ. DEi c. 17: hæc
atq; huiusmodi DEo parva ſunt, ſed
magna terrendis ſalubriter erudien-
diſq; mortalibus. Certe ex qvo pri-
mū Ingera gemellos dicitur concepif-
ſe, nempe ab Anno ſeculi huius 43, ad
exitum anni 61, qvo ultima oſſa ex-
crevit, variam fortunam cum præ-
gnante hac experta eſt Dania univer-
ſa, ut tandem poſt tot rerum viciffitu-
dines jaçtata, prorfus aliam faciem in-
duerit & inſolitam, utinam ad glori-
am DEi, Sereniſſimæ familiæ Regiæ

splendorem, & subjectorum salutem meliore hoc vultu perennet. Ultra non inqviro, sed fata sinam esse in occulto, qvod olim Annibali svasit Spectrum apud *Livium* l. XXI.

CAPUT V.

Cur per orificium uteri ossa gemellorum non prodierint?

Impedita sic gemellis exeundi licentia, dilatoq; parturiendi termino, mors pro vita insequuta est, sepulchrumq; & cunæ uterus fuit, inde putredo & carniū resolutio. Statim enim ac vivere in utero desinit fœtus, qvia propriam vitam ibi vixit, & à matre nulla vitæ subsidia relinquuntur, sed quæ ad vitam antea contulerant, in ejusdem dissolutionem convertuntur, cadaver fit, putrescit, ossibus solis demum relictis. Idem prioribus annis in vicina Scania evenerat Helenæ Mauritiæ, cujus historiam

Cent.

Cent. 1. Hist. Anat. 12. annotavi, nisi quod cutis adhuc ossibus fuerit induc-
ta. Vitulus autem Fridericiburgen-
sis prorsus simile fatum expertus est,
cujus ossa nitidissima in utero vaccæ
reperita, inter Musæi rara servo, ut mi-
rari necesse sit exactum caloris artifi-
cium, in ossibus à carne tam nitidè
mundandis, ut arte manuq; artificis
abrasam carnem; membranas, liga-
menta, in lebecæ excocto jures. Ita
coquuntur ossa in apostemate uteri,
quod hic adfuisse credo, à calore quo
apostema maturescit. Ex retento enim
foetu tumor oritur, & apostema, quod
uteri lateribus tanto tempore anne-
ctitur, donec ad maturitatem calore
perducatur, tumq; absumptis carni-
bus nuda ossa exsiccata relinquantur,
& osseum apostema emergit, quo sup-
purato per proxima loca evacuatur,
nonnunquam per vaginam uteri patu-
lam, nonnunquam per alias partes in
Historia adductas & jam jam exactio-

re diligētia expendendas. Undè tacitè indicavimus, cur tot annorum spiramentis, ossa fœtuum non viam naturalem, sed aliena loca quæsiwerint & perruperint. Novum non est utero destinatas ibidemve contentas res alio avocari. Dubitantibus opponam menses, quos per umbilicum & inguina prodiisse exempla *Zacuti* in Prax. Med. Mir. comprobant, imò per lotium quoque effluxisse, fidem ego facio. Novi uxorem Civis Hafniensis honestam & juvenculam, quæ loco mensium, cruentum lotium statis menstruisque vicissitudinibus mejit, cum iisdem Symptomatibus quæ aliàs solebant mensium eruptiones præcedere, dolore præterea circa vesicam, ut urinam continere sit difficile, quæ incontinentia exacto fluxus menstrui termino desinit. A partus difficultate primum insuetam istam viam observavit, quippe ora venarum in uteri collo occalluerunt, ut jam nequeant refera-

ferari, nam frustula membranacea in difficili prioris anni partu inde abraſa vidi. Forſan etiam à difficili partu in puerpera noſtra conſtrictæ fuerunt naturales viæ. Vel ea parte aliud impedimentum objecit morboſa uteri conſtitutio, qva nonnunquam exituris conceptibus remora injicitur. Sanam prorsus non fuiſſe mulierem, exinde conſtat, qvòd carnes gemellorum apud eam corruptæ fuerint, qvòd variis apoſtematibus hinc inde uterus ſcatere debuerit, qvòd exinde ingentes dolores perpeſſa ſit, qvòd deniq; interea conceperit nunquam, ſed, qvia ſterilis fuit ſeu ætate ſeu alio vitio, obſtetriciam artem in ſe ſuſceperit exercendam. Scilicet ex Socrate apud *Platonem* in Theæteto, nulla ex illis quamdiu concipit paritq; parturientibus opitulatur, ſed cum jam ad fœtum ineptæ ſunt ipſæ. Alias tamen cauſas, ad fidem proniores, afferam, cur oſſa gemellorum ſolitam viam refugerint.

Una penes ipsos gemellos residet, penes uterum altera. Gemelli vel in apostemate versus alias partes conclusi, vel transversim siti per orificium uteri egredi nequiverunt, eundemq; situm etiam ossea compages servavit. Posterius illustrabo *Hippocratis* similitudine l. i. de Morb. Mul. à nucleo deprompta, quem ex vase angusti oris oblique extrahere vel laboriosum, vel impossibile. Occurrit nobis *Felix Platerus*, cujus observationem *C. Bauhinus* recitat in Append. ad Rossetum sect. IV. nosq; eandem ex lib. i. Obs. *Plateri* nuper repetebamus, de fœtu mortuo quatuor mensibus retento *Catharinæ Frechin* uxoris *Sartoris* *Basileensis*, in cujus Cadavere primo ventris intuitu, vesicas geminas lividas in latere umbilici, ubi tumor durus, inæqualis adhuc transversim eminebat,prehendit; quibus levi negotio, cum tenuissimæ essent, disruptis, statim vertebræ ipsius fœtus, una cum
Sca-

Scapulis & costis obviæ erant. Transversim enim collocatus & supinus, dorso inflexo, uti in orbem convolutus jacebat, versus exteriora prominebat. Qui exemptus diductusq; , adeò putris erat, ut præter cutem & ossa, quæ tamen levi negotio dissolvebantur, & quod femella erat, nihil aliàs liceret, vel fœtor immensus sineret cognoscere. Hoc saltem manifestum erat, transversum illius situm, atq; eximiam magnitudinem, quam longitudo illius, & capitis amplitudo prolixis admodum capillis jam ornata, declarabant, impedimento fuisse, quo minus in partu prodire potuerit, sicq; retentum viginti septimanarum spatium computruisse, & simul vicinas partes undiq; infecisse. Ossa nostra & ex gemellis sunt, nisi fallit nos conjectura, & magnitudine conspicua, ut & situ transverso & magnitudine excluderentur. In plerisq; tamen in vtero hoc partu editis, apostemati inclusa fuisse

C 5

fuisse ossa suspicor, ut illo tantum uteri loco elaberentur, quo maturum apostema potuit rumpi. Tunicam quoque suam habuit apostema uteri, qua involutus fuit foetus dum putresceret. At per partes seu sensim tamen prodire officula debuere, quia per partes caro sensim computruit, & ossa separata, & exulceratus uterus cum abdomine foramine non ita amplo universum sceleton excernere nequivit. Utrumque quod dixi, nempe sceleton embryonis tunica sua in utero fuisse involutum, & per partes tamen deinde exclusum, vidit Amplissimus *Tulpius* l. IV. Obs. Med. c. 39. in Margaretha Cornelia, cui datum fuit medicamentum alvum stimulans, cujus beneficio cum exernerentur *plurima membranosa* putridis vermibus similia, decretum fuit eandem viam insistere, reliquamque illius saburræ colluviem exigere; cum per decoctum detergens, ac catharticum, tum per pulverem oculo-

culorum Cancri &c. quorum medicamentorum ope, erupere per alvum pedes embryonis demortui, *membraneo involucro* inclusi, quos manu suâ educturus Chirurgus, extraxit simul inde femora, nates, ventrem, imò quicquid fuit infra lumbos, cum cute, carne, umbilico, ac evidente sexus feminei discrimine. Deinde novis exhibitis pellentibus, excrevit tandem præter plurima purulenta, costæ, brachii, scapularum, spinæ dorsi, occipitis, frontis, ac verticis ossa. Notandum diligenter involucra membranosa hic excreta fuisse & sensim per partes ossa carnemq; putridam, quæ quidem in utero exulcerato adhuc hæsisse donec excernerentur, id indicium est, quod etiam per uterum pus fluxerit, doloresq; veluti parituræ circa pubem & inguinæ aborti, & in uterum injecta sint decocta ex accurato iudicio *Francisci Vicqviij* Medici exercitati. Idem evidentius confirmatur *Ludovici Gu-*

ci Gujoni l. 5. de pulchr. & Sanit. Corp. c. 25. à *Theophilo Raynaudo* c. 13. de Ort. Inf. contr. Nat n. 6. laudati exemplo, qṽi mulierem vidit, qṽæ infantem in utero mortuū, ibiq; longo situ putrefactum, tandem superstes & incolumis eiecit primum quidem carnibus putrefactis aquæ specie emissis cum lotio, deinde verò ossibus sigillatim, per foramen sub umbilico enatum, è quo Naturæ impetu prosiluerunt. In quo exemplo fœtus mortuus remansit in utero, & caro putredine ibidem consumpta per vesicam vicinitatis vitio læsam, cum sero excreta, vel certé ex ipso utero, cujus exitus cum vesica ferè à rerum ignaro vulgo confunditur, ossibus apostemate circa umbilicum aperto exeuntibus. De ligamentis quibus partes invicem in corpore connectuntur, vel heterogeneæ substantiæ, qualis fuerat hic gemellorum tumor, aliis annectuntur, nuperrimè vidi eruditè differentem *Henr. Eyssoni-*

um de Puer. Lapidef. Sect. 3. §. 12, ad quem lectores dubios remitto, ut opera hac supersedere possim. Unum *Tulpium* adhuc consulere placet, qui hujus connexionis exemplum subministrat l. III. Obs. c. 34. Vidit enim in vulvâ mulieris à cancro uterino occisæ, delituisse tumorem, ut lividum ac atrum; sic cruore ac sanie undiquaq; perfusum, adhæsisse verò membraneis suis filamentis tam arctè vulvæ tunicis, ut non potuerit inde eximi sine scalpelli auxilio. Hisce igitur similibusq; vel ligamentis vel tunicis utero affixus fuit tumor noster feminae, quem anomalum rectè vocarim, ut in utero tandiu permanferit, donec facto per abdominis foramina exitu per partes excernerentur. Deniq; etiam uteri ipsius vitio non rejiciuntur per vaginam ossicula, quia à motu expulsivo cessat, qui tum demum fortiter insurgit, quando maturo foetu & vegeto, matreq; sana, utero dolores obori-

oboriuntur, ab umbilico ad inguina, indeq; ad lumborum vertebrae reflexi, de quibus præter alios, legendus *Paraus* l. de Hom. Gen. c. 16. & *Cbr. Guarinonius* Consult. XIV. Pro sententia mea confirmanda illustrem produco locum *Hippocratis* l. de Nat. Puer: Est, inquit, ubi sanguis quinque aut sex mensibus in utero immoratus, ibique putrescens in pus vertitur, quod quibusdam per *pudendum* extra fertur, nonnullis etiam in *ingvine* velut *tuberculum* oboritur, ibique in pus conversum foras prodit.

CAPUT VI.

*Vicinitatis jus in ossium horum
per varias vias exeretione.*

NOTandum igitur ex superioribus, N tumores ruptos per proxima loca expurgari, & ossa quoque per vicinas uteri partes protrudi à Natura, quando via ordinaria deficit. Non hic à
con-

consueto instituto deflectit, jure vicinitatis ubiq; servato. Ita ex tenesmo Attici per lumbos fistula putris erupit, teste *Corn. Nepote* in illius Vita. Ita dentem in Musæo asservo, qui ex suppurata aure profluxit, propter viciniam maxillæ superioris cum osse petroso, mihi è Norvegia missum à Cl. Viro *D. Treublero*, Medico Bergensi. Servant hanc vicinitatem pleraq;, quæ per ignotas Naturæ vias difficilesq; ferri passim in Observationibus Medicorum circumferuntur. Sic calamus ille spicæ cum spica ipsa per virgæ meatum in vesicam intrusus Guadalupæ ab homine cui pascendarum caprarum cura erat, post sesquiannum ex vicini cruris sinistri apostemate extractus fuit, quod divinæ providentiæ adscribit *Franciscus Arceus* l. 2. de Cur. Vuln. c. 4 namq; ita Deum homini consuluisse, ut vesicæ pellis paulatim rumperetur, atq; ex ruptæ spicam ad proximam carnem expelleret;

ret; Deinde rursus vesicæ pellis coiret, atq; caro tumescens maturesceret, & maturo tumore atq; curato spica prodiret, & æger liberaretur. Eadem Deo & Natura jubente acciderunt mulieri nostræ, utero hinc inde exulcerato, & denegata via naturali, per umbilicum & ilia vicinitatis compendio se uterus exoneravit. Nonnunquam carnes putridæ cum ossibus via communi rejiciuntur, nonnunquam tamen diversa, ubiq; servata vicinitate. Ita per viciniam vesicam aliquando in aqueam liquiditatem resoluta caro prodire visa *Gujono* l. 5. de sanit. c. 25. pronuper nominato, & per eandem viam abscessus alii uteri expurgantur. De universo isto vicinitatis negotio *Oribasius* l. IX. Synop. c. 51. sciendum monet, abscessum vulvæ rumpi quandoq; per vulvæ ipsius os, quandoq; per vesicam, ac sæpe etiam in rectum intestinum rumpi. Diversitatem loci, varius apostematis in utero

tero situs efficit, qui vel in superioribus uteri partibus est, tumq; ad umbilicum rumpitur, vel inferioribus, iisq; vel lateralibus in inguinum ruptione, vel posteriorib9, in recti intestini, quod utero adnascitur, apostemate. Tot enim sunt viæ quib9 mortuus fœtus ej9 ve particulæ carneæ & ossæ, via solita obstructâ, excluduntur. Ut conspectior sit effati veritas, singula certis indubitatisq; exemplis aliis demonstra- bo, per authorum nostrorum vestigia iturus, & per partes singulas, quæ vel fœtum vel fœtus particulas præter consuetum modum nascendi, ediderunt.

CAPUT VII.

De Christi nativitate miraculosâ.

NAscuntur autem mortales insolitâ viâ partus vel miraculosè, vel fabulosè, vel naturaliter. Miraculo &

D

cau-

causæ supra naturali adscribenda est
 natiuitas Salvatoris *Christi* sine patrē
 mortali concepti, & clausis virginitā-
 tis claustris ex Virgine editi. Quod
 cum dicimus, non excludimus viam
 naturalem, sed modum plane divi-
 num agnoscimus, quo per angustias
 virginales sine virginitatis læsione
 perrupisse DEi filium sacris libris cre-
 dimus, adeoq; cōtra aliter sentientes
 cum *Montacutio* Apparat. IX. ad Orig.
 Eccles §. 59, profitemur, neq; novum
 illud in terris adeò novum fuisse, si
 non & per omnes nativitatē & con-
 ceptionis partes illa Nativitas descen-
 disset. Virgo concepit, & eadem fi-
 lium peperit *Esa.* V, 14. *Matth.* I, 22.
Luc. I, 26. Planè singularis est hic sen-
 tentia *Jo. Baptiste Mantuani*, qui Tr. de
 Loc. Concept. Christi, ut Virginis hu-
 jus partum excuset, suspicatur potu-
 isse Christum dici natum ex B. Maria
 Virgine, tametsi ex ea aliunde prodi-
 isset quam naturali & communi via.
 Illud

Illud autem *aliunde* non explicat, nec revera potest, tacente scriptura sacra. Quippe viam naturalem hic servandam ex *Luc. II, 23.* constat, ubi vulvæ apertæ mentio fit ex lege veteri de masculis primogenitis, & commate præcedenti purgata dicitur Maria puerpera, more scilicet aliarum puerperarum.

CAPUT VIII.

De Capite Puerpero.

A Capite exorsus, nullam naturalis foetus nativitatem hac parte inaudivi. *Harvejus* quidem de Gen. Animal. conceptus uteri eo modo fieri docet, quo conceptus in cerebro, & uterum pari ratione foetum efformare, quæ cerebrum format species; & genituræ materiam à cerebro præcipue defluere, *Hippocratis* fuit placitum. Capiti quidem suos partus assignat *Petronius*: *neq; concipere aut edere*
D 2 par-

partum mens potest, nisi ingenti literarum flumine inundata; Sed ex cerebro editos veros foetus, hactenus ignoravimus. Fabuloso tamen seculo, Pallas ex cerebro Jovis nata dicitur. Acerrimus morum & religionum Censor Lucianus in Dial: Deor. istud Jovis puerperium false irridet, sed eleganter describit. Vulcanum adesse sibi jussit Jupiter, spe alia prolis cum Junone frustratus, cum securi acutissima, etiam si lapides uno ictu opus esset diffecare, eaq; impacta dividi sibi voluit caput in duas partes. Vulcanus invitus quidem hoc obstetricandi cruentum munus suscepit, ex imperio tamen Jovis calvariam divisit praegnantem, viditq; profilientem armatam puellam vivam saltantem, cum armis tripudiantem, clypeum concutientem, hastam vibrantem, furore concitatam, formosam admodum, & ætate maturam, cujus statim amore captus Vulcanus, hoc sibi obstetricandi præ-

di præmium à Jove petiit. Fabulam hanc antiquissima Patera literis Etruscis insignita depingit accuratè, cujus iconem ex Musæo *Ferdinandi Cospi* Bononiensis mihi transmisit Musarum delictum *Carolus Dati*, pro meo de Puerperio veterum Commentario, ubi nitidè exprimuntur puerperij hujus actiones omnes, Jovis sedentis, Lucinæ Jovem ambabus ulnis amplexantis, Junonis Minervam.è capite puerpero excipientis, Vulcani cum malleo, & alia ad rem nostram Antiquariam spectantia. Quid huic fabulæ occulti sensus subfit, Mythologi docent. Eandem histrioniam exercet etiam nunc orbis, sed infelicius, mutatisq; personis Deos fabulosos exprimit. Neq; enim natam Minervam nostram Vulcanus amico conjugio ambit, sed Mars devorat.

S. Hieronymus l. i. in Jovinian. n. 69. doctissimam Græciam finxisse ait Minervam de Capite Jovis & Liberum

Patrem de femore ejus procreatos. Easdem illas natiuitates Paganis obiecit *Ruffinus* ad III. Art. Symb. ut demonstraret conceptum & editum Christum absq; maris & feminæ copula. Non tamen iccirco credendum S. Patres has narrationes de Ioue Paganorum pro veris habuisse; sed ideò adductæ ab illis sunt, ut ex propriis Paganorum figmentis, quæ historiis veris annumerabantur, conuincerent eos, contra quos disputabant, nempe Christi natiuitatem pro incredibili non esse habendam, quum Minervæ & Liberi natiuitas, sine maris & feminæ congressu natorum, par miculum inuolueret.

Humanæ figuræ quidem etiam in capite observatæ. In Natta quadam capitis Romæ effigiem pueruli vidit D. *Henricus à Moinichen*, Medicus Aulicus, amicus noster & Affinis, de qua in Epistola ad me *Cent. 2. Epist. Med. 98.* dubitat. Credo tamen varias for-
mas

mas hinc inde in tumoribus conspici, quæ casu quodam, sine ullo naturæ consilio aut artificio eveniunt, ideoq; neq; consideratione abditâ indigere, sicut in lapidibus variæ hominis integri vel ejus particularum figuræ exprimuntur, quod in Epistola de Fœtu Mussipontano ad Jo. Dan. Horstium Virum Magnum probavi, de quibus quoq; videndum speculum Lapidum Camilli Leonardi à Petr. Arlensi de Scudalupis editum.

CAPUT IX.

Ex ore Nativitas.

JAM novas fabulas proponi Historiarum Medicarum ignari putabunt. Pro meo tamen calamo intercedo, qui pro veris scripta & edita, pro veris hic repetit, rationemq; Naturæ amicam exponit. Joan. Alphonsus de Fontecha in Lum. 2. fol. 243. ex Bernardino Montanâ; in declaratione Somnij

Marchionis de Mondexâr, quemadmodum testatur *Gaspar à Rejes* Qvæst. XC. Elyf. Camp. §. 16. scribit uxorem cujusdam servi ipsius Marchionis, post convalescentiam gravioris cujusdam morbi, tantam carnis & ossium quantitatem per os deposuisse, ut integram humani fœtus confabricationem æqvarent; & hominis sive fœtus absq; dubio fuisse ait in utero geniti, cum ipsa ante morbum gravida esset, nec per consuetam aut aliam viam conceptum aliàs emiseric. Per quas autem vias ab utero remoto ad os caro & ossa illa ferri potuerint, quia vicinitati hic nullus videtur relictus locus, diversis conjecturis ambigitur. Nolo ego in historiæ veritatem scrupulosius inquirere. Ipse *Montanq*, oculis suis se vidisse testatur, quos ego non ausim damnare. Multa fiunt apud Garamantas & Indos, quæ vera esse possunt, quanquam ego vel alii urbis nostræ incolæ illa non viderimus.

mus. Viæ quidem sunt obscuriores nobis, neutiqvàm Naturæ, cui ubiq; patet corpus. Laudatus *Fontecha* existimat per venas uteri ad venam cavam adscendisse ossa fœtus, inde ad ventriculum descendisse. Naturæ id non repugnare *Rejes* defendit, cum plumbeos globulos, cultellos, ensium frustra, & alia multa per ignotas vias & sibi ipsi solum cognitæ sæpius extra corpus transmississe visum fuerit. Ego vicinitatis jus adhuc tueor, & in prædicto exemplo probabo. Difficilis enim ossium longiorum per angustias venularum transitus, imò periculosus, quia sanguinis cursus interciperetur, palpitaciones orirentur & pulsuum intermissiones. Nec ex reclusionē venarum ventriculi, cruor evomitur narratur. Duplicem autem prægnans uterus & distentus viciniam habet, quæ huic phænomeno illustrando inservit, nempe intestinorum & ventriculi. Illis incumbit gravi-

dus uterus ad latera detrufis, quibus
 idcirco ab exulcerato utero, qua par-
 te vicinitas jubet, perforatis, ossa &
 aliæ putridæ carnes infantis per illo-
 rum cavitatem recta ad ventriculum
 usq; eructantur. Tam quoq; ventri-
 culo vicinus in gravidis est uterus ut
 illum comprimat, cibiq; parsimoni-
 am non rarò imperet, & vicino sua
 contagia de facili imprimat. Forfan
 hac etiam parte erupere fœtus frustra.
 Nausea & vomitus nos eò perducit,
 quem passa est illustris ac honesta mu-
 lier Florentina Magdalena Equitis Ac-
 ciaioli uxor, narrante *Marcello Donato*
 l. IV. Med. Hist. Mirab. c. 22. quæ cum
 per elapsam quinquennium ab acer-
 rimis doloribus universalibus vexata
 fuisset, inscia tamen an tunc temporis
 in utero haberet, mane summo do-
 lore, ingenti nausea, ac tandem vo-
 mitu subortis, impetu maximo, an-
 xietate, ac sudore infantis ossa omnia
 evomuit, ab eadem postea magna cu-
 ra asservata.

De

De infante per os excluso ex *Phil. Salmuth* Cent. III. Obs. Med. 94. repetat historiam, qui volet, ne à me fides actæ rei exigatur. Eam ex literis Joannis Komeleri, in Consulis istius Civitatis Imperialis ædibus degentis, ut oculati & fide digni testis, ad Gothofredum Hoffmannum affinem & Compatrem suum datis, descripsit *Salmuthus*. Si quidem in ventriculo natus hic dicitur & conceptus, cur per os editus sit, scrupulus superest nullus, proxima enim per os via exclusionis patet, quemadmodum aliorum tumorum ventriculi, intus ruptorum. Idem esto judicium de felle, quam gravidam in prædio Fridericiburgensi suos catulos evomuisse, ex fratris amantissimi, nuper defuncti *M. Alberti Bartholini* narratione, testati sumus, Cent. V. Hist. Anat. Rar. 98. Si ibidem quoque concepti fuerunt, qua data porta eruperunt. Sin in utero, vias ante signavimus. *Jo. Christoph.*

Stoph. Eisenmengerus Vir Senio & experientia spectatus in Epist. ad *Jo. Dan. Horstium*, utriusq; amicum, felem hanc, de qua ex fratris relatione scripsi, clam fœtum unum vel alterum per uterum rejecisse consentaneum rationi putat, &, quod facere plura animalia solent, secundinam, cumq; ea fœtum devorasse, post in conspectu hominum vomitu rejecisse. Secundum naturam autem hoc non fuisse factum, subsequenter felis mortem testari posse. Quæ meæ quoq; fuerant suspiciones, firmiterq; illæ animo meo inhæserant antequam nihil tale contigisse prædij Fridericiburgensis domestici asseverarent. Rectè interim monet Vir laudatus, præter naturæ consuetum ordinem id feli accidisse, quæ ea propter insuetæ passionis raritatem morte expiavit.

Mustelam ore parere ex antiquorum traditione refert Aristoteles l. III. de Generat. Anim. c. 6. Fabulis tamen accen-

accenset *Nierenbergius* l. IV. Hist. Nat. c. 5. quem ea propter *Jo. Sperlingius* Zootom. c. 28. n. 3. sequitur, quia nec ventriculus gestationi aptus, nec auris conceptioni. Originem fabulæ ex fabula repetit *Ovidius* l. IX. Metam. fab. 6. Galanthis enim quæ Junone illusa Alcmenam partus cruciatu liberaverat, in mustelæ figuram conversa dicitur, ita ut ore, quo mentita fuerat, pareret. Naturalem verò rationem affert *Aristoteles* l. d. cur ita opinati sint veteres, quia mustela parvos admodum parit, ut & cæteræ fidi pedes, & sæpe catulos suos ore susceptos transfert. Revera enim ore parere non posse evidenti hoc argumento evincit, quia vulvam habere certum sit, more cæterarum quadrupedum, ex qua quonam pacto foetus ad os deveniat, videre se non posse. Sed multa in occulto latent, quæ tamen vera sunt. Quid si mustelæ idem contingat, quod ranis. In his certè, quod nuper.

nuperrimè observavit *Ol. Borrichius*, amicus & Collega, ab utero si infletur, deprehenditur canalis variè intortus ascendere ad usq; fauces. Et mustelam in utero concipere veterum nullus prodidit, verum per aures, quarum cum ore per tubulum commercia Profectores non ignorant. *Ælianus* l. 2. de Anim. c. 55, tradens, mustelas in mari ore parere, & foetum eodem denuo recipere, reddereq; eadem via vivum & incolumem; eludere videtur *Aristotelis* rationem, concedendo ore assumi, & ore prius receptos rejici. Siquidem vermes, ranae, lacerti in ventriculis animalium ex suo quisq; seminio generantur, sicut exemplis certi sumus, cur de mustela vel fele dubitamus? *Ægyptiorum* eam de mustela opinionem fuisse edicit *Magnus Gerard. Jo. Vossius* l. III. Orig. Idol. c. 54. quippe apud quos vixit *Aristeas*, qui L. de LXX. Interpr. p. 45. de mustelis scripsit, auri-
bus

bus concipere, ore autem foetum parere suum, hocq; ideo esse Symbolum eorum, qui auribus percipientes, eaq; sermone exaggerantes, malis alios involvunt: atq; adeo hanc esse causam cur mustelæ esum interdixerit DEUS, cujus tamen prohibitionis aliam ex *Procopio Gazæo* ad Levit. c. XI. rationem adducit idem omni laude dignus *Vossius*, & aliam *VVolfgāngus Frantzius* p. I. de Anim. Sacr. c. 26. De Ibide in Ægypto *Solinus* c. 32, ait; Ore pariunt. *Ammianus Marcellinus* l. 22: aves has per rostra edere foetus accepit. De Corvis quoq; apud *Plinium* l. X, c. 12: ore parere aut coire vulgus arbitrat: ideoq; gravidas, si ederint corvinum ovum, per os partum reddere, atq; in totum difficulter parere, si tecto inferantur. Id *Aristoteles* ibidem apud *Plinium* negat, sed esse tantum illam exosculatorem, quæ sæpe cernitur, qualis in columbis: cui Philosopho injuriam fieri re-

ri rectè demonstrat *Cl. Salmasius* in Exercit. Plinianis, quippe qui de mustela sola tradidit ex Anaxagoræ sententia, ore parere; deinde *Solinum* contra mentem *Aristotelis* & *Plinij*, imò etiam vulgi facere laudatus Polyhistor *Salmasius* ostendit: Nec vulgi quidem sententiam fuisse Ibes ore parere, quod non tacuisset *Strabo*, qui l. XVII. Geogr. mansuetissimam esse Ibim prodidit, & Alexandria nullum non trivium eis plenum fuisse.

CAPUT X.

Fœtus ex umbilico exclusi.

PER umbilicum ex se ruptum, vel Chirurgi manu apertum, subinde quoque retentum fœtum ejusve officula erupisse, haud fallaces historiæ testantur, quas brevi compendio inducam, ut Ingeræ nostræ fides illustrior fiat, quam eadem passam esse, ex Historia C. I, præmissa patet.

Albu-

Albucafes Chirurgus, magni inter Arabes nominis, l. 2. Chirurg. c. 76. vidit mulierem, fœtum mortuum in utero gerentem nihilominus imprægnatam, eundemq; fœtum ex secundo conceptu genitum, mortuum: Huic multo tempore post apostema in umbilico accidisse, & inflatum esse, donec apertum cœpit emittere pus. Vocatus itaq; ad curationem *Albucafes*, diu ejusdem medicationi institit, neq; tamen ad consolidationem ulcus deduci potuit. Itaq; emplastra vehementia attrahentia adhibuit, quorum beneficio paucos post dies ossicula prodierant. Admiratione igitur ductus, quum ventrem ossibus carere sciret, rem diligentius & multifariam expendit,prehenditq; ossicula illa, non nisi ex fœtuum mortuorum cadaveribus provenisse. Causa itaq; morbi certò cognita, medendiq; ratione inventa, ossicula plurima per intervalla ex apostemate eduxit, muliere

E indies-

indies melius habente, quæ postmodum diu adhuc supervixit, ulcere semper non nihil putrilaginis ex sese emittebat. *Matthias Cornax* Romanorum Regis Medicus prolixam, sed certam recitat historiam nostræ ferè similem, quam in pauca contraham. Anno 1545. quædam concivis Viennensis nomine Margarita filia Wolfgangi Karlinger Viennensis, uxor Georgij Wolczeri, postquam etiam ante enixa esset aliquot liberos, concepit anno ætatis 25; omnia deniq; habuit signa felicitis imprægnationis, foetum insuper temporis progressu sensit ante festum D. Bartholomæi eodem anno valentem & strenuè sese moventem, usq; ad festum D. Luciae Sacrum, quo sanè illi tempore supervenerunt partus dolores adeò vehementes, ut antea experta jam sæpius ipsa, jam jam se crederet enixuram. Statim igitur advocata Matre, Sorore & obstetrice, omnibus nisibus elaboravit ad pariendum; in
qvi-

qvibus vehementibus conatibus, fragor quidam increpuit satis sonorus. Ab eo fragore vivacitas fœtus deprehendi amplius nullis argumentis potuit, nihilq; effectum tum datum est, gestansq; uterum mulier tandem per multas septimanas gravissimè decubuit, ventris tumore, duritie, fluxu qvi supervenerat, doloribus nihilo remittentibus. Hoc inevitabili onere summè implicita mulier per quadriennium usq; ad annum Domini 1549. semiviva perduravit. Interea insuper afflicta est defluxu continuo putrilaginoso, qvi per locum muliebrem erumpens, totum hoc quadrienne tempus duravit. Cruciatibus igitur hisce ac gravedinibus diu perstantibus, tandem Natura acore & copia putridi humoris compulsa, ad umbilicum, matricem ipsam, totum deniq; abdomen, multis alioqvin partibus munitum perfodit. Foramen factum est primo anno Domini 1548, ex

quo multum faniosi, foetidiq; mucoris profluxit. Post aliquot menses, adhibitis emplastris apertio coaluit, sed paulo post anno Dn. 1549. mense Jun. natura eodem consilio & via, proximo in loco, non ita procul à priore apertione distante, per ventrem iterum perrupit, & assatim eduxit purulentiam. In hoc foraminulo exhibebatur omnium conspectui & tactui os quoddam, quod resecta alvo & matrice eventus comprobavit infantis fibulam sinistri brachij fuisse. Duravit iterum hæc apertio eodem statu & effluxu cum magna feminae virium prostratione ad menses aliquot. Cum periculi magnitudo indies ingravesceret, vocati sunt Chirurgi tres Wirt, Dirlevvang, Winckler, & Medici duo, Joannes Enzianer, & Matthias Cornax, à quibus decretum est, de alvo aperienda. Statuta tandem dies est decima mensis Novembris 1549, hora 12. pomeridiana. Linea sectionis ducta est

est ab apertione inchoata paulo supra umbilicum, recta deorsum per tractum musculi recti abdominis, longitudine plus minus octo Unciarum. Qua facta incisione subito contentum in utero à Chirurgo undiq; liberatum est, & exemptus frustulatim fœtus masculus emortuus & semiputridus. Secutus est hanc extractionem fœtor incredibilis, adeò enim putredo invaluerat, ut bona pars membrorum pueri consumpta appareret, caput verò totum confractum, & ossa cranij dispersa extraherentur. Absoluta hac sectione, mulier feliciter curata est. Eandem historiam fusius repetunt *Marcellus Donatus* l. IV. Hist. Med. Mir. c. 22. *Baubinus* in Append. ad Rossetum, *Schenckius* l. IV. Obs. Med. & *Hildanus* in Resp. ad Döringium, datâ occasione Matronæ cujusdam Burgundæ, cui Anno 1609. fœtus putridus per umbilicum excisus fuit operâ *Joannis Marchandeti* Chirurgi Salinensis,

Vincentius Alfarius Crucius Cent. 2.
de Qvæf. per Epist. p. 169, suam huc
Symbolam confert; nam dum esset
Venetiis, convocarunt eum alii Me-
dici ad Xenodochium S. S. Joannis &
Pauli, ubi jacebat mulier, cui foetus
in utero ex casu ab alto mortuus jam
& putrefactus erat, cujus expulsionem
natura quoq; voverum aggressa, circa
umbilicum tumor extuberari visus
dicitur, ut Chirurghi de abscessu sub
rectis abdominis musculis latitante
vererentur, & post qvædam topica e-
molliendi & maturandi vi prædita,
tumens locus dum ferro aperitur, post
sanguinolentam & putridam materi-
am, ossicula qvædam prodire visa,
qvæ dubiam rem propalabant; ex-
tracto maxima cum omnium ad-
miratione ab ea parte foetu jam pri-
dem emortuo, & purulento, uteroq;
ipso rursus ad unitatem redacto, &
muliere non valde post inde incolumi
egressa.

Illu-

Illustre est exemplum, quod memoriae posterorum reliquit *Franciscus Rossetus* de Part. Cæsar. Sect. IV. c. 5. hist. 5: In suburbiis Sullianis ad Ligurim Margarita Prevost, Petri Doreti molitoris uxor, cum certo gravida esset, & tamen tempore partus eniti non posset, quomodocunq; à mulieribus ipsi succurreretur, sensim in gravissimum incidit morbum, ut tandem venter adeò extenderetur propter foetum & ipsius tunicas putrescentes, ita ut præter totius abdominis tumorem, octavo, nonove mense circa regionem umbilici peculiaris tumor, valdè elatus, obortus sit, similis abscessui molli rubro, ut jam ad apertionem maturus videretur. Quare abscessus hic anno 1550. die Nativitatis Christi ab Iterio Galmeto ejus loci Chirurgo, cauterio actuali apertus fuit, qui puris incredibilem quantitatem scutellis exemit: altera verò die, cum vulneris rationem esset

habiturus, qualisnam essent pili, qui circa vulnus conspiciebantur, inquirere voluit, quare foetus caput jam putrescens esse reperit, quod tum per vulnus dilatatum extraxit, cum reliqua cadaveris parte, femineum sexum referente, attamen brevi temporis spatio convaluit. In hoc exemplo manus artificis naturæ defectum supplevit, viamq; à natura monstratam patefecit. Ex utero verò ad umbilicum matris patere subinde transitum, ut intra nativitatis nostræ terminos me contineam testimonio *Hollerij* l. i. de Morb. Intern. firmatur, qui refert mulierem quandam Lutetiæ cum utero gestaret, foetum diebus quindecim antequam in lucem ederetur, brachium per umbilicum matris extensum habuisse, & tamen nihilominus ipsam una cum foetu superstitem remansisse. Huc spectat & illa Historia, quam ex D. *Bunoto* Medico Illustrissimæ Principissæ Borboniæ *Rossetus*

tus Hist. VI. rescivit. Fuisse nempe Eerjæ in Picardia juvenecam ægrotam, pallidam, prostratis viribus, tumen-tem, tantisq; doloribus divexatam, ut nec quis morbus esset, nosceretur, nec spes ulla salutis superesset. Obste-trices autem Principis laudatæ jussu, rem uti se habebat, patefecisse; ni-mirum ægrotam, quæ virgo censeba-tur, foetum adultum & à longo tem-pore mortuum & putridum utero ge-
stare, ita ut ossa utero perforato, ad
latus umbilici conspicerentur: ex
qvo loco ipsam Principem ossa ali-
quot extrahi & copiosissimum pus fœ-
tidum emanans vidisse. Vesiculâ in
latere umbilici alibi enata, eaq; per-
tusa & perrupta cum pure ossa, car-
nesq; putridas infantum expulit. Vi-
dendæ historiæ passim obviæ, inpri-
mis Concubinæ sacerdotis cujusdam
apud *Platerum* l. I. Obs. de Part. defect.
aliæq; apud *Baubinum* in App. ad Ross.
hist. VI. & VII. *Lud. Gujonum* l. V. de
Pulchr. & San. corp. c. 25. CA.

CAPUT XI.

Embryones ex Tuba Uteri erumpentes, ubi & de Fœtu Mussipontano disferitur.

EMBryones ex Tubis uteri in cavitatem abdominis exire, suspicio mihi prima orta ex fœtu Mussipontano, qui extra uterum intestinis & omento incumbens fertur repertus, utero prorsus integro, nulloq; cicatricis vestigio superstite. Nam quia, præter uterum consuetum, nonnunquam etiam Tubæ Uteri fœtus humanos concipiant, quod variis exemplis alibi probavi, in primis testimonio Jo. Riolani l. 2. Anthropol. c. 35. quatuor fœtum ex tubis uteri exsectorum; probabile inde mihi visum fuit, si quidem uteri ruptura nusquam comparuit, Tubas uteri conceptum fœtum, maturum jam & loci angustia laborantem, vi naturæ & fœtus ruptas, in abdomen vicinum eructasse, quam conjecturam prolixa Epistola

stola exposui ad Virum amicitia intima & eruditione mihi æstimandum *Jo. Dan. Horstium*, in quam sententiam quoque venit Vir Clarissimus *Antonius Deusingius* in erudita Consideratione hujus argumenti. De uteri rupturâ facilior esset consensus, si ejusdem læsi cicatrix ulla fuisset relicta. Careret tum res difficultate omni, quia præeuntes habemus eos, quibus tutò fidimus. Primus est *Hildanus*, alter *Faussius*, uterque probatæ in arte nostra fidei, ne alios ad hanc paginam advocem similium observatores. *Hildanus*, sicut refert *Cent. I. Obs. Chir. 64.* anno 1593. 21. Aprilis, Coloniae præsentibus Clarissimis & Doctiss. *Johanne Slotano & Henrico Palantio* M. DD. dissecuit aurificis uxorem, habitantem in platea quæ appellatur larda, ex parta mortuam. Comperta est matrix, erumpente infante lacerata, ejusque caput in lævam ventris capacitatem demissum, in utero extan-

extante solo lævo brachio, quod propendebat. Notandum verò ad confirmationem illorum quæ supra de causis impediti partus diximus, ex relatione obstetricis & aliarum matronarum quæ in parturientis agone adfuerant, angustissimi oris matricem feminae illius fuisse, ut magnus foetus, quanquam robustus, per viam angustam erumpere non potuerit.

Jo. Cass. Fausius in Epist. ad *Cl. Strausium*, magno judicio & Coi gravitate negat rarum esse rupto utero foetum in ventris spacium illabi. Præter alia enim exempla biennium esse, ex quo Mulier valens & vegeta, quatuor ante partum septimanis, prona & in genua cadens, sonum quendam in ventre, tanquam crepaturam audiverit, statimq; reliquo gestationis tempore solito tristior, ponderosior & pallidior fuerit. Comedisse tamen, dormivisse, cæteraq; sanorum hominum munia obiisse, de pondere potius inter-

ter-

terdum quam de dolore ventris con-
 questam. Præfixo partus tempore,
 dolores sensisse, sed frustra, ac tandem
 eâ extinctâ & apertâ absolutissimum
 fœtum in sanguine materno in medio
 abdomine natasse, nullâ putredine in-
 fectum aut fœtore gravem: Sangvi-
 nem quoq; rubentem non grumosum
 aut cadaverosum, verum in longas
 quasdam strias aut lacinias concre-
 re incepisse. Uteri disrupti corpus
 duos transversos digitos crassum hia-
 tu pulchrè pomum granatum, ut de-
 pingi solet, repræsentasse. Epitaphi-
 um huic suæ vicinæ scripsit laudatus
Faussius, in quo ingeniosa hæc verba
 leguntur: *III. septimanarum spacio vi-
 va mortem circumtulit, eandemq; sibi &
 fœtui masculo (quem non reclusa matrice
 in hunc mundum, sed eadem disrupta in
 se ipsam edidit) innocens peperit die 26.
 Apr. 1657.* Addo his tertium, pari fi-
 de & fama, *Veslingium*, qui Syntag. A-
 nat. c. 7. concedit ex uteri ruptura fœ-
 tum

tum nunc caput , nunc pedes manus-
ve, qva data via est, in abdomen exfe-
rere, nunc toto corpore maternis in-
testinis incumbere. Plura alia testi-
monia uteri rupti suppeditant passim
confulti authores , ab hoc loco alie-
na , qvum rupturæ nullum in utero
indiciu cicatrix reliquerit Mussi-
pontanæ , & diu superstes vixisse nar-
retur. Eadem ratione inductus, nun-
quam credidi Ingeræ gemellos ute-
rum perrupisse, anteqvam per lentam
apostematis viam , exulcerato utero,
per proximas partes elaberentur ex
corpore.

Ut de Fœtu Mussipontano quid
sentiam curiosis pateat , subjungam
Epistolam meam ad celeberrimum
Jo. Dan. Horstium scriptam, cujus nu-
per mentio facta :

Commodè per tabellarium allatæ
literæ tuæ molestias solantur & Ca-
sum stupendum *De Fœtu extra uterum
mulieris Muscipontanæ in abdomine re-
tento,*

tento, tandemque lapidescente proponunt expendendum. Multum tibi, Vir Magne, debeo quod Rararum Observationum particeps reddar, plus tamen, quod meo aliquid tribuas iudicio. Digna profecto est Historia, cui aliquot horæ impendantur, & ægrè ferro, quod aliis distractus accurata lance singula in præsentī non possim expendere. Neque tamen ulterius amicum responsum differam, ne vel in officio segnitiei vel in iudicando tarditatem incuses, quum moræ culpam luere debeat tabellarius, qui IX. Sept. 1660. exaratas tuas literas, heri primum Cal. Novembr. ad manus meas detulerit. Quidquid sit, quicquid in mentem venerit de inaudito ferè casu, paucis aperiam, ut tibi, cui nihil denego, morem geram. Principio de Historiæ veritate constare debet, quam suspectam non pauca reddunt, nisi aliis fide dignis evincatur testibus. Temerè monstrosis Observationibus, quæ vim
con-

consuetæ naturæ inferunt, non credimus, quia sæpe nos otiosa ingenia & faceta deludunt, nonnunquam & lucrispe multa finguntur, quæ nusquam neque picta fuerunt, neque scripta, non rarò quoque inventis & visis aliquid sive ex ingenio additur, sive ex ignorantia. Author Historiæ tacetur, cujus authoritati plurimum tribuimus, & idonei deficiunt testes. Si Medicorum Almæ Universitatis Pontimussanæ narrationem, & ipsius Decani Domini Pillement, per amicum procuraveris, de rei veritate securiores reddemur. Interim ex usu fuisset, si mulieris istius sexagenariæ condiciones accuratius expressisset Historia. Quot nempe liberos in conjugio olim peperisset, & qua facilitate, quibusve symptomatis. An conjuge orbata integræ semper fuerit famæ. Quando mensium fluxus substituerit. An vivente marito gravidam se putaverit senseritque, an eo defuncto gestationis hujus

hujus dolores inusitados sit experta. In foetus quoque Historia desideramus diligentio rem manuum pedumque descriptionem, ossium, umbilici faciem &c. Non assequor symptomatum, de quibus mulier apud Medicos dicitur conqvesta, rationes. Ex ponderoso onere & permolesto, tribus infra umbilicum digitis, injussæ alvi dejectiones, & invitus plerumque urinæ fluxus, imò & ipsius ani procidentia sequuta memoratur. Certè contraria his debuissent accidentia succedere. A mole enim compressum intestinum rectum, sistit alvum, & quanquam in prægnantibus compressa vesica ad frequentio rem excretionem sollicitetur, tamen est invita. Post partum sæpe ani procidentiam observamus, sed in prægnantibus foetus grandior si non possit intestinum loco suo movere, & pellere, quæ causa fingi potest, cur moles hæc & pondere minor & magnitudine alvum protruserit. Qua

parte abdominis hæserit foetus, non satis exprimitur. Si tribus infra umbilicum digitis situs erat, parvo intervallo distabat ab utero, quod monendum fuerat, ut consensus cum utero clarius innotesceret, & reliqua ad uterum spectantia & conceptionem designarentur. Vincula quibus moles hæc pendula aligabatur, ex lateribus peritonæi feruntur orta, sed an nervosa fuerint, vel carnosa, vel denique venosa, non addit, an cum uteri lateribus commercium habuerint. Membra ipsa foetus nullis intervallis distincta asseruntur, & ita cum reliquo corpore coaluisse, ut inspicientium aciem oculosque propemodum subterfugerint. An id vi lapidificæ tribuendum, quum formatrix non sit culpanda. Mirum autem mihi videtur, quomodo in lapideam duritiem dicatur conversus foetus, & tamen dissectoribus patuerit cerebri apertio, & viscerum mediis infimique ventris inspectio.

Præ-

Præterea tam accuratè cerebri substantiam & tunicas sector cum corde &c. separavit, ut etiam tenellum uterum pro sexus argumento extraxerit: integer tamen adhuc servatur in Authoris pharmacopœa domestica: Eximendi nobis sunt hi scrupuli prius, quam narratis plenam fidem mutuemur. Si producti fuissent testes, pro vera hypothese acciperem. Jam liberè dubitamus, quia ex incerto auctore, fama fit incerta & dubia fides: Quamquam pronuper Parisiis scripserit Illustris Comes Digbæus, se fœtum illum vidisse, tamen ansa dubitandi relinquitur, quia fœtum ex abdomine exsectum ipse Comes suis oculis non vidit, plenum alioqui tanto Viro consensum deberemus. Cur sex lustris majorem molem non produxerit Natura nunquam ociosa, dictu difficile, quum elephas citius increascit, & arcanas lactearum vias agnoscat Author ad latentis fœtus nutritionem,

Vel enim perfectum fœtum molitur Natura, vel si impar sit, ad putredinem devolvit. Sed putredinem salinus spiritus arcuit, quo lapideum corpus emerfit, quod in Lithopœdio Senonensi vidimus. In Augusto Serenissimi Regis nostri musæo, Lithopædium illud contrectantes, nullam interiorum fabricam potuimus scrutari, quia saxeæ soliditate universum corpus infantile induruerat. Mirum dictum, quod in fœtu Mussipontano lapideæ partes externæ fuerint, & tamen internæ cultro Anatomico patuerint. Obtusius mihi ingenium est, quam ut ista capiam, nisi clarius mentem suam aperiant, qui præsentés fuerunt Medici vel Chirurgi periti, qui sciunt quid distent æra lupinis. Alii enim spectatores ex rerum imperitia subinde Naturæ addunt fingunt quæ & in vulgus disseminant, quæ à Natura prorsus sunt aliena, cujus hisce diebus in urbe nostra habuimus exemplum.

Uxor

Uxor civis Hafniensis primarii prolem feliciter enititur, & lochia copiosius profluxere ad diem quartum decimum, quo horrore corripitur puerpera & novis parturientium doloribus. Accersitur denuò obstetrix, & ad novum partum, seu super foetationem, omnes attonitæ mulieres præsentēs excipiendam accinguntur. Mox ingentibus conatibus excluduntur molæ duæ, quibus dissectis vestigia duorum foetuum comparent & mulieribus imponunt, quæ per urbem universam eliminant duos foetus suis involucris contentos, esse editos. Forte advocatus aderat *D. Paulus Mosh*, Regius Archiater, amicus noster integerrimus, qui exclusas molas curiosius examinans, sparsam famam emendavit, viditque non foetum ullum involvi, sed in mola nervosas fibrillas, in molis aliàs usitatas, speciem quandam embryonis mentiri & ignaris credulisque mulieribus

imposuisse. Ita vulgi rumorem cor-
rexit periti Viri & in hisce sacris ver-
sati observatio. Non negamus dari
superfoetationes, quarum exempla sup-
peditavit *Bauhinus* Append. 6. ad Ros-
set. nec in patria defunt. Nobilis enim
Matrona plusculis abhinc annis post
primum partum masculæ prolis, quar-
ta hebdomade alterum enitebatur vi-
talem, & utrumque diu fatis supersti-
tem, uno eodemque nomine insigni-
tum. * Molas interjectis aliquot die-
bus partum verum subsequutas, ipse
vidi. At hic iudicio non vulgi stan-
dum, non muliercularum, sed Medici
in artis operibus exercitati & veri Na-
turæ interpretis. Hinc mentem me-
am subiit cogitatio, foetum Mussipon-
tanum specie sui quadam spectatori-
bus imposuisse, nisi aliter à Medicis
præsentibus fuero edoctus. Tumoris
anomali species esse potuit, humanæ
persimilis. Istorum tumorum tanta
est varietas, ut illis enumerandis ne

Seve-

Severinus ipse in præclaro Opere sufferit. *Ætas* mulieris si consideretur, annum sexagesimum prætervecta, si cælebs tot annorum vita expendatur, certè conceptui erit inidonea, sed apta tumoribus ob menstrui fluxus defectum & senilis colluviei collectionem. Ipse locus accommodus excipiendis ad abscessus anomalos impuritatibus. Ex Historica relatione hæc moles adacto omentum usq; scalpello emerfit in sentina corporis. In omenti glandulis sæpissimè tumores invenimus. Magnum omenti tumorem scirrhum describit Joh. Huld. Streiterus Epist. ad GREG. HORSTIUM, Magnum Tuum progenitorem Sect. II. pag. 453. Ego nuperis annis curationi Nobilissimæ Matronæ viduæ sexagenariæ Hydropicæ interfui, cujus abdomen tandem medicamentorum ope subsedit, sed remanente tumore quodam, ovi anserini magnitudine, duriusculo, quomodo in dextro hypochondrio modò.

sinistro tangebatur pro vario ægræ situ, quem existimavi non vanâ conjecturâ in glandula omenti residere ex reliquiis morbi magno nobilis ægræ commodo. Tumorum varia est & forma & materia. Sunt quippe sanguinei, carnei, adiposi, pilosi, verminosi, lapidosi, ossei, pro varia contentorum ratione. In figura tanta nascitur differentia, ut rudem fœtus imaginem exprimi & à vulgo æstimari, mirum non sit. Corporis humani partes passim in lapidibus, plantis, conchyliis à Natura effinguntur, in nonnullis totus homo. Mandragoræ radix homunculum refert, sicut dissecta filicis radix aquilam. Juglans cerebri humani gyros, membranas, ventriculos exprimit, quod etiam nux moschata obscurius imitatur. Testiculi in satyrione repræsentantur, pulmones in pulmonaria, renes in asaro. Vidi filices in externam hominis figuram quasi arte tornatos. Hominem siliceum mammas

mas tenus in Musæo suo habuit beatus noster *Wormius*, descripsitque in Hist. Nat. l. 1. Sect. 2. cap. 13. exactè referentem caput, collum, humeros, pectoris summa, oculos & nasi protuberantiam, scapulas ac colli musculos. Referente *G. Agricola* l. 7. Nat. Fossil. cap. 5. Constantinopoli in Sapientiæ Templo, sunt duæ candidi marmoris dissecti crustæ, quarum utriusque maculæ, nonnihil cinerei coloris, ita sponte naturæ discurrent, ut totam D. Johannis Baptistæ, vestiti tergoe cameli, imaginem repræsentent. In Misnia Monachi faciem habitumque in lapide repertum ferunt, quum Lutherus reformandæ Ecclesiæ incumberet, sicut in aliis haleces, & in meo serpens visitur. Ad partes si descendamus, eæ passim in lapidibus à Natura exsculptæ sunt. Cor enim aliqui referunt, alii renes, lienem, linguam, pedes. Scribit *Baptista Fulg.* lib. Collect. c. de gemm. & Lapid. na-

tur. sculptis, quod in agro Placentino suo tempore lapis Alabastrites inventus sit, in quo figura apparuit capitis humani mortui, quem hoc nomine laudat *Cbassaneus* Cat. Glor. Mund. part. 12. Conf. 91. *Plinio* si credimus l. 37. c. 10. Diphris, sive Diphyes, ut legunt *Gesnerus* & *Agricola* genitale utriusque sexus monstrat. Priapolithos prope urbem Castrensem repperit *P. Borellus* Cent. 3. Obs. 85. Quid de tuo Hysterolitho dicam, quem tuo beneficio apud Magnum nostrum *VVormium* olim vidi, describuntque *Boethius* de Gemm. & Lap. c. 225. *Gesnerus*; *Agricola*, de Laet l. 2. de Gemm. cap. 15. & figuram *Beslerus* in Gazophylacio Rer. Nat. addit, sed accuratius *VVormius* l. 1. Mus. Sect. 2. cap. 13. tuo ipsius dono. Muliebri pudendum exactè monstrat, sicut & concharum quædam genera, passim obvia. Ea ratione etiam in tumoribus anomalis corporis nostri variæ figuræ possunt imprimi
ad hu-

ad humanam similitudinem. Caput infantile, oculis, naso, & ore distinctum propendens puellæ nostræ tumor æmula specie referebat, cujus historiam Cent. i. Hist. 6. signavimus. Steatomata varia ex morbidis extraximus, variâ figurâ. Carcinomata quoque inæquali protuberantia diversam faciem ostendunt, præsertim exulcerata. Extirpavimus anno superiori ex abdomine feminæ honestæ carcinoma, capiti infantis hæud ab simile. Nolo tamen has suspiciones tibi, inclyte Horsti, pro veris commendare. Documento tantum sint, temere non esse recipienda, quæ sine idoneis testibus inter vulgus sparguntur, quum multa sint, quæ similitudine & specie humanâ prima fronte mortales deludant. Indicta hæc volo, si vera narraverit fama, si verum factum exsectum fuisse vel Tu, in his lynceus, vel fide dignus alius persvaserit.

Cre-

Credamus interea Historiam veram esse, ne nobis indignetur Enarrator, & quia externæ & internæ foetus partes ordine suo recensentur, ponamus istam suppositionem, ut ad veram causam investigandam accingamur. Ex Historica narratione moles cui foetus includebatur inter peritonæum & intestina tenuia in infimo hypogastrio reperta est pendula, quatuor firmissimis vinculis ex peritonæo ortis suspensa, quinto verò tenacius intestinis tenuioribus, quibus incumbit, annexa, adeò ut extra uterum prorsus alieno loco fuerit collocata, & uterus ipse matris illæsus intactusque dicitur, nullo obductæ cicatricis vestigio. Uteri verò vicarias operas supplevit ipsius molis involucrum durissimum, quod bubuli ventriculi tunicas colore referebat & crassitie. Hinc tres oriuntur difficultates enodandæ, tuoque iudicio limato submittendæ. Prima, An extra uterum con-

live-

fvetum conceptio fieri possit & fœtus
 conformatio. Deinde; quia sine semi-
 ne virili nusquam fit conceptus, ubi-
 cunque denique fiat, quia via ad va-
 cuum ventris pervenerit. Denique
 quo artificio se per sex lustra in novo
 hoc utero sine putredine conservave-
 rit, & sine ulteriore sui augmento.
 Primum quod spectat, quanquam ad
 communem generationis normam
 uterus sit necessarius, tamen & illius
 vices aliæ partes supplent, quæ vel ca-
 vitate idonea, vel sufficiente calore
 præditæ sunt. Uterus ordinaria Natu-
 ræ lege huic officio destinatur, ob
 commoditatem & seminis recipiendi
 & fœtus nutriendi & excludendi, non
 quod aliis partibus ea vis denegetur,
 si tam commodo essent loco sitæ. U-
 terus præter calorem foventem & lo-
 cum aptum ad generationem nihil
 confert, sicut nec ovi testa ad pulli
 conformationem. Semini vis forma-
 trix inest, quæ externo quocunque ca-
 lore

lore adjuvanda est, & commodo munienda receptaculo. Cartesiani solo calore id fieri credunt, quo seminis particulæ agitatae ob suas figuras necessario in germen animalis abeunt, eo modo quo ex oblongis salis particulis in aqua vi caloris agitatae & inter se conjunctis variae salium, stirpiumque imagines efformantur, quemadmodum commentatur *Henr. Regius* Fundam. Phys. cap. 10. Igitur alius quicumque locus capax & calore tepens, ad foetus conformationem aptus esse potest, quanquam non ad exclusionem, unde ita ordinaria naturæ voluntate statutum est, ut eo plerumque loco concipiatur foetus quo commode non solum conformatur, sed & excluditur. Certè si penitus naturam inspiciamus; omnes particulæ corporis nostri in se habent generationis principium & locum, & in se generant quotidie, ut meritò olim quis dubitaverit idemne esset adultus, qui puer fuerat.

fuerat. Apud *Salmuthum* Cent. 3. Obj. 94. ex nefando & igne expiando congressu juvencula famina per os infantem enitebatur, sine dubio in ventriculo conceptum & efformatum, sed quia diu moram ibi trahere non potuit, ob ventriculi motum & assumptorum impedimenta, digiti longitudinem non excessit infans, & maximis doloribus, summoque vitæ periculo partus fuit. Hujus quidem Historiæ veritatem impugnat *Ludovicus Keplerus*, Vir Doctissimus & meliore fortuna dignus, in dissertatione de Basilisco, quam præseus mihi nuper in transcurso ostendit. Sed testatur *Salmuth*, se ex literis Joannis Komeleri, in Consulibus illius civitatis, ubi hæc acta, ædibus tum degentis, ut oculati & fide digni testis, ad Gothofredum Hoffmannum affinem & Compatrem suum datis, hæc descripsisse. Pro nutritione & augmento exili, vasa ventriculi sufficiebant, vel ipse vicinus chy-

chylus. Nec novum est in ventriculo, quancquam continuo assumptorum motu abluatur, tamen & apostemata, tumores &c. coacervari, suisque pelliculis includi. Tophi cortice duro sed substantia pilosa in animalibus conflantur, & diu in ventriculo asservantur, de quorum generatione erudite nuper scripsit in *Ægagropilis Georg. Hier. Velschius*. De Bezoar *Baubini* diligentiam jam dudum orbis suscepit. Ex bovino ventriculo tophum mali granati magnitudine possideo. In Islandici arietis ventriculo 50. hujusmodi reperti, ovo columbino æquales, quorum aliquot in Pinacotheca servo. Folliculos vermium ibidem observavi in bobus, porcis &c. Nec ab similia in homine notata *Qvercetano* in demonstr. Hermet. Med. cap. 5. J. Jac. *Crafftio* ad Hild. Cent. 2. Obs. 71. *Panarolo* Cent. 1. Obs. 41. Calculos plures quam 30. fundo ventriculi pertinacissimè adhaerentes extraxit *Job. Bilge*.

Bilgerus in Epist. ad Clarissimum Tu-
um *Parentem* Sect. II. pag. 456. Et ego
silices & benè multos & satis grandes
ex ventriculo agni exemptos habeo.
Igitur alienas res sibi concreditas &
ventriculus custodit, & vel suis tuni-
cis claudit, vel propria cujusque rei
membrana involvit. Tophis seu pi-
lorum fasciculis crustam duram ob-
ducit. Cur semen æqvè hic atqve in
utero non exstrueret sibi domicilium
seu secundas membranas? In brutis
nescio an hujus extet exemplum. Fra-
ter tamen meus amantissimus *M. Al-
bertus Bartholinus* non ita pridem mi-
hi narravit de fele quadam, quæ in
prædio Arcis Regiæ Fridericiburgen-
sis suos foetus exomuit, summâ adstan-
tium admiratione, qui sanctè affirma-
runt, felem nihil prius devorasse, nec
alia via rejecisse. In intestinis ova
concipi & exinde excludi, extra du-
bium est, siquidem vera sunt, quæ de
ovis galli multorum experientiâ & fi-

de referuntur. Ego propius ad uterū devolvor regionem, in cujus vicinia foetus Mussipontanus inventus. Extra hunc uterum aliās, sed vicino loco, nempe in Vasis spermaticis juxta fundum molam genitam vidit *Marqvardus* in *Empir. Pract.* In Tuba uteri, cujus eadem ferè cum utero substantia, concipitur foetus. Quatuor exempla recitat *Riolanus* l. 2. *Anthrop. cap. 35.* fœtum ex tubis uteri exsectorum, digna quæ pro foetu Mussipontano adducantur tanquam verissima, tot Medicorum & Chirurgorum Gallorum testimoniis probata, de quibus neminem dubitare vult *Riolanus* Veteranus Anatomicus, & tardæ aliās fidei. Semen autem virile existimat per anfractuosos vasorum ductus tubam intrasse. *Vesalio* l. 5. *Fabric. Hum. cap. 15.* tenuior est uteri tunica quæ in cornua sua desinit. Certè in tubis uteri semen masculinum quotidiè recipi vero mihi sit simile, ibique præparari, unde

unde fit, ut primo mense in utero, ex observatione *Harvei*, nihil compareat, quum revera ad conceptionem concurrat, nec prorsus statim evanescat in auras, sed ad tempus ibi delitescat, ut cum femineo misceatur uniaturque. Hinc quando regressus denegatur quacunqve obstructionis causa, in Tubis hisce mole dilatatis fit conceptus, sed quia in tantam capacitatem ampliari non possunt suâ naturâ teretes & angustæ, nisi rarò naturæ robore, quod de hydropica narrat *Tulpius* l. 4. Obs. cap: 44. vel exiles foetus generantur & imperfecti, vel incredibilibus doloribus ex membranarum distensione matri mors infertur, vel si mater ferendo est, ruptis cornuum tunicis ampliorem locum in cavitate abdominis foetus eligunt. Habes, mi HORSTI, meam conjecturam, ut constet quomodo foetus ille inter peritonæum & intestina pervenerit. Quamquam enim semini masculino ille insit

fervor, ut vaporum specie spiritus quocunque feratur; tamen quia nulla tum foret ratio cur non in capite quoque & corde verus fieret conceptus, malo manifestis viis & certâ conjecturâ probatis insistere. Credo igitur ex semine conceptum fuisse in Tuba Uteri foetum Mussipontanum, eumque grandiore perrupisse canalem angustum & in proximam abdominis cavitatem projectum. Ut id firmitus concedamus, uterus intercedit, qui prorsus dicitur intactus sine ullo cicatricis vestigio. At ruptura tubæ adverti forsan potuisset, si eo dissectoris curiositas descendisset, vel certè cicatricis manifestum vestigium. Molitur subinde alium huicque haud absimilem ex utero exitum Natura, ut mirum nullum sit, si ex angustis Tubarum carceribus se extricare conetur foetus. *Hildanus* Cent. 1. Obs. 64. dissecuit aurificis uxorem, in qua matrix, erumpente infante lacerata,

rata, ejusque caput in lævam ventris capacitatem demissum. Ex hac uteri mixtura fœtum nunc caput, nunc pedes manusque, quæ data via est, in abdomen exferere, nunc toto corpore maternis intestinis incumbere, concedit *Veslingius* Synt. Anat. cap. 7. Interdum foras per apostema prorumpunt ossæ particulæ, ex umbilico, quod vidit *Albucasis* l. 2. Chir. cap. 76. *Marcellus Donatus* l. 4 Hist. Med. Mir. cap. 22. ex ano, teste *Marsilio Cagnato* l. 4. Var. Observ. cap. 9. *Jo. Langio*, Lib. 2. Epist. Med. 39. Itaque quum ex tubis evasisset fœtus Mussipontanus, suo adhuc involucro tutus & tectus, ad proximam intestinorum regionem alligatus est ea vi quæ atheromata, steatomata &c. partibus sæpe affiguntur. Majus v. misera Mater pondus sensisset, si ad justum incrementum pervenisset, jam enim magnis doloribus vel per apostema viam sibi præparasset, vel cum matre fuisset,

set suffocatus. At v. siue nutrimenti defectu sufficientis per lactearum inopiam & obstructionem, siue loci penuria compressus ad magnitudinem consuetam debitamque non pervenit. Quod putredinem evaserit, salinis spiritibus imputandum, quibus induruit & siccato corpore incorruptum perstitit. Nolo causas petrificationis retexere, quas dato studio pertexuerunt qui in Lithopædio describendo desudarunt, laudati nobis Cent. 2. Hist. 100. Nec opus noctuas Athenas, aut apud Te de his prolixius nugari. Calculos non tantum in quavis corporis parte generari plures demonstrarunt, inprimis *M. Donatus* l. 4. cap. 30. & plures tales vidimus, etiam ex corde Cervi Norvvegici extractus nuper lapis ponderosior in Musæo Augusti Regis nostri suspenditur: Sed quod mirabilius ipsæ partes in Saxum conversæ leguntur, nonnunquam tota compages. De his alibi actum. Unum præ-

præterrire non possum, de quo sententiam tuam exquiro. Nuperis annis ex Svecia nobis relatum fuit, bovis cerebrum universum in lapidem mutatum esse, quod illo mactato demum deprehensum, quum antea pronò semper & inclinato capite in pascuis vix ossibus hærens ægrè progredetur. Dubitavi exinde, quæ via spiritibus patuerit commeatus. At nuper quum ex obsessâ urbe nostra benevolè in castra Svecica essem invitatus ab Illustrissimis Legatis & Senatoribus Dn. Schiringo Rosenhân & Dn. Stenone Bielche magnis Literatorum fautoribus, comperi à laudatis Viris rem, prout narrata fuerat, veram esse, servarique adhuc cranium cum incluso cerebro lapideo in prædio quodam Oxenstierniano, ad spirituum verò liberum transitum relicta videri hinc inde foraminula excavata, quæ per stramen immixtos liqvores & flatus transmittant, utque magis & crede-

rem quæ dicebantur à fide dignissimis, & diligentius in inusitata rei causam inquirerem, promisit mihi Illustris Bieleckius vel iconem accuratam vel particulam cerebri faxei: Ubi promissis steterit magnus Heros, faciam ut & Tu hujus beneficii fias particeps. Interea hæc apud Te rumina, Vir Eruditissime, & Epistolæ præter spem prolixæ ignosce. Currenti calamo, etiam maximè occupato, semper aliquid offertur, ut vix sisti possit aut retardari. Facit naturæ fecunditas, & Tui amor, ut ad lancem verba non expendantur. De re insolita quid dici possit, quidque mihi videatur, Tibi roganti amice & candide exposui, cui plura debere velim. Et nisi jam aliis negotiis avocarer, pluribus testarer, quanto obsequio & officio Tibi amicissimo sim obstrictus. Vale, Vir Magne, & in Literariæ Reip. commodum & splendorem diu vive, nostri memor, & si tempora tua permisc-

miserint, Spicilegium secundum vasorum nostrorum Lymphaticorum, quod mitto veloci oculo tuo sed benevolo percurrere. Scripsi necessaria celeritate. Hafniæ, 2. Nov. 1660.

CAPUT XII.

Ex hypochondriis fœtum nunquam exire.

Perrupto itaq; utero, non in abdomine subsistit semper partus, sed hypochondria penetrans exitum quærit. Vel arte vel natura hanc sibi pandit viam. Illud in sectione Cæsarea; hoc in uteri apostematibus ad ventrem externum suppuratis. Sectioni Cæsareæ nihil operæ infumam, quia cunctorum desiderio ex asse satisfecerunt *Franciscus Rossetus*, & *Theophilus Raynaudus*, omnibusq; dubiis & difficultatibus solutis præclaram servandi infantes artem vindicarunt, quam, præter infinitos alios, laudat *Scipio*

Mercurius, & quotquot humanæ salutis benè cupiunt. Frequens ea operatio apud Gallos arte & ingenio, & manu promptos. Memini Parisiis cum degerem feminam terq; quaterq; feliciter sectione Cæsarea partus suos enixam, quæ via naturali parere nunquam potuit. Miror patriæ nostræ aversum ab hac sectione animum. quo multi pereunt, qui servari possent. Nuper admodum Fridericiburgi ultimo mense gravida ab alio juvene jugulata interiit, embryone adhuc post mortem matris se movente, qui tamen auxiliaribus Chirurgi secantis manibus destitutus diu supervivere in utero non potuit, atq; ita periit qui servari potuisset, & ex simplici homicidio duplex factum, cuius culpâ illi viderint ad quos hæc negotia spectant. Silentio præterire hic nequeo, quamquam silentio dignum, facinus horrendum carnificis Roëschildensis, qui nuperis annis Holbecæ, quæ urbs quoq;

quoq; Selandiæ est, Copriani uxorem gemellos utero gestantem occidit, quæ sub patibulo à cohorte noctivago quum humaretur, canes accurrentes ex alvo putrida singuli suum foetum extraxerunt, & ore hinc inde circumtulerunt, spectaculo horribili, cujus facinoris jam, dum hæc perituris chartis illino, pœnas luet carnifex incarceratus. Misera fuit & altera natiuitas sectioni Cæsareæ similis, pueruli Belgici à tauro ruffo procurata, quam *Cent. 2. Hist. Anat. 8.* inferui. Facilior omninò hic nascendi modus periti Chirurgi manu administratus, qui nostras feminas terret, sectionis istius ignaras, minori; dolori junctus, quum citius levi vulnere abdomen aperiat, quam naturales partes dilacerentur. Neq; uteri crassities ingrauidis scrupulum injicere debet, quæ tanta non est illa parte externa infra umbilicum, ubi sectio fit, imò ultimis mensibus ibi tam tenuis est uterus il-

liq;

liq; circumtensæ abdominis partes ,
ut moventium embryonis digitorum
vestigia manifesté & visu & tactu non
raró discernantur. Decantatam illam
uteri in gravidis crassitiem placenta
conficit uterina, qvibus locis superius
& posterius utero adnascitur.

Naturæ suppurantis robore ex fo-
raminibvs in hypochondrio fœtus os-
sicula expressit Ingera nostra , cujus
causa de his nobis suscepta scribendi
cura. Vix ovum ovo similis, qvam
est huic nostræ altera ab *Alexandro Be-
nedicto* Veronense Medico l. XXV. c.
33. his verbis annotata: Mirum obi-
ter naturæ exemplum referam, cujus-
dam Venetæ matronæ, qvæ cum par-
tum legitimum exclusisset, alter in-
clusus intra ventrem mansit mortuus,
qvi in magnis puerperæ difficultati-
bus tabefactus , fluore qvodam pro-
fluit, ex naturalibus oris ; demum or-
tis in ventre, tribus fistulis , ex una ,
qvæ omnium maxima erat , integra
infan-

infantis calvaria extracta est, cunctis mirantibus: Deinde singulis diebus reliqua ossa desumpta sunt. Unde mirabili naturæ ope sanitati restituta est. Quæ porro ad has vias pertinent, priora exempla, pariterq; ea quæ sequuntur, illustrant.

CAPUT XIII.

Ex illis apertis nati.

Ilia quoq; in muliere nostra pro os-
siculis gemellorum patuerunt. Ne
via ista pro inaudita traducatur, alios
testes citabo. Non ita pridem mihi
narrabat obstetrix nostra Elisabetha
Johannæa, ætate provecta & supra de-
cies mille puerperiis probata, adtuiffe
se puerperæ Hafniensi, præsentem Me-
dico in arte nostrâ magni usus D. Jo-
achimo Schelio, Poliatro Hafniensi quæ
diu in partu vexata & exercita, eniti
tamen foetum nequivit antea in utero
extinctum; tandem in magno illo
natu-

naturæ & puerperæ conatu, ruptum esse inguen sinistrum, exq; eo prodisse foetus particulam sed osseam, reliquisq; partibus per consuetam Naturæ vim effluentibus, puerperamq; exinde convaluisse, matrem postea plurimorum Liberorum. Ad externa si divertamur, voto nostro & instituto inserviet *Achilles P. Gassarus* Medicus in historia ad *D. Matthiam Cornacem* missa, ex comitatu Feldkirchiensi, quam ex eo contractis in paucas lineas periodis mutuabor. Muliercula quædam cui à mariti familia *Pflegerin* cognomen erat, in pago *Getzig* tum habitans, verè imprægnata, instante tandem partus tempore præsentibus & agnatis & obstetrice per aliquot horas debito modo exagitata est. Cum autem in cassum diutius laborare videretur, nimis laboribus, non solum foetus, illis insciis, suffocaretur, sed & Mater de vita periclitaretur, tanquam desperata relinquebatur, gallinarum juscu-

jusculis per intervalla refocillata. Sic misera illa per reliquum puerperii spatium curata, paulatim dolores remittere, menstruorum tamen fluxum perseverare sensit, qui deinde cessavit, doloresq; magna ex parte evanuerunt, ut decrecente insuper nonnihil uteri mole, cuncta illa sibi prospera ad integrum fere annum repromiserit. Quo tamen non plenè evolutò, tumor quidam particularum in sinistra inferioris ventris parte, paulo supra ingvina apparere de novo cœpit: qui dum quotidie augeri, & demum etiam dolorem apostematolum, cum cutis livore super inducere pergeret, ibi mulier Chirurgi Magistri Nicolai Clæsi, civis Feldkirchiensis auxilium primum invocavit. Is abscissum illud jam ad humani capitis magnitudinem excrecentem, detumefacta alvo, novacula decussatim discidit, quo facto tanta foetidissimæ virulentia copia effluxisse fertur, ut præsentium nullus

nullus sufferret. Chirurgus ulcus sordidissimum mundificare & abstergere, quousque intra pauculos dies semiputrida quoque ac corrosa ossicula una eum pure exire cœperunt: Tandem erumpentibus integris tibiæ ossibus, posterioribusque calvariæ fragmentis, manifesto deprehensum fuit, ea ipsa reliquias esse fœtus illius, quem mulier ante annum peperisse debebat. Ulcere mundificato, per se ad consolidationem properavit, muliere omninò persanata. Idem Achilles ad *Joannem Langium* quoque Lib. 2. Epist. Med. 39. eadem de conterranea sua in Goettzin testatur, quum diu fœtum mortuum in utero gestasset, tandem hunc marcidum per apostema in iliis suppuratione apertum, frustillatim ejecisse. Huc referenda illa Virgo, de qua *S. Hieronymus* L. 1. in Jovinian. n. 69. è cujus latere Budda Princeps dogmatis Gymnosophistarum generatus dicitur, cujus opinionis autoritas apud

pud Indiæ Gymnosophistas quasi per
 manus tradebatur. E latere perfosso
 id factum retur *Raynaudus* c. i. de Part.
 Cæs. cujus tamen nullam esse apud
 seculi Sapientes mentionem, multò
 minus fidem: Certè non vulnere,
 sed ulcere in latere matris facto edi-
 tum fuisse Buddam, fide carere non
 potest, si quidem vera sunt quæ in eam
 sententiam hic urgemus, & *B. Hiero-
 nymus* pro vera historia contra Paga-
 nos resumit, ne absolum credant ex
 Virgine natum Messiam, quia incredi-
 bilem Buddæ nativitatem ipsi Indi ad-
 miserunt. Nisi miraculi inde fides
 imminuatur, quod vivus & integer ex
 latere matris emerferit.

CAPUT XIV.

Ex ano infantes exclusi.

Pudet me æstimantem quam sit for-
 dida animalium superbissimi inter
 sterora sedes nativa, ut, quando mol-
 H lissi-

lissimè habitat, inter infimi ventris fordes collocetur. Coalescit recto intestino uterus, & invicem non rarò aperiuntur, ut inter se excrementa sua communicent. Sic recto intestino ex corrupti uteri contactu perforato, alvi fæces per pudenda mulieris excreta observavit *Dodoneus* ad C. XI. Benivenii, quemadmodum & ego in pago mille passus ab urbe nostra distante, ex Scroto rustici similia excrementa vidi rejecta. Monuerat hoc ante *Oribasius* l. IX. Synops. c. 51. & clarius *Fernelius* l. VI. Pathol. c. 15. interdum in directum intestinum penetrare abscessum, tumq; fæcis nonnihil ex uteri cervice profluere. Nonnunquam prorsus rupto interstitio unus fit metus, quod in difficili partu alibi notavimus, & nuper in violenta extractione fœtus mortui in platea Boreali puerperæ contigit. Sic apostemate uteri gravidæ ad intestinum rectum rupto, vel fœtus vel fœtus particulæ egredi possi-

di possunt. Digna hujus rei historia extat apud *Jo. Langium* Lib. 2. Epist. Med. 39, de civis ex oppido Eberbach Andreæ Seidlen uxore, quæ foetum viventem aliquot menses in utero gesta-
 verat, & quum jam tempus enixus ap-
 peteret, ubera prius turgida lactis a-
 quosi rore maduerant ac detumue-
 rant, puero in utero non subsiliente.
 Tandem foetum asserit in matrice
 computruisse, cujus de cruribus & ce-
 rebello ossa denigrata & carie obsita,
 quum mulier ob intestini exulcerati-
 onem alvi profluvio laboraret, anno
 decimo non per vulvæ ostiola, sed per
 anum, esse excreta. Aliud ejusdem
 generis exemplum, quod Romæ con-
 tigit Anno Domini M D LXXI. sub-
 ministrat *Marsilius Cagnatus* l. IV. Obs.
 Var. c. 9. à se adhuc tyrone & præci-
 puis aliquot urbis Medicis visum.
 Scilicet plebeja diu quædam ægrota-
 verat femina febre hectica perpetua
 ac debili, duroq; imi ventris tumore.

Unde ille esset tumor non facilè inveniebatur, quando eam utero gerere nihil amplius svadebat. Desperata res dicebatur. Tamen sic insperanti salus advenit, postquam via, qua venter dejicitur, foetus humani carnes in frusta divisæ, & ossa separata, quæ tumoris illius materies fuit, sponte naturæ exiverunt. Sepulchrum diu fuisse foetui defuncto uterum, eleganter subnectit *Cagnatus*, priusquam nasceretur, nec potuisse cadaver rejici qua naturaliter debebat; aliam vel cum periculo viam esse à naturâ electam: Utero verò hunc in modum purgato, mulierem pristinae valetudini restitutam diu vixisse. Audiamus *Amatum Lusitanum* Cent. 2. Curat. 10. & eadem repetentem *Marcellum Donatum*: Paul-
la uxor Dominici Nasonis, qui in vi-
co Pontis Merlani hospitium exercet,
cum 5. mensium foetum mortuum di-
utius in utero gestasset profluente
quotidie ex utero colluvie quadam
sanio-

saniosa non sine febre, indiesq; corpore marcescente extenuatiss. habitu jam affecta per secessum excernere coepit officula quædam quæ in exitu dolorem inferentia ab ipsa deprehensa, ac stercore emundata Hippolyto Geniforto Chirurgo adservata ostendit, qui ea intuitus puelluli officula esse deprehendit, quod mihi aliisq; Medicis compluribus relatum, haud verum ipse censui, donec mulier ipsa interrogata præsens diligentissimè id jurejurando affirmasset, in medium allatis officulis pluribus, quæ roseis foliis permixta ad stercoreis foetorem, quem præ se ferebant adhuc, tollendum observabat, nec destitit ab hujusmodi excretionem per menses & annos, donec permulta officula hujus generis extramisit. *Baldvinus Ronssseus* Epist. Medicinal. I. ad Carolum Gouvinum de Maria muliere Goudana, filia Gulielmi de Vrie, scribit partus tempore prætermisso, revoluta jam

anno, unà cum lotio primùm digitorum articulos excrevisse; ac sensim alia majora ossa, tibiam, radium, costas, & id genus alia per posticum cum excrementis emisisse; tandemq; secundo à parturitione anno, maximos ante perpeffam labores, calvariam totam cum cubito, costis, & aliis aliquot ossibus, ejecisse. Quod cum lotio dicitur profluxisse, non ex vesica sed ipso utero repetendum, quas vias confundunt qui accuratè singula distinguere nesciunt, unde nec ex vesica nativitatem ullius advocavi, quia quæ per lotium narrantur emanasse, de utero verius ego interpretor, ejusq; orificio, cui vesicæ exitus vicinus est. *Rossetus* sect. IV. de Part. Cæs. c. 2. hist. 1. & hist. 5. Cornac. bina exempla prodidit matricis ulceratæ pertusæq; versus intestina, cum excretionem ossium infantilium, quas ex illo repetat, cui volupe. Nos enim ex angulo hoc immundo manum subducere festinamus.

Præte-

Præterire tamen non possum *Horatium Augenium*, magnæ inter Medicos authoritatis, qui sine tædio Lectorem detinere potest, etiam festinantem. Digna est historia ejus repetita scriptione, quam contexuit l. 2. de Part. Hom. c. 27. vel eo nomine quod ἀνέπληγς in dissecto cadavere observaverit ipsum partis vitium. Do, Hieronymus Bisaccionus Patricius Æsinas uxorem duxit Ferrariæ Anno 1571. Hanc ille post mensem compressit. Tum decimo incipiente doloribus partus advenientibus, & aqua plurimum fluente delusæ fuerunt obstetrices, ac matronæ: Dolores illico cessarunt ventre adhuc tumido manente, atq; ipsa magnam gravitatem sentiente. Nullum remedium tentatum non fuit à Medicis Ferrariensibus, ut foetum educerent sive vivum sive mortuum. Tandem cum in casum laborassent, & pondus utero incumberet, movereturq; ad corporis

H 4

motum,

motum, anno prætorito, putarunt unanimi consensu mulierem pati molam: Pro qua educenda remedia nihil profecerunt. Sic misera annis duobus eum gestavit uterum. Ejus Vir duxit ex voto conjugem ad Sacram ædem D. Virginis Lauretanæ, ac in patriam reversus vocat ad Consultationem Medicos: quo tempore levi febre & continua tenebatur cum eisdem circa uterum Symptomatis. Hæsitabamus omnes, ac post discursus multos in eam sententiã venimus, tumorem adesse in utero præter naturam, vel scirrhosum, vel œdematosum, aut molam: Dum ita ambigimus, solo victu accommodato contenti, mulieri fluor alvi supervenit foetidissimus, erant excrementa flava ac ut plurimum alba & livida, & copiosa, singula quaq; hora decies ferè egerebat. En mirum dictu, nondum visum, nondum imaginatum, cum ipsis excrementis duæ effluunt costæ parvæ.

parvæ. Quæ indicabant nobis ob parvitatem esse costas pueri in utero existentis. Rursus sequenti die duas alias emisit, & expiravit. Exenterato cadavere inventus est uterus putrefactus, quæ parte rectum intestinum tangit, hoc ipsum totum corruptum; inventus est fœtus sine involucribus, sine secundis, cujus caput non aderat, hoc putabamus ex putredine dissolutum: erant integra reliqua costis quatuor exceptis, atq; visceribus, quæ putredine tabuerant. Sceleton adhuc servat Petrus Antonius Sacchimanus. Aliud exemplum embryonis frustulatim per alvum excreti, posteritati haud invidit *Franciscus Vicqubius* Amstelodamensis Medicus, interprete *Nicolao Tulpio* l. IV. Obs. Med. c. 39. quod ex illis relegat curiosus Lector. Cui simile, nisi idem sit, describit *Henr. Roonbusius* Obs. Med. Belgic. part. I. Obs. I. de uteri Rupt. p. 25.

CAPUT XV.

De Dionysii nativitate ex femore Jovis.

ALia corporis loca non occurrunt, per quæ ex utero foetus edi possunt, nisi ad fabulosum ævum revertamur. Jupiter enim totus & ab omni parte corporis prægnans fuit, ut loquitur *Lucianus* in Dial. Deor. & præter Minervam, de qua nos in loco, etiam Dionysium Semeles foetum ex femore suo, quod ideò magnum vocat *Theocritus* Idyl. 26. partu doloroso edidit, quam narrationem prolixius persequitur *Gyraldus* Hist. Deor. Syntagm. VII. Huic partui quid subsit, alii scrutentur, & an ex vera historia traductus, nam quæ de Jove antiquitas finxit, ex veris profluxerunt. *Lactantii* hoc est judicium L. i. de Fals. Relig. c. ii. non res ipsas gestas finxisse Poëtas, sed rebus gestis addidisse quendam colorem: cum officium Poëtæ in eo sit, ut ea, quæ verè gesta sunt, in ali-

in alias species obliquis figurationibus cum decore aliquo conversa traducat. Jovis cujusdam Regis Cretici spurius fuit Dionysius, quod fusius *Julius Firmicus Maternus*. l. de Err. Prof. Relig. aperit. Magnus *Daniel Heinsius* Exercit. Sacr. in cap. i. Nonn. femur hic de pudenda parte Viri accipit, idq; ex voce נֶכֶד probat, quam de femore Hellenistæ interpretantur *Genes.* XLVI. 26. *Exod.* I. 5. *Uti prodire è femore alicujus*, sit filium alicujus esse, aut ex eo genitum. Quod quamquam commune sit cæteris; tamen judicio *Multiscij Vosii* l. i. Idolol. Orig. c. 19. singulari ratione hoc Dionysio competebat, quatenus in eo spectamus Noachum, qui semel natus, more omnium hominum, postea quasi renatus, cum in arca à Deo fuit conservatus. Quidquid de tantorum Virorum sententia in venerandæ antiquitatis excusationem statuendum Eruditi judicent, mihi certum est mysticum

sticum & moralem huic narrationi inesse sensum. Quemadmodum enim dignior Pallas ex cerebro, ita Dionysius ex femore Jovis natus fingitur, ut aliorum seculorum Joves damnentur, qui femori Minervam, Dionysium nullo suo merito, inferunt cerebro, præferuntq; lævum numen Artium præsidii.

CAPUT XVI.

De Fœtu prægnante.

Missus querelis ad mulierem nostram revocamur, cujus hætenus breviter historiam illustravimus, oppidò raram, sed non inauditam. Merito inter raros Naturæ casus numeramus, quia rarò has vias Naturæ eligit, aut moram istam patienter perfert. Non tamen exemplis caret, quod per partes ordine hætenus monstravimus. Multa eveniunt passim, quæ negliguntur, quia ad Medicos harumq;

rumq; rerum gnaros non perveniunt. Supprimuntur enim plerumq; ab Obstetricibus, & ab ipsis Puerperis, ne fabula vulgi fiant. Id evenit forsan Johannæ uxori Nicolai Petri, quæ embryonem prægnantem enixa est in Fionia nostra, de qua verè dici potest, quod de Psyche *Apulejus* l. V. *Met. hic adhuc infantilis uterus gestat nobis infantem alium.* Hujus historiam ex Obstetricis Siseliæ relatione *Cent. VI. Hist. 100.* consignavimus. At quum ex Clementissimo Reg. Maj. mandato dicta Johanna à Præfectis de partu suo interrogaretur, ea quæ obstetrix & palpaverat & viderat, strenuè negavit, sive ea ipsa non fuerit, de qua obstetrix narraverat, sive metu territa, ne famam aut fortunas suas ea confessione prostitueret, quod inaudita passa esset, quasi illa misella Naturæ ludentis culpam præstare deberet, ignara edicti *Ulpiani* l. 4. ad leg. Jul. & Papiam, quod extat *ff. de Verb. signif.*

§. 135.

§. 135: neq; id quod fataliter accessit, matri damnum injungere debere. Hac timida vel verecunda taciturnitate, multa Naturæ secreta, fiunt secretiora & occultantur, quæ interesset Reip. literariæ, si remoto velo innotescerent. Ita his diebus mulier civis Hafniensis ovum peperit, quod, ne à pluribus videretur, statim manu prehensum confregit & abjecit, ipso marito confitente. Sub hoc silentio multa monstra sepeliuntur, ranæ aliaq; miranda non semel à mulieribus edita, occultantur.

De embryone prægnante quid sentiam, in Historia nominata aperui, & adhuc in ea sum sententia. *Theophrastus* ursinas carnes asservatas accrescere perhibuit, quod & si videret *Verderius*, nescit tamen an possit sibi persuadere, *Cens. in Auth. p. 144.* Quid de hoc portento dicturus esset, si adhuc inter vivos mereretur, nescire non possum. Quod si fides obstetrici ha-

ci habenda, de cujus fide cur dubitem, prægnautes causas habeo nullas, quanquam à me ipso difficile impetrem assensum; tamen conabor inauditum antea in humano genere partum aliis similibus vel illustrare vel confirmare. Ovum alio ovo prægnaans in Technicotheca sua Augusta Serenissimus Rex noster mihi clementissimè monstravit. Nec dubium quin similia frequentius occurrant quoque in aliis animantium generibus. *Jo. Euseb. Nierenbergius* l. VI. Hist. Nat. c. 2. scribit de Eqva in Hispaniâ, peperisse mulam aliâ mulâ gravidam. Certè salaces sunt eqvæ Hispanicæ, & sicut ferunt, decimo postquam natæ sunt mense concipiunt, & geminos sæpe uno partu ejiciunt. *Torgvenada* Dial. 8. apud *Gass. à Rejes* Q. 36. n. 28, eqvam peperisse mulam mortuam confirmat, in cujus alvo apertâ alia mula inventa est. Qvis horum prior, ignoro, & an de eadem mula sermo illis

illis sit. Nam gravidam dicit *Nierenbergius*, at locum non determinat, quem per alvum exprimit *Torqvemada*, nec tempus aut locus hujus egregii partus annotatur. *Jul. Obsequens* de Prodig. Coss. C. Valer. M. Herenn. vituli maris meminit, cui cum exta demerentur, gemini vitelli in alvo ejus inventi. Alvum hic *il corpo* vertit Interpres Italus *Damian. Maraffi*. Et simile est quod refert *Jo. Langius* Epist. LXX. in Cervi masculi alvo, cum evisceraretur, hinnulum repertum fuisse. Scilicet in alvo à prima nativitate hæserant vitelli & hinnulus, patrisq; sui fratres dici possunt, simul geniti, id quod de foetus prægnantis foetu *Cent. 6. Hist. 100.* suspicatus sum, gemellas enim hic molitam esse Naturam, sed errore quodam unam in alterius alvum inductâ cuticulâ detrusam. Ratione loci quidem posterior, filia alterius dici potest, quia in utero quasi matris conclusa fuit, sed
ratio-

ratione generationis ab eadem patris virtute, appellandæ Sorores. Mures in alvo matris prægnantes esse veterum traditione fertur. *Ælianus* l. XVII. c. 17: Si mus prægnans capta dissece-
tur, & eximatur foetus, in eo quoq; dissecto foetus reperietur alter. Ad Persicas mures restringit *Plinius* l. X. c. 65: apud Persas prægnantes & in utero parentis repertas; & salis gustatu fieri prægnantes opinantur. Editio *Parmensis* vett: prægnantes in utero Venerem patientis parentis repertas. Codex *Cliffletianus*; in prægnantis ventre parientis. Ante *Plinium* eadem tradit *Aristoteles* l. VI. Hist. Animal. c. 37. fecunditatis musculorum causam assignans: Quodam loco Persicæ terræ dissectis è matris utero foetibus, feminæi sexus quasi prægnantes videntur. *Scaliger* Illustris notat Φάινεται, videri, non esse, & quasi additum, modestiamq; Philosophi eo nomine laudat, sed *Gazam* perstringit, qui τὸ οἶον

omisit. De musculis prorsus eadem repetit *Vottonus* l. V. de Diff. Anim. c. 87. sed innominato authore, qui mos illius & multorum est aliorum. Veterum hanc de murium generatione sententiam defendit magnus *Aristotelis* patronus *Fortunius Licetus*, ejusq; duplicem rationem prodidit l. 3. de spont. Viv. Ort. c. 50; alteram quidem esse generationem non spontaneam, quia viventis muris anima in utero matris materie viscidæ in suo uterulo degentis animam sibi similem generet, ac indat, eo modo quo in piscium genere passeret, rubelliones, & hiatulæ apud Aristotelem, sine usu maris omnes feminæ ex se pariunt, intra se quum genuerint ova prolifica: qui modus generationis communis sit etiam stirpibus, in quibus non inest sexuum distinctio: alteram verò eorundem murium generationem Spontaneam esse, quia in uterulis fætuum muris rescissæ prægnan-

gnantium materia contineatur, sive à parentum sive à fœtuum corpore illuc effluxa; in qua, velut in vase, portio sentientis animæ pristini viventis deliteſcat: Cui materiei ab ambientis calore ubi per coctionem dispositiones ad vitam congruentes advenerint; statim animam illam sibi componere in formam essentialem novi muris constitutricem. *Gassp. à Rejes Qvæst.* 36. n. 31. omnem harum generationem æquivocam esse statuit, nec specie cum aliis sed similitudine tantum convenire, à materiæ dispositione ab universali causa formata & animata, prout materiæ dispositio formam postulabat, quam dispositionem sicut in terra, ita in utero, & etiam in aliquibus humani corporis partibus, & contentis ibidem humoribus dari posse, non dubium esse credit. Quam tamen æquivocam generationem *Sennertus* operoso studio evertit.

Quid de humano genere dici possit,

fit, in præfenti non addo. Clariffimus Vir *Antonius Deusingius*, in Fœt. Muf. Secundin. feft. 6. qvem commodè videram anteqvam hæc in publicum emitterentur, de fœtus imprægnati & à me defcripti miraculo, ita ftatuit: Apparere faltem (fuppolita hiftoriæ veritate) feminis alicujus mafculini corpulentia ad conftituendum conceptum nequaquam effe opus; fed virtutem illius feu efficaciam fufficere, femineo femini communicatam: Fieri ergo poffe, ut virtus à paterno femine communicata ipfi femini Matris, unde embryo primum conftituebatur, ita efficax fuerit, ut fucco alicui feminali Embryonis, ad hujusce uterum confluenti, (ut frequens eft, fœtus femineos recens natos fluxum album pati, feu q. feminalis alicujus materiæ ad uterum confluxum, atq; ex utero effluxum,) efficaciam addiderit, quâ ad fermentationem, feu fpiritus ac naturæ, quæ in femine infunt exufci-

exuscitationem, potuerit concitari. Sed ego malo *ἐπέχειν*, ut ad utiliora progrediar.

De muribus prægnantibus quæ sit sententia celeberrimi apud Batavos Philosophi, *Arnoldi Senguerdij*, ex literis patet, quas ad me non ita pridem amice exaratas, hic publicè legendas addam.

Petis opinionem meam de imprægnatione murium, quæ tempore partus dari, asseritur. Mihi hæcenus ea fabulosa videtur. Varios quidem qui ejus meminerunt, legi; neminem tamen, qui eam certo docuerit. Existimo, quæ autores de illa scribunt, petita esse ex Aristotele, illud, ut putant, asseverante, *lib. 6. Histor. Animal. cap. 37.* Hoc ut pateat, conferam Aristotelis textum cum verbis eorum: Deinde inquiram in verum loci illius sensum & mentem Philosophi. Hic, per interpretem Theodorum Gazam, ita loquitur: *Terre Persicæ parte qua-*

dam mure fœmina rescissa ; fœtus fœmini
 nini pręgnantes comperiuntur. Sunt qvi
 vehementer confirment, mures, si salem
 lambant, impleri sine coitu. Notum est,
 Ælium & Plinium multa ex Aristotele
 defumisse quę spectant animalia,
 uti etiam eos plures narrare fabulas.
 Plinius aliquoties erravit ex lingvę
 Gręcę imperitiā ; unde factum, ut,
 Aristotele non bene intellecto, quan-
 doque ornato stylo proponat, quę ve-
 ritati non pari modo consentiunt.
 Hoc de Gręco scriptore Æliano dici
 non potest, qvi, nimis sæpe credulus
 vel minus attentus, fallitur & fallit.
 Eos in hoc negotio Aristotelem secu-
 tos esse, dictorum affinitas monstrat.
Ælianus lib. 17. de Animal. cap. 17. Lati-
 na indutus veste, sic scribit : *Si mus*
pręgnans capta diffecetur, & eximatur
fœtus, in eo quoque dissecto fœtus reperie-
tur alter. Plinium quod attinet, ille
Histor. Natur. lib. 10. cap. 65. de muribus
 ita loquitur : *generatia eorum lamben-*
do con-

do constare, non coitu, dicitur: ex una genitos CXX. tradiderunt: (quod etiam apud Aristotelem legitur) apud Persas vero pregnantēs & in utero parentis repertas. Et salis gustatu fieri pregnantēs opinantur. Hos sequuntur recentiores, secure obdormientes, tuti. Antiquorum, præsertim Aristotelis, autoritate. Edoardus KVottonus de Different. Anim. lib. 5. cap. 87 hæc habet: Terræ Persicæ parte quâdam mure fœmina rescissa, fœtus fœminini pregnantēs comperiri traduntur. Sunt qui vehementer confirment, mures si salem lambant, impleri sine coitu. Neque ulteriorem veritatis indagationem persequitur. Fortun. Licetus lib. 3. de Spontan. Vivent. Ortu, ita inquit, sponte nasci animalia ex animalibus viventibus in eadem specie ab Aristotele didicimus, qui aperte alicubi scribit, Terræ Persicæ parte quâdam mure femina rescissa, fœtus feminini pregnantēs comperiuntur. Sunt qui vehementer confirment, mures, si salem

lambant, impleri sine coitu. Similia occurrunt apud Ulyss. Aldrovand. de Quadrup. digit. vivip. lib. 2. cap. 30. his verbis: Veruntamen absque salis usu murium fecunditatem debemus admirari. Cum scribat Aristoteles mure fœmina pregnante in vase milliario quandoque occupata, paulo post aperto vase, mures viginti & centum repertos fuisse. Præterquam quod in fœmina gravida dissecta fœtus fœminini prægnantes observati sunt. Eadem ex Aristotele, absque ulteriore inquisitione refert Matth. in lib. 1. Dioscor. cap. 63. Plures adducere, quibus ostendatur, ultimam resolutionem hujus persuasionis in solum Aristotelem fieri, supervacuum puto. Perpendamus jam, an ex illo textu Aristotelis, tam firma facti de quo agitur, probatio peti queat? Si, misso interprete, fontem consulamus, statim apparebit defectus. Græca verba sic se habent: τῆς δὲ Περσικῆς ἐν πινι τῷ ὀναζιζμένῳ τῶν ἐμβρύων, τὰ ἴκτεα οἷον

οἷον χύσας φαίνεσθαι. Hæc ita verti debent: *Terra Persicæ parte quadam, discisis embryonibus, fœminei sexus (sc. mures) tanquam prægnantes apparent.* Longe alius sensus horum verborum est, quam vulgaris interpretis. Non dicit Philosophus, fœtus prægnantes comperiri; sed utitur voce φαίνεσθαι *apparent, videntur*, & expresse addit vocem οἷον *tanquam, quasi* prægnantes. Quia verò suspicio variæ lectionis oriri poterat, inspexi editionem Parisiensem & Lugdunensem, in quarum utraqve eodem modo hæc leguntur, addita voce οἷον. Ruit itaque totum & unicum probationis fundamentum: Cum Philosophus non asserat, quod illi attribuunt. Mihi hæc videtur esse series contextus. In principio illius capituli dixerat, mirabilem esse murium generationem, ratione numeri & celeritatis. Hoc ubi probavit, ne quis putet, ideo ubique tenellos esse murium fœtus, absoluto

eo quod primario intendebat, subjungit, in Persia murium fœtus adeo crassos & obesos produci; ut quasi pręgnantes appareant. Dolendum certe est, uno pręeunte, tot in errores abduci. Oviũ instar sumus, quę pręcedentem gregem sequuntur, eunt quę itur.

His addo aliam considerationem, quę etiam erroris convincantur illi, qui tradunt, Aristotelem dicto loco docere, mures pręgnantes nasci. Extra dubium est, aliũ servari loquendi modum, cum referuntur ea quę plerumque & secundum consuetum & communem ordinem & cursum eveniunt: Alium, cum narrantur rara, monstrosa, prodigiosa. Prius cum fit, usurpari solet verbum pręsentis temporis; ita dicimus, hoc fit in Dania, Gallia &c. quasi dicatur, hoc ibi fieri solet. Cum posterius fit, adhibetur verbum pręteriti temporis: tum dicimus, evenit, factum est in Gallia.

Gallia. Atqvi Philosophus ibi utitur verbo præsentis temporis, *apparens quasi prægnantes*: quod argumentum est, eum referre id quod in illa Persiæ parte, non rarum aut monstrosum est; sed quod ibi vulgo evenire solet. Jam vero cui credibile videtur, dari aliquem tractum vel certam regionem in Persiæ, in qua secundum consuetum naturæ cursum, mures soleant prægnantes generari? Ibi tum rarum foret, murem nasci non prægnantem, quod plane a ratione alienum est. Non igitur hoc voluit Philos. sed tradit, in quadam Persiæ parte, mures solere in lucem edi, quasi essent prægnantes. Ratiocinatio talis est: Quod ibi refert Philosophus, credibile est in illa Persiæ parte solere fieri: atqvi, ut mures prægnantes generentur, non est credibile, ibi solere fieri; ergo illud ibi non refert Philosophus. Præterea, si Aristoteles rem adeo miram voluisset referre, verisimile est, quod
accu-

accuratius & specialius, additis pluribus circumstantiis factum narrasset. Atqui, neque sui ipsius, ut oculati testis, neque alterius alicujus testimonium adducit: imo, ne quidem locum, in quo hoc contigerit, specialiter exprimit; sed, cum Persia tantæ sit magnitudinis, utitur solummodo voce, quæ individuum vagum significatur³, dicens: Terræ Persicæ parte *quadam*. Hæc sufficere videntur ad probandum quod institueram.

Extra Aristotelem, video quidem in *Elysio Campo*, quem imperrime edidit *Gasspar à Rejes*, *quest. 36.* commemorari ex Torquemada, de e qua quæ mulam pepererit mortuam, in cujus alvo alia mula sit inventa: Sed, cum scriptor ille Torquemada mihi plane ignotus sit; ut pote cujus librum videre mihi non contigit, plura de illa historia non adjungo.

Reliquum est, ut aliquid addam de Liceto. Quam debili ille sua superstruat

struat fundamento, jam prolata arguunt, Præter hoc, declarationes ejus mihi non arrident. Duplicem proponit modum ortus murium, de quibus difficultas est, quorum unum non spontaneum, alterum spontaneum esse judicat. Adscribam potius verba Autoris: Porro, inquit, mures, qui *prægnantes in utero matris rescissæ* comperti sunt, duplicem generationem habere possunt; altera quidem est non spontanea, quia viventis muris anima in utero matris materici viscidæ in suo uterulo degentis animam sibi consimilem generet, ac indat, eo modo quo in piscium genere passeræ, rubelliones, & biatula, apud Aristotelem, sine usu maris omnes femina ex se pariunt, intra se quum genuerint ova prolifica: Qui modus generationis communis est etiam stirpibus, in quibus non inest sexuum distinctio. Altera vero eorundem murium generatio spontanea est, quia in uterulis foetuum muris rescissæ prægnantium materia contineatur, sive

*sive a parentum, sive a fœtuum corpore
illuc effluxa; in qua, velut in vase, por-
tio sentientis animæ pristini viventis de-
litescat: Cui materiei ab ambientis calo-
re ubi per coctionem dispositiones ad vi-
tam congruentes advenerint, statim ani-
mam illam sibi componit in formam essen-
tialem novi muris constitutricem.*

Primus ille generationis modus
displicet. Quia mures animalia sunt,
in quibus datur sexus diversitas: Ubi
vero illa est, nunquam ex uno, sed ex
utroque sexu simul, genitum produci-
tur: quod obtinere existimo in omni-
bus speciebus absque exceptione. A-
liter si fieret, sexus discrimen frustra
esset. Unde nec vero consentaneum
est; mures fœtas reddi ex solo salis
linctu: quod neque Aristoteles asserit.

Deinde, anima embryonis minus
valet ad generationem quam anima
animalis jam recens nati: atqui illa
non valet sibi similem animam pro-
ducere: Cum in singulis natura cer-
tum

tum tempus præstituerit ad generati-
onem, in aliis longius, in aliis brevi-
us, ante quod animalia ad generatio-
nem inepta sunt. Generantis & sibi
simile producentis iusta requiritur
quantitas, longe excedens quantita-
tem animalis recenter nati, quid hic
igitur valebit anima embryonis? Ha-
bet illud locum & in muribus, & in
reliquis animalibus perfectis & discri-
men sexus admittentibus. In alia in-
quirere, nunc necesse non est. Imo,
animæ murium, adularum, nunquam
producunt sibi similes animas, simi-
les mures, absque commissione ma-
ris: multo minus itaque hoc præsta-
re potest anima embryonis, animal-
culi imperfecti, necdum nati.

Præterea, in omni generatione,
apta requiritur materiæ dispositio;
unde vulgare illud, forma non intro-
ducitur in materiam indispositam.
Atqui hic requisita dispositio deest.
Dicit Licetus, animam illam indi ma-
teriei

teriei viscidæ in uterculo. Atqvi apertæ veritatis est, quamlibet viscidam materiam, non esse subjectum aptum quod animam recipiat & ab illa informetur: Qvalis hic viscida materia sit, tacet; quia nobiscum ignorat: ne dicam, illum gratis & sine probatione assumere, viscidam materiam in tali uterculo dari. Si ritè contemplemur, quod viscidum in uterculo forte est, id excrementitium est: atqvi viscidum ex quo ejusmodi animalia producuntur, debet esse semen vel ovum aut illi analogum, quod hic non datur: cum embryo ineptus sit ad seminis vel ovi productionem.

Quod Licetus illud simili declaraturus, subdit, *eo modo quo in piscium genere passeret &c.* Plane hic alienum est, neque quicquam ad rem facit. Primo, quia autores qui tradunt illos pisces procreare absque mare, simul etiam docent, in ejusmodi piscium generibus, non dari discrimen sexus, sed

sed omnes esse fœminas. Ita *Aristoteles Histor. Anim. lib. 4. cap. ult.* illud notat his verbis: *In testaceis, atqve in stirpibus, quod pariat, & generet, est: quod autem maris fungatur officio, deest. Sic etiam inter pisces genus passerum est, & rubellionum, & biatularum: ova enim in iis omnibus inveniuntur. Idem docet Rondelet. lib. 5. de Pisc. cap. 16. cum scribit: In erythrinis, passerum generibus, & channis, nulla est distinctio maris & fœminæ, sed omnes fœminas esse argumento est, quod in omnibus ova inveniuntur æstate, quum parere debent. Res ipsa docet, in illis animalium speciebus, quæ diversitate sexus carent, & tamen generant, solas fœminas absque maribus generare, cum non dentur mares. Atqui in hac materia de muribus longe alia ratio est, cum illi sexu differant; quæ de causâ vis argumenti in eo ponebatur, quod fœminæ animalium sexu distinctorum, non generent solæ absque maris conjunctione.*

K

ctione. Secundo, in hoc quoque illorum piscium & murium diversitas est, quod pisces jam nati & ad generationem apti, generent; atque difficultas de muribus mota, est de necdum natis, quæ alias dicuntur generare. Tertio, in eo etiam dissimilitudo est, quod pisces illi dicantur ova parere, ex quibus alii pisces nascantur: Cum, ut modo attigi, generatio ovorum, aut alterius substantiæ, quæ illorum vicem supplet, non possit tribui muribus, quibus lucis usura nunquam concessa fuit. Ne itaque Licetus modum generationis murium, compareret cum stirpium generatione, quæ absque sexus distinctione, qua stirpes carent, perficitur: Cum mures distinctionem sexus admittant. Hæc, forte nimis prolixè, de primo generationis murium modo. Subjungam quoque aliquid de altero, quem ita concipit Licetus, quod in uterulis murium contineatur portio animæ
prist.

pristini viventis, a qua componatur forma novi muris; & hac de causa, vocat hanc generationem spontaneam. Multa hic dici possent, sed breviter tantum quædam notabo.

Primum sit, quod ponat portionem animæ sentientis pristini viventis. Per *portionem* nihil aliud quam pars intelligi potest. Vult igitur, pristini viventis animam sentientem in partes dividi, & quod ex portionibus sive partibus a priore vivente separatis, de novo producerentur mures. Verum quidem est, animas sentientes esse materiales, a materia dependentes, extensas ad extensionem materiæ, & ea ratione quoque divisibiles: Revera etiam quorundam imperfectorum reptantium animalium animas ita dividi, ut brevi tempore quælibet pars se moveat; sed quod murium animæ ita dividerentur, ut ex illarum portionibus novi orirentur mures, forte simili modo, quo ex sto-

lonibus, novi excrescunt frutices, vel sicuti per insitionem & inoculationem, certi generis arbores multiplicantur, nullo modo credibile est: &, si hoc fieret, cur magis illa murium generatio vocabitur spontanea, quam talis propagatio & multiplicatio fruticum & arborum?

Secundum sit, ut consideretur, unde sive a quo ortum ducat materia, in qua portio animæ sentientis residet, dicit Licetus, illam effluxisse, *sive a parentum, sive a foetuum corpore*. An sic loquitur, quod hæsitet an a parentibus an a foetu illa materia fluat? an vero credit, quod aliquando fluat a corporibus parentum, aliquando a foetuum corporibus? Quicquid velit, dico utrumque improbandum. Si a corporibus murium parentum fluere materia in qua portio animæ sentientis resideret, quæ novos fabricaret mures, jam frequentissime eveniret, ut mures absque mare generarent.

rent. Si admittatur hoc in muribus fieri, cur non etiam idem concedetur multis aliis animalibus. Quorsum ergo, rursus dicam, diversitas sexus? Si materia ad id habilis non possit defluere e corporibus murium majorum & perfectorum, multo minus illa effluet e corporibus imperfectorum embryonum.

Tertio difficultas est, de modo, quo materia illa ad uterculos esset delata. Nullo modo probabile est, illam ibi fuisse & remansisse a prima conceptione murium prægnantium: hinc enim ne quidem uteruli erant; ubi, quo modo materia ibi esset conservata? Neque post conceptionem & conformationem murium prægnantium eo deferri potuit. Quia si hoc fieret, deberet ferri ex corporibus murium parentum, in uterculos fœtuum. At quibus id viis, per quæ vasa fiet? quomodo pauxillum illud

materiae incorruptum manere potest, subeundo tot varios motus.

Neque scrupulo caret ille loquendi modus, quo portio illa animæ sentientis, dicitur sibi componere animam in formam essentialem: Sed abrumpendum est. Finio itaque Vir Excell. cum gratiarum actione pro tractatu de Pulmonibus, quem dono mihi misisti; Vale & mihi favere perge. Amstel. 12. Jul. Anno 1663.

CAPUT XVII.

De Obstetricum scientia.

Hactenus insolitas partus humani rias ordine iusto expendimus, quæ tamen, quantum fieri potest, vitandæ. Sedulo potius procurandum, ut ad naturalem exitum foetus alliciat, qui, quanquam humanum superet ingenium, *Galeno* fatente l. XV. de Us. Part. c. 7. dolorisq; plenus sit ex poena peccatorum *Gen.* III: duplici ta-
men

men nominè præferendus , partim quia naturalis est , adeoq; natura adjuvante facilitatur , partim quia vitales iusto tempore foetus producit in nostræ mortalitatis solatium. Quid igitur facto opus fuerit, ut Ingera nostra vel iusto partus termino vivos suos foetus excluderet, vel in utero impeditos mortuosq; per naturales vias ejiceret, dignum videtur scitu.

Tres ad partum naturalem tuas operas conferunt, Mater, embryo, obstetrix. Obstetrix hic vel nulla fuit, vel imperita. Ultraq; puerperæ vel embryo exitium minatur. Quamquam enim non rarò furtivi partus sine obstetrice edantur, & robore præpollentes militum uxores aliena subinde auxilia respuant, in difficili tamen partu necessariam obstetricis operam misellæ parturientes requirunt. In Gallia Chirurgis peritis hoc negotium committitur. Valentia in Hispania pastoribus sed pru-

dentibus & Senibus eæ partes assignantur, teste *Mich. Joan. Paschalis* l. 1. de Cur. Morb. c. 59. nec mirum, quum *Joan. Gallego de la Serna* tr. 2. c. 5. de obstetricum suarum ignorantia valdè conqvestus optet ut Senatus Regius permittat eas examinari. *Rod. à Castro* l. IV. de Morb. Mul. c. 1. Viros artem istam dedecere, ex Borealiū consuetudine, sibi persuasit. Si quidem tamen ad partus mortuos & secundas extrahendas advocentur, consilio *Celsi* l. VII. c. 29, nihil est quod eos ab aliis partibus arceat, præsertim uxoratos. In America Viri uxoribus suis obstetricantur. Testatur id *Joannes Lerus* Hist. Nav. in Bras. c. 17. Nam cum is aliusq; Gallus in vico quodam diverterent ibidem, circa mediam noctem clamorem muliebrem ingentem exaudiverunt, surgentesq; eam à belua *Janovare* interceptam rati, accurrunt, mulierem parturientem, offendunt, cui

cui Vir obstetricabatur: hunc puerulo in ulnas recepto dentibus umbilicum abscidisse, nasum verò depressisse, pro more gentis. Sunt autem Brasilienses mulieres sive pręgnantes, sive puerperę, robustę, vegetę agilesq; attestante *Guil. Pisone* l. 2. de Med. Bras. c. 17. Non improbanda in puerperiis, maritorum pręsentia quę uxores animantur; aliās, si timidiores sint, nisi artis peritiam habent, inutiles. Qualis obstetrix fuerit Socrates, *Plutarchus* 1. Quęst. Plat. explicat, & antea *Plato* in Theæteto. Nostrę mulieres pudori suo optimè consuli credunt, quod feminas obstetrices eligant. Nec damno verecundiam hanc, modo peritas haberemus obstetrices. Cæterum cuivis obstetricem se proficienti credimus, quę per mortes nostrarum puerperarum deinde experimenta faciunt, Anatomię prorsus ignarę, quam discere vel erubescunt, vel fastidiunt. Per plūsculos annos

publicè in Theatro Anatomico utriusq; sexus & ætatis sectiones administravi, sed nullam unquam obstetricem curiositas uterum ei; annexas partes videndi adduxit, præter unicam, quam eo nomine laudavi, illiq; privato studio singula in cadavere feminino demonstravi, quæ tamen adhuc extra viciniam suam est ignota, ut idcirco experienciâ destituatur, & ego ab ulteriore liberorum cogitatione supersedere cogor, quia ipse obstetriciam artem nec exercui, nec exercere volo. Obstetricum peritia & rerum Anatomicarum scientia ad felicem partum necessaria, ut opem ferant. Hinc enim dictæ *Opstetrices* in vet. Inscriptionibus. Romæ olim in domo Marcelli de monte ad emissarium Aquæ Virginis, jam in Horto Matthæorum.

SALLUSTIA. Q. L. IMERITA
 OPSTETRIX
 Q. SALLUSTIUS. Q. L.
 ARTEMIDORUS
 ARESCUSA. FECIT.

ET alibi Romæ, repetente *Grutero*
 Ep. DC LII, ex F. *Ursini* imaginibus:

SEX. POMPEIUS	ATIA DYNAMIS
SEX. L. DAPHNIS	QPST.
GRAM.	
CHLOE. POMPELÆ	
APPI OPST	

Hinc etiam Diana, parturientium
 DEa, *Ops* dicta, quam ipsam Dianam
 esse, non comitem Dianæ, *Macrobius*
 probat l. V. Saturn. c. 12. Ut opem fe-
 licius ferre possent, antequam pro
 obstetricibus se venderent, deberent
 examinibus Medicorum & Seniorum
 obstetricum prius subjici. In Eccle-
 siasticis Dianæ Constitutionibus ju-
 bentur

bentur à Paſtoribus de pietate & fide
examinari , anteqvam conceptâ jura-
menti formulâ ſe Magiſtratu civili
obſtringant. Lipſiæ uxoribus Conſu-
lum incumbit ex officio obſettrices
eligere, narrante *God. VVeſſebio* in An-
not. ad l. i. Obſt. Mercur. c. 18. cujus
tamen prudens quoq; eſt Conſilium ,
ut etiam conſultus Medicus examini
interſit. Hic ſané de ſcientia Anato-
mica rectius judicabit , quam uxor
Conſulis, & de aliis agendis in caſibus
difficillimis. Hujus ſcientiæ imperi-
tia & uſus defectu malè multæ mul-
ctantur. B. *Auguſtinus* l. i. de Civ. DEi
c. 18. conqueritur, quod obſetrix Vir-
ginis cujuſdam integritatem manu
velut explorans ſive malevolentia , ſi-
ve inſcitia, ſive caſu, dum inſpiceret,
perdiderit. Quod mater ad partum
edendum ab obſetrice fuerit ſollici-
tata , nondum perfectè maturo fœtu,
cauſa fuit ut ſecundina utero hæſerit,
ex conjectura *Plateri* l. i. Obſt. Inte-
gerri-

gerrimus puellus obstetricis culpâ capite in utero privatus narratur ab *Henrico ab Heer* Obs. Med. XV. Puerperæ vi extractus fuit & resectus uterus apud *Hildanum* in Epist. ad Doring. Capitulum filiolæ Pastoris per imperitiam obstetricis latere tenus ita fuisse compressum conqueritur *Henr. Eysenius* l. de Off. Infant. c. 6. n. 4. ut introrsum adactæ ac retractæ ossium sincipitis extremitates, in futuræ sagittalis concursu mutuo satis profundum parerent sinum, ab occipite ad supremam usq; frontem protrusum. Vidimus nos non semel, brachiis, pedibus &c. mutilatos infantes, quia ignaræ erant obstetrices, nescientes partem prodeuntem ad uterum reducere. Obstetrices igitur non tantum probatæ artis, sed & fidei commendat *Ulpianus* ff. XXV. tit. 4. de Ventr. inspic. Quales in Ægypto fuerunt *Exod.* I, 17. quæ spreto edicto Tyrannico, natis pueris Ebræorum pepercerunt,

runt. Hujus fidei immemores obstetrices duæ in Episcopatu Basileensi & Argentinensi, una XL, altera innumera-
rabiles pueros nuper editos necave-
runt, inditis clam in eorum capita
grandibus aciculis, quod facinus igne
expiatum scribit *Sprengerus* in Mall.
Malef. part. 2, q. 1. c. 13. Nec absimi-
les illæ quæ falsum partum puerperis
supponunt, quæ ideò puniuntur in Ju-
re Civili l. 2. ff. de Carb. edict. tit. 11.
Huc spectat obstetricum superstitio,
quæ illarum ferè est propria, in pileo,
umbilico, aliis. Divisos membratim
in sceleton abortus, mensium piacu-
la, & alia quæ & obstetrices & mere-
trices prodidere, ad portentorum mi-
racula refert *Plinius* l. XXVIII. c. 7.
Talia obstetricum flagitia hodie fre-
quentia in Alemannia, quæ sub ditio-
ne Lotharingica est, sæpe ex quæstio-
nibus capitalibus depræhendit *Nic.
Remigius* l. 2, Dæmonol. Sag. c. 3. De
pileo illustris est locus *Ælii Lampridii*,
in Vi-

in Vita Antonini Diadumeni: Solent, inquit, pueri pileo insigniri naturali quod obstetrices rapiunt, & advocatis credulis vendunt, si quidem Causidici hoc juvari dicuntur. *Balsamon* quoque in Comm. ad Canon. LXI. Concilii in Trullo, historiam narrat de Proto quodam è clero, qui accusatus quod his artibus esset deditus, postea deprehensus est habere in sinu pileum hujusmodi naturalem, à muliere quadam acceptum, quæ hanc illi vim in esse affirmaverat, ut omnium ora qui adversus gestantem dicere essent parati, obturaret. Quam mulierem, fuisse obstetricem *Is. Casaubonus* Not. ad Lamprid. suspicatur, quia etiam *Job. Chrysostomus* non semel in Sermonibus suis obstetrices objurgat propter hoc genus præstigiarum & majorum imposturas. De umbilico nihil addo, in quo credulæ obstetricum mentes ludunt, & ex nodis nodos solvunt. Deciduum ad coli tormina

mina commendant *Rhazes, Trallianus*, & alii ad fœcunditatem conciliandam. Obstetrix illius custodiam diligentem fvasit *Bald. Ronfseo* Epist. Med. XVII, qui idem consilium *Martino Scippero* Medico Trajectino, Magni *Martini Scoockii* Proavo, novas tum nuptias contrahenti, amicè suggessit. Sed obstetricibus similia mihi laudantibus, nunquam credidi, quia superstitione nituntur, quam semper amant. Certè incantationibus obstetrices excitare & mollire partus vexationes *Plato* tradit in *Theæteto*, ubi & alia Obstetricum munia recenset instituto nostro inservientia.

CAPUT XVIII.

De Obstetricum Officiis.

- I. **Q**Vænam prægnantes essent, & quæ non, dijudicabant. *Trincavellio* l. XI. de Part. affect. c. 20. obstetrix partes genitales mulieris pertractans

tractans concepisse mulierem facile deprehendere poterit, si istius rei perita sit: nempe si uterus contractione claudatur, quod suo digito cognoscit. *Capivaccus* l. IV. Prax. c. 5. os clausum etiam obstetrices sentire dicit, sed citra duritiem, ubi enim durities, & occlusio est morbosa. Uterq; id ex *Galeno* 5. Aph. 51. deprompsit. Quò tendit Rescriptum illud de Ventre inspiciendo, cum mulier dissimulat se esse prægnantem, quod à tribus Obstetricibus eam inspicientibus renunciatur. Jurisperiti quoq; posteriores obstetricibus injungunt, ut probent in virginibus deflorationem; sed si altior vel urgentior probatio requiratur, tunc adhibendos Viros peritos. Præter casum Ducis Parmæ & filiæ Ludovici Marchionis Mantuæ, alium recitat *Vincentius Alfartus Crucius* Quæst. Epist. Cent. IV. de Spoletina Puella decem annos nata, quæ defloratæ virginitatis initio pro-

L priuma

prium accusabāt genitorem, mox negabat. Advocati Medici & Chirurghi, & obstetrices, quæ abditas puellæ partes intuerentur, contrectarent & judicium ferrent. Medici negare constanter illam fuisse defloratam, at obstetrices affirmare. Quærebatur, utri nam parti Judices magis crederent, Medicis an Obstetricibus? *Alfarii* judicium fuit, nullam prorsus adhibendam esse fidem obstetricibus in illo casu, quod incertā sint & fallacia signa omnia, per quæ virginitas seu præsens seu jam ablata dignoscitur.

II. Medelis puerperii dolores emolliebant. Juxta *Moschionem* enim l. Gynæc. c. i. debent esse medicinalibus actionibus exercitatæ. Consentit *Aristoteles* l. VII. Hist. Animal. c. 12. ex distinctione & versione *Jul. Scaligeri*. de Obstetricibus: Neq; enim sola dexteritate opus esse, ut juvare possint mulieres quæ ægrè pariant, sed etiam præsentī animi vi ad ea quæ evenire qveunt.

queunt. Sicut apud Athenienses mulierum morbis curandis præficiebantur, ita & apud Romanos. Præses enim Provinciæ etiam obstetricem audire jubetur L. 50. ff. *de Extr. Cognit.* tit. 13. l. 1. §. 2. quæ utiq; medicinam exhibere videtur. Eleganter in hanc sententiam D. Hieronymus l. 2. Epist. Select. 9: ipsum jactant assidere lecto, obstetrices adhibere langventi, portare matulam, calefacere lintea, plicare fasciolas. Apud *Plinium* l. XXVIII. c. 7. Sotira obstetrix nominatur, quæ variis morbis remedia noverat, ibidem signata. Neutiquam verò medicamentum tale dare debebant, ut inde mulier periret, ff. l. 9. in princip. ad Leg. Aquil. quale medicamentum malum venenum vocatur §. 1.

III. Ægrè parturientibus denum opitulari, foetumq; educere, & si intempestivum fore videretur, obtundere atq; retrudere. His præcipua obstetricum munia circumscripsit

Plato, quem aliquo extra partum augmento juvabimus.

IV. Tanquam pronubæ essent, mares feminasq; jugare, vel jugatos discernere, quia gnaræ esse debent, quod in solum quam plantam, quodve semen jacere deceat. Nam, ut eleganter *Lucretius* l. IV. de. Rer. Nat:

-- multum harmoniæ Veneris differre videntur:

Atq; alias aliis complent magis, ex aliisq;

Suscipiunt aliæ pondus magis, inq; gravescunt. &c.

Quæ cura multum Reipublicæ interest, civibus seu bello seu lue exhaustis, ne vel dispar ætas jungatur, vel ad prolem inepta, magno & patriæ & familiæ cuiusq; detrimento. Post *Platonem* idem obstetricum officium. urget *Galenus* Comm. 5. Aph. 62. & Aph. 59. usum ostendit; Sæpe enim ut Sacerdotalis aut Regalis propagatio quædam & soboles supersit, studiosè faciunt

faciunt civitates ut ab iis seu Viris seu mulieribus susceptos liberos habeant, ad quos solos ejus progeniei spes est redacta : deinde ubi mulieres non concipiunt, utrius causa id accadat quæritur, ut facto divortio ex aliis suscipiantur liberi.

V. Nati foetus umbilicum præcidere, in quo etiam deligando *ἰατρούσαν* requiri rectè inculcat *Aristoteles* l. VII. Hist. Anim. c. 12.

VI. Aptè fasciis infantem involvere. Hinc *Galenus* l. 2. de Morb. Caus. c. 7. inter causas ob quas naturalis figura permutatur, unam obstetricum ligaturam refert, de qua legi meretur *Henr. Eyssonius* de Off. Infant. c. 6. n. 4.

VII. Infantes etiam lavasse olim, indicat *Plautus* in Trucul. Act. 5. ubi & puero & matri, hoc est, obstetrici, sicut explicat *Jos. Scaliger* in Giri, cibo opus fuisse narrat, quia hæc puerum lavisset, de qua lotionem nos plura in

Puerperio Veterum commentamur. *Scaligerum* interim juvant Itali, qui Obstetricem vocant *Commare*, quasi alteram matrem.

Tantis officiis destinata obstetrix, ut singulis par sit, parentibusq; & Reipubl. profit felici prolis nativitate, magnis animi corporisq; dotibus debet esse instructa. Animum quidem pietate in DEum, fide erga demandatam puerperam exornet; præterea artem calleat, quam exercere in se suscepit, sciatq; quid uterus distet vesicâ, quæq; remedia illius affectibus conducant, & *ἡσυχία* illa prædita sit, quam non per intelligentiam solam cum *Gaza*, sed per discursum vulgò dictum *Jul. Cas. Scaliger* apud *Aristotelem* vertit, ut puerperam sapienter in utroq; eventu regat, & tempora consideratè captet, nomenq; mereatur *Sage Femme*, quo modo Galli obstetrices suas appellant. Moribus sit placidis, nisi puerperas inobedientes inveniat,

veniat, hilaris, sobria, Medicisq; in difficili partu vocatis pareat, unde sapienter *Albucasis* l. 2. c. 76: debet omninò obstetrix non nimum sibi arrogare & placere, sed quotidie discere à Medicis & vetulis mulieribus in hac arte usu & longa experientia edoctis. Spem prolis masculæ semper matribus faciat, quod svadent *Euch. Rhodio* de Part. c. 4. *Mercurius* l. 1. Obstetr. c. 18. inprimis si maribus delectari puerperam prævideat.

Eo robore corporis & ætatis sit, quod laboribus sufficiat, effœta & vidua, monitu *Platonis* in Theætet. quæ tamen antea & concepit & peperit. Causam hujus, si *Socrati* fides, *Dianam* ferunt, quæ cum tori exors sit, partuum tutelam suscepit: Steriles verò obstetrices fieri vetuit, quoniam humana natura imbecillior est ad artes earum rerum, quas nunquam experta est: his autem quæ propter ætatem concipere jam non possunt, id

imperavit similitudinem suam honorans. Contra *Platonem* dubium oritur ex *Exod.* I, 21. ubi obstetrices Ægyptiæ maritæ esse creduntur; quia DEUS ædificasse illis domos dicitur, quod per auctam sobolem Ebræorum authoritate quam plures explicant, *Ambrosius*, *Emmanuel Sá*, & *Grotius* vastum illud ingenium, sic enim בְּנֵי־סוּמִי *Gen.* XVI, 2. & XXX, 3. quibus in locis Græci utuntur verbo τεκνοποιεῖν, & inde בן. Alii tamen in diversa abeunt, nec ad obstetrices pertinere istam posteritatis benedictionem ratî, sed ad Ebræos ipsos, quia in Ebræo est לֵבִי *Labem*, quod est masculini generis. Cui difficultati occurrens *Jac. Bonfrerius* Comm. in *Exod.* monet non raro pronômina ista masculina pro feminiinis poni, unde & *Paraphrasten Chaldæum* hîc pronomen femininum usurpasse. Ita & respondet *Tb. Malvenda* in *Exod.* sed addit, fortasse hic obstetricibus pronomen masculinum

lum tribui, ad indicandum virilem earum animum, quo atroci Regis edicto restiterunt. De Obstetricibus ipsis sermonem esse LXX. *Interpretes* docent: ἐποίησαν ἐαυταῖς οἰκίας, fecerunt sibi ipsis domos. Per domos multam bonorum copiam interpretatur *Theodoretus* in Exod. Interr. 2. & Auctor *Catenæ Græcæ*, omnium bonorum abundantiam, quibus maximè domus & familiæ exornantur. Vide ejus verba, & alia apud *Jo. de la Haye* Comm. in Exod. De utroq; non malè accipiunt *Interpretes Belgæ*. Et familiæ obstetricum cognatæ auctæ dici possunt, quanquam tum filios generare non potuerint, nisi de ante genitis sermo sit. Verbo: DEus divitiis & nepotibus auxit, & familias protexit. Præterea in obstetricibus laudantur *Gordonio* p. VII. c. 7. manus parvæ, illæ tamen digitos longiores habeant & molliores, qui aliis laboribus callum non obdlexerunt, sani quoq; sint, ne sca-

biem suam fanis puerperarum partibus affricent, cujus singulare exemplum habet *Burgesia* l. 2. Obs. Obstetr. ejusdam obstetricis lue Venerea infectæ, quæ infecit plures quam 35. familias, & dissidia inscia inter maritos uxoresq; seminavit; infecti Viri uxores culpæ, & hæ, suæ integritatis consciæ, culpam in maritos conjicere;

CAPUT XIX.

*Quomodo insolitæ partus viæ
declinandæ?*

Melioris notæ & scientiæ Obstetricem si vel Ingeræ fortuna vel patriæ felicitas puerperio huic non invidisset, melius res gemellorum processissent, & defectus seu matris seu foetuum fuissent emendati. Enimvero

I. Membrana choroidis densitatem solidiorem, quam ut sua sponte
rumpi

rumpi posset, discindere debuisset, consilio *Ætii* tetr. 4. ferm. 4. cap. 22. idq; summa ungvium acie temperato ictu, ne quid præterea violaretur; svadente *Jasone à Pratis* l. de Partu & Parient. cap. 4. digitis oleo lilino prius unctis, ex *Heurnio* de Morb. Mul. c. 8. aut scalpello inter digitos occultato, quem *Ægineta* l. 3. c. 76. concedit; sed præcedente sinistra manu, ne scilicet aliquid læderetur. *Albucasis* Chirurgus inter Arabes primæ notæ l. 2. c. 75. utrumq; jungit, spatumile parvum & & ungvem. Et *P. Forestus*, l. XXVIII. Obs. 75. in schol. monet ut obstetrix prius tentet ungvibus leniter discerpere, quam discindere. Idem svadet *Scipio Mercurius* l. 2. c. 26. ejusq; Interpres Germanicus & illustrator *God. Welschius*, qui ferrum singulare seu lancettam novam excogitavit sine periculo adhibendam. *Mercatus* l. IV. de Aff. Mul. c. 3. cautè agendum monet, ne fœtui aut matri grave aliquod malum

malum subsequatur. Damnat quoq;
Burgesia cap. VIII. eandem rupturam
ab obstetrice factam, propter metum
ne umbilicus vel manus, vel pes erum-
pat, ideoq; aquam tepidam & lini-
menta emollientia magis expedire ad
attenuandam membranam. Cæte-
rum si periculum sit in mora, & puer-
pera debilior quam ut balnea sustine-
at, foetusq; imbecillior, quam ut vi-
viam faciat, non reformidamus ne-
cessariam hanc operationem, quam
non semel obstetricibus nostris injun-
ximus, modo interea provideat, ne
manus vel pes elabantur, & si fuerint
præter expectationem protrusa, ut
dextrè iterum in dolorum remissione
remittantur, caputq; quærat. Sunt
& apud nos exempla infortunata,
ideò ne audaciores sint in hac opera-
tione obstetrices, sedulò sequentes
cautiones observandæ, ut 1. legiti-
mum partus tempus adsit, nec antea
quicquam tentandum. 2. imbecillior
sit &

fit & mater & partus, quam per-
 rumpere possint. 3. Crassior sit membra-
 na quam ut rumpi ex se queat, id
 quod digitis suis exploret obstetrix.
 4. In orificio matricis chorion hæ-
 reat ad ovi amplitudinem, vi laboran-
 tis protrusa, ut ea propter foetus ipse
 intra uterum adhuc retentus disrum-
 pere eam non possit, tumq; legiti-
 mum partus instare tempus Medici
 consentiunt. Svasi his diebus obste-
 trici, ut uxori pastoris ungvis chor-
 ion prominens aperiret, in difficili
 aliquot dierum partu, editaq; est feli-
 citer grandis puella. Bassana obste-
 trix Patavina admoto sacchari acu-
 minato fragmento exitum aquis pa-
 rare solet, sicut narrabat *Jo. Veslingius*.
 Nostri quoq; obstetricibus salis acuti
 grandioris frustulum in usu est.

II. Loci siccitatem ex ruptis ante
 vota tunicis, emendasset albumine
 ovorum cum malvæ aut fænugræci
 decocto excolato, vel oleis amygdali-
 no &

no & liliaceo, panniculis madidis, spongiisq; in decocto tinctis, pessulis ex sevo, exhibitaq; potione humectante. Testatur *Galenus* l. XV. de Uf. Part. c. 5. suo tempore obstetrices humores quosdam habuisse, quibus in tali casu collum matricum perfundebant: Quamquam & felices partus viderim, postquam humor fluxisset. Rectè quoq; *Melch. Sebizi* Manual. Med. part. 5. s. 4. cap. 4. hoc accidens, nempe aquarum effusionem, cohiberi non posse: ideoq; operam solum dandam, ut parturiens facilius pariat aliis usurpatis remediis, qualia sunt, quæ ex cordialium & corroborantium albo petuntur.

III. Angustia vaginæ si naturalis sit in feminis statura parvis, corrigi levi arte non potest. Quis enim etiam maximè anxia cura potest staturæ suæ vel cubitum adjicere. *Mattb. VI, 27.* Industria prudentis Medici parvā angustiam faciliorem reddi præcipit *Jo.*

pit *Jo. Henr. Meibomius* Comm. in Jusj. c. 15. n. 41. Si igitur ab alia quacunque causa exsiccante dependeat, inunctionibus humidis calidisque emendanda. Si caro collo uteri adnata fuerit, innataque aliqua tunica solidior, unde imperforatae fiunt mulieres, aliaque impedimenta viam solitam partus obstruxerint, nullum nisi in ferro praesidium, cujus modum tradit *Celsus* l. VII. c. 28, in clausis feminarum naturalibus; nisi inusitato foetus robore vi viam sibi fecerit.

IV. Arctior ossium constrictio infessibus & balneis emollienda, illitionibus, cataplasmatisque laxanda, & postea os coccygis obstinatius resistens, manu suaviter nonnihil reducendum. Quo confert situs parturientis stantis vel nonnihil jacentis, judice *Mercato* l. IV. de Aff. Mul. c. 3. Narrat *Forestus* l. 28. Obs. 70. in urbe Delphis obstetrices habere mulieres fortes ad sustentationem destinatas, ut praegnant-

tes in

res in sinu sedeant, vel liberè sustineantur. *Aetii* monitum est tetr. IV. f. 4. c. 22: si ob lumborum cavitatem pariendi difficultas contigerit, ut puerpera in sella, prona flexis genibus collocetur, ut vulva delabens cervicem recta extendat, eodemq; modo pingves quoq; & carnosas susti. His usibus commodè inservit sella semilunæ similitudine excavata ex *Moschione* c. 47, qualem etiam depingit *Eucharius Rhodio* l. de Part. c. 4. Si verò Sella obstetricalis non sit intus fortis, in mulieris femoribus sedere debet, eodem *Moschione* authore c. 49. Elegans est sella à *God. VVelschbio* inventa & depicta Addit. ad L. I. c. 23. Obst. Merc. quam ita accommodat ut parturiens sedere in eà possit si vires consent, vel decumbere reclinata sella, si imbecillior sit puerpera, in quali sella somnum meridianum Itali capiunt, nostrisq; ægris commendare talem solemus; sed pro parturiente excavata esse debet.

bet. Quod si negligentius hic se gesserit obstetrix, fœtus robustior penetrans, loco movebit os coccygis, cujus incommodum per reliquam vitam sensisse mulieres observavi.

V. Mater in frustraneo conatu roboranda fuerat; quanquam enim nihil remisisse à labore feratur, debuit tamen ad repetitos labores aptis cordialibus excitari & roborari, ne spes ulterior eam ante tempus destituisse videretur. Consentire non possum *Antonio Everhardo* Medico Medioburgensi ingenioso, qui L. de Hom. Exort. p. 268, quia aliquoties observavit parturientes in partu difficili robustas & fortes, principio non potuisse parere, postmodum debilitatas & ad extremum deductas, feliciter absq; ullius opera peperisse; inde concludit, uteri membranas flaccidiores evadere spirituum defectu, & eo modo infanti in lucem edendo exitum procurari. Verà quidem est observatio, nec no-

M

va, sed

va, sed causa quam affert, absurda videtur, & propriæ sententiæ adversa. Defectu enim spirituum uterus deficit, & auxilium matris foetui subtrahitur, ut solus in arena relinquatur. Ex ejusdem principiis calor membranas uteri ad extensionem & flexionem reddit seqvaces, ut hujus beneficio Indicæ mulieres facilius onus uteri deponant, qui calor à spiritibus. Hinc longo labore exhaustis spiritibus, deficiunt vires parturientis, & non rarò intereunt. Quod verò subinde à labore vel deficientibus vel deficientibus feminis, facilis partus succedat, alia eruenda est ratio. Vel enim spiritibus ab utero retractis, foetus suo robore perennat, ut solus ex oculis mulieribus jam emollitis & dilatatis egrediatur; vel in lumborum cavitate delitescens, vehementibus conatibus resistit, sed quiescente parturiente & leviter inflexo corpore, suâ sponte per patulas vias elabitur,

tur, tumq; quiescente nonnihil pariente, vires aliquas recuperat pro novis laboribus & partu. Certè robur requiri seu puerperæ seu fœtus, His-
kias indicat 2. *Reg.* XIX, 3. & *Eesai.* XXXVII, 3: Pueri ad locum nativita-
tis pervenerunt, sed nullum robur ad-
est ad pariendum. In Ebræo fonte
locus ille nativitatis est, *ad fracturam*,
quasi jam vel ossa pubis vel coccygis
diffracta & dilatata sint, 'nec tamen
partum ullum succedere posse sine ro-
bore necessario.

VI. Gemellos simul & semel de
exitu concertantes digitis suis obste-
trix potuit compescere, ut alter ad
uteri fundum nonnihil retruderetur,
donec is, qui partui proximus, educe-
retur primus, monitu *Ætiii* l. d. No-
tandæ tamen hic conditiones necessa-
riæ. Primò, ne quiescat neq; moram
ullam obstetrix interponat, donec fe-
riatim omnes educantur, secus enim
expultrix vis labefactatur, animadver-

tente *Eustach Rudio* l. 2. Art Med c. 61. & *Mercuriale* l. 2. de Morb Mul. c. 3. Deinde, ut antequam primus prorsus sit extractus, alter manu apprehendatur ne mutetur situs, partusq; fiat difficilis, annotante *Scip. Mercurio* l. 1. Obst c. 27. Id DEI providentia in gemellis Rebecca accidit. Nam Jacob manu sua Esavi calcaneum, LXX. *πλεριω*, Hieronymo plantam pedis apprehendisse narratur *Genet.* XXV 26. *Olea* XII, 4 Tertio, addit *Welschius* Doctissimus, ut obstetrix in eodem latere quo alter foetus latet, leniter sursum ventrem comprimatur, donec primus ad partum veniat. Eadem cautiones observandæ, si tergemini vel plures foetus utero gestentur, ne simul egressuri, simul omnes extinguantur. *Aristoteles* l. VII Hist. An. cap. 5. quinos observavit; quendam enim quater singulis partibus edidisse quinque; quem simili exemplo ancillæ Cæsaris Augusti juvat *A. Gellius* l. X. Noct.

Noct. Att. cap. 2. septem edidit mulier Florentina Romæ de qua *Jo. Faber*, in Not. ad Hist. Mexic. p. 475 Uxorem nobilis D. Darre unico puerperio octo foetus benè conformatos enixam refert *P. Borrellus* Cent. 2. Obs. Med. 44. Novem Salustra, narrante *P. Paul. Pereda* in Schol. ad Paschal. l. 1. c. 57. Uno abortu XII puerperia egesta *Plinius* author est Temporibus Nicolai III. Pont. Romani Anthonia femina Mutinæ fuisse memoratur in Chronico VII. Ætatum Misto primum *Pignorum*, postea *Rhodii* nostri, quæ ante ætatis ejus annum XL, ex viro concepit filios XXX: nam tantæ sæcunditatis dicitur, ut aliquando quinque, aliquando tres filios uno partu ediderit; undecies autem gemellos, tandemque in partu defecisse. Feliciter tot partus numerosi non succedent, nisi successive posteriores post primum prodeant. Si tamen minores sint, per amplam regiamque viam simul plures exe-

M 3

unt,

unt, quod illi quæ 150, de qua *Albertus Magnus*, & alteri Comitissæ Margarethæ trecentos & sexaginta quinq; puerulos pusillos uno partu enixæ, contigisse suspicor, cujus posterioris tumultus in Templo pagi Lausdunensis in Belgio visitur, & Inscriptionem recitat *Salmuth* in Nov. Rep. tit. X. quam tamen propter novitatem suspectam habet *Gasp. Schottus* in *Phys. Cur.* & ipse *Forestus* l. XXVIII. Obs. 66. in Schol. pro superstitiosa narratione traducit: Sed propius ad verum accedere, septem tantum fuisse foetus, quot nempe in anno diēs sunt singulis hebdomadibus recurrentes, me olim monuit *Cl. Salmasius*. De aliis numerosis partibus videndi *Schenckius* in Obs. *Sennertus* l. IV. p. 2. S. 4. c. 5. & *Rhodium* noster C. 3. Obs. 56.

VII. Si situs in utero vitiosus fuit, ut exinde situs impeditus, intromissis digitis munctis obstetrix ad legitimum convenientemq; positum debui-

debuisset convertere, seduloq; impellendo, deducendo, flectendo, dirigendo procurare, ut caput primum propenderet, quæ cura hic & ubiq; obstetricum est. Pedem vel manum editam & extra propendentem, in uterum reducere convenit ea cautione, ut conatibus parturientis remittentibus manus immittatur, requiescatq; redeuntibus, quæ occasione captata negotium facile erit & expedirum. *Celsus* l. VII. c. 29. istam occasionem describit, prorsus necessariam, sed plerisq; obstetricibus ignotam, ut mirum non sit, infelicium partuum exempla multa proflare. Quid verò agendum, si caput foetus grandius angustas naturæ vias perumpere nequeat? Idem dubium monstra bicipitia concitant, quæ tamen promptè edita historiæ testantur collectæ à *Fortunio Liceto* l. de Monstr. patentibus sine dubio laxatisq; naturæ claustris. Medicamenta expellen-

tia fortia justis de causis hic proscribo, quæ plus mulieri nostræ parturienti damni quam commodi attulissent, partim quod insveta illi essent, partim quod dolores augerent parum profuturos angustâ viâ obstante, partim quod fœtum exire non valentem, coegissent uterum rumpere, sicut id notatum *Salmutho* Cent. 1. Obs. 16. & antea *Hildano* Cent. 1. Obs. 64. ore matricis angusto existente cum valido nisu. Educi tamen fœtus mortui debuissent. Fateor. Sed quia alia via non successit, vi attractionibus quibusdam educendi, hortante *Abensina* l. 3. fen. 21. Tr. 2. c. 28. & *Haly Abbate* l. 8. Prax. c. 26. vel dissecandi primum tumq; extrahendi, ex consilio *Aëtii* tetr. 4. serm. 4. c. 22. & *Æginetæ* l. 3. R. Med. c. 76. sive unciis aliisq; instrumentis Chirurgicis, fusè descriptis & depictis à *Celso*, *Paulo*, *Aëtio*, *Paræo*, *Aquapendente*, *Ronssæo*, *Sculteto*, sive manu unctâ solâ, quod probat *Fr. Ranchi-*

Ranchinus de Morb. Part. sect. 2. p. 162. ea tamen cautione, quam ille post *Æginetam* l. 6. de R. Med. c. 74. 70. *Heurnium* de Morb. Mul. c. 8. *Ronsseum* de Vit. Primord. c. 23. annotavit, si signis collectis evasuram mulierem Medicis appareat, alioqv̄ diffamanda non sunt præsidia, quæ plurimis fuere saluti.

VIII. Occasionibus his neglectis seu obstetricis culpâ, seu Medicorum defectu, seu valentiore quocunq; Naturæ vitio, superstite Matre, foetus mortuus in utero relictus, sectionem Cæsaream postulasset, quam contra *Varandæum* l. 2. de Morb. Mul. c. 6. *Mart. Akakiam* l. 2. de M. Mul. c. 15. tutam & necessariam dicimus, rationibus & experimentis *Rosseti* & *Raynaudi* freti; quanquam *Varandæum* Præceptorem suum in Præf. novæ editionis ad Lectorē nuper piè excuset, præceptore major *Henricus Gras*, Medicus Lugdunensis, quod dies diem doceat. Negligentiam verò mortalium, natu-

ræ providentia emendavit vel supplevit, & viſis inſolitis collecta in apoſtimate oſſa excrevit, modo per umbilicum, modo per alia loca vicina, quam primum ulcus auxiliari manu aſtantium deſtituebatur.

CAPUT XX.

Dubia nonnulla in Caſu hoc raro propoſita & ſoluta.

Antonius Deuſingius in Academia Gröningana Profeſſor Celeberriſſimus, Amicus Magnus, in amica Caſus hujus mulieris à me illi propoſiti reſolutione, varia monet urgetq;, ut illuſtretur Diſſertationis noſtræ argumentum, hic repetenda & pro epilo-go expendenda, quia ſerius mihi ab amico exhibita. Ita autem ille in Hiſtoria Partus infelicis, ad me ſcripta, loquitur:

Cum exigas à me Vir Excellentiſſ. judicium de hoc Caſu, in Tui obſequium

quum quid sentiam depromam. Varia equidem hic possunt in Considerationem venire. Nam i. Dubium fortè potest videri, an ullo signo gestatio gemellorum (quos eventus in casu arguere videtur,) colligi queat? Utique ipse abdominis tumor gemellos minimè comprobatur, utpotè qui nonnullis unum fœtum gestantibus major esse potest, quàm aliis quidem gestantibus gemellos: nec certi quid arguit protuberantia in latera, quia quandoque ex æquo ab uno itidem fœtu contingit utrinque; ac ubi gemelli gestantur fieri potest ut protuberantia in alterutro latere major sit. *Hippocratis* quidem effatum novimus *aph. 48. sect. 5. Fœtus mares dextrâ uteri parte, fœminas sinistrâ magis gestari*: quæ pridem quoque *Parmenidis* & *Empedoclis* opinio fuit: at quam nec Rationi nec Experientiæ congruere, ab *Aristotele* ostensum 4. *de gen. anim. cap. 1.* Et Experientiæ quidem id ipsum sapius

sæpius contrarium esse confirmat *Harvæus de gen. anim. Exerc. 69.* comprobaturque idem à T. *Clar. cent. 5. obs. 88.* Quin & ipse *Hipp. in lib. de superfætation.* Si semen viri sit bene concoctum, calidum & robustum, & illud in duos sinus uteri distribuatur, in duobus. illis sinibus mares duos gemellos concipi ait. Certè multa hæc opinio supponit vel falsa, vel saltem incerta De seminis virilis quoad corpulentiam in uteri cavum ingressu, refutato ab *Harvæo*, (de quo & à nobis in *Microcosmi Genesi*, eidemque adjectis *Curis Secundis*) impræsentiarum nihil dicam: Saltem perperam & contra *αὐτοψίας* certitudinem uteri humani cavo duo sinus tribuuntur, cum sola lineola cavitatis unius ejusdemque regionem utcunque distinguat; ac fœtus contentus totum uteri cavum ex æquo undiquaque ad implere deprehendatur. Loquor de utero humano: Nam alia ratio est uteri bru-

ri brutorum viviparorum, quæ pleraque uterum in cornua utrinque habent diductum, fitque horum conceptus non in uteri propylæo, seu potius non fit in cavitate communi, sed in Cornibus uteri, & quidem sæpius mares in sinistris, fæminæ in dextris (vel saltem promiscuè,) ex *Harvæi* observatione. A ratione id quoque alienum censemus, esse dexteras partes sinistris calidiôres; atque à dextra parte calidius utero semen obtingere. Nec quicquam huc facit, quòd vena spermatica dextra à cava, sinistra ab emulgente originem ducat; hæc enim persuasio ex ignoratione circulationis sanguinis est genita quâ constat non per venas sed per arterias, (quæ utraqve ab aorta procedit,) sanguinem spirituosum ad testes deferri: ut adeò & illa *Heurnii* correctio sit vana & inutilis, quæ *in comm. ad aph. alleg.* quibus dextrum vas spermaticum à renali, inquit, & sinistrum à vanâ cava descen-

descendit, iis sinistrâ mares, dextrâ verò uteri parte potius foeminæ gestantur. Sed circa ipsam quoque seminis materiam fortasse non omne dubium expeditum est. Fallacia Mammarum indicia nunc mitto.

2. Hoc dubium in casu præsentis nobis occurrit, an *labores primi, duorum dierum*, legitimo partus tempore obtigerint; vel an non potius post septimum mensem gestationis præmaturi labores gestanti fuerint oborti, iterumque dolores illi sedati ad decimum usque mensem, nempe ad tempus legitimum. Non congeram hîc multa de septimestri partu, frequentiore quàm octimestri, ejusdemque causis: de quibus *Hippocrates*, & alii passim. Saltem, dubium esse potest, an post irritos labores, legitimo quidem ac naturali partus tempore abortos, supervivere fœtus in utero potuerit ad sex septimanas, tumque demum ad novum exurgere motum?

Haud

Haud eqvidem ignoro, homini præ aliis animalibus incertum pariendi esse tempus, quod ipsum quoque ab *Arist. 4. de gen. anim. cap. 4. & 7. Hist. anim. cap. 4.* itemque *Plin. lib. 7. H. N. c. 5.* aliisque inculcatur: Sed illud incertum tempus potius intra decimum mensem, ceu terminum ordinarium, restringi existimem, quàm ulterius excurrat: Referuntur quidem tum à Veteribus tum à Recentioribus varia exempla foetuum *undecimo, duodecimo, decimo tertio, decimo quarto, decimo quinto* mense gestationis natorum, quorum nonnulla ex aliis commemorat *Spigel. de incert. temp. part.* Ac *Harv. Exerc. de Partu* exemplum refert foetus ultra *sedecim menses* in utero gestati; quin imò *viginti tres menses*, item *duos* atque etiam *quatuor annos* gestatorum mentionem facit *Hieron. Mercurial. in Consil.* Sed circa tales si quidem vivi nascantur in lucem, plerumque id putem locum habere, quod statuit

statuit Hipp. lib. de Natura pueri. Nim.
Si quæ ultra decem menses utero gesta-
re sibi visæ sunt, eas hoc modò falle-
re: Cùm uteri, inquit, à ventre flatum
suppeditante spiritu distenduntur, & in-
tumescunt, tunc mulieres se concepisse exi-
stimant: Et si menses minimè prædeun-
tes longiorem moram fecerint, &c. tunc
in tumorem sublati uteris mulieres utero
sibi gestare videntur: &c. At ubi pòst
conceperint, harum rationum ac rerum
ignara, eo tempore se concepisse reputant,
quo menses suppressi erant, & uteri in-
tumuerant. Eadem mens est Arist. qui
ideo 7. Hist. anim. cap. 4. circa eos qui
undecim mensibus diuturniores sunt, mu-
lierem sui conceptus initium latuisse
contendit: Latet enim mulieres, in-
quit, Conceptus initium, si, cùm antè in-
flatus fuerit uterus, ut sæpè accidit, pòst
coierint, & conceperint. Hoc enim prin-
cipium esse sui conceptus existimant, quòd
simile indicium attulit. Quamvis igitur
ante decimum mensem (quod ordi-
nari-

narium tempus est,) vitales partus fi-
ant aliquando *septimo, octavo, nono*
mense, ut inculcat *Arist. loc. cit.* quin
imò & quandoque *quinto vel sexto*
mense, si vera sunt exempla quæ refert
Harvæus de Partu, ex Valesp. Spigelio,
Avicenna; (de qua re pluribus in *Microcosmi Genes. part. 3. s. 2. §. 83. & seqq.*
differui;) an tamen æqvè post ordina-
rium tempus, quod *decem mensum* de-
finit *Hipp.* partus in longius tempus
dilati vitales existant, id majorem for-
tè difficultatem involvit: Equidem
censui ego *alleg. loc. §. 94.* Ordinario
quidem tempore illo Naturam crisin,
quæ ad partum tendat, moliri solere,
sive ea perfecta, sive imperfecta succe-
dat, sive ad salutem, sive ad mortem;
fieri autem posse quandoque, ut post
tentatam crisin non succedente fætus
exclusionem, mater & fætus in vivis su-
persint; at hæreat etiamnum ad tem-
pus in utero fætus, donec novam ex-
cretionem natura moliatur, fætusque

N

cum

cum natura conamen intendat : Sed addidi , id eo duntaxat casu evenire posse , (meo quidem iudicio ,) cum etiamnum copiosi humores intra Amnion circumfluunt fætum , ipsamque liberiores Respirationem arcant , quam exurgentem , absumpto intra amnion liqvore , imponere sensim necessitatem partui , exposui *ibid.* §. 71. & *seqq.* Utique patet ex iis , quæ illic declaravi , non posse Fætum Respiratione carere , simul atque caput respirando aërem in pulmones adducere ; ac rarefcentibus pulmonibus necessario liberiores Respirationem affectare , vel in utero emori. An autem possit post decimum mensem , (cum copiosiore fœtus alimento jam indiget ,) per multas hebdomadas tantum in Amnio humorum superesse , quod omnem planè Respirationem impediatur , id jure merito tale crediderim de quo possit dubitari : Nec sine ratione mihi quidem videtur , post varia deducta,

ducta, definitum à *Paul. Zacchia Quest. Medico-Leg. lib. 1. tit. 2. quest. 6.* Supra decem dies ultra decimum mensem vix unquam portari posse fætum vitalem.

Sed 3. Posito quòd fortè in Casu præsentì vixerint Fætus ad sex septimanas, post tempus partus legitimum & ordinarium, ut adeò *iterum post sex hebdomadas* a prioribus laboribus, (seu duodecimo mense gestationis,) sub secundo conamine, *motus* novus infantum in utero contigerit; quì potuit ille *quinque annorum spatio perdurasse?* quì potuit fætus præpeditus in exitu tam diu in corpore materno vixisse? Plures eqvidem historias fætuum, quì biennio, triennio, & quadriennio in utero materno fuerint gestati, commemorat *Zaccbias loc. alleg. §. 2. à Schenck. lib. 4. Observ. tit. de Partu* allegatas; sed eas *fabulis & portentis* annumerat; ac pari illas loco constituit cum fabula illa apud *Tri-*

gaut. lib. I. de Christ. exped. apud Sin. cap. 10. quâ fabulantur Chinenſes, quendam eorum Philoſophum nomine Lauzu, octuaginta annis in parentis alvo fuiſſe geſtatũ. Crediderim ego illum *motum* partim ex fermentatione quadam vitioſorum humorum, partimque ex flatibus excitatis fuiſſe obortum. Ita refert *Harvæus Exerc. de Partu*, ſe noviſſe matronam nobilem, quæ plus decies enixa fuerat, quamque menſtruorum ſuppreſſio citra prægnationem nunquam ſefelle- rat; poſtea autem alteri denuptam, præter alia ſigna ſolita, ex *motu* quoque, (quem ipſa, ſororque ejus juxta cubans, ſæpe noctu ſentiebant,) ſeſe gravidam judicâſſe, neque ab ea opi- nione ullis argumentis dimoveri po- tuiſſe, donec tandem ſpes omnis in *flatus* & pingvedinem faceſſeret. Si- mile exemplum refert ibidem Juven- culæ, quæ ſymptomata omnia præ- gnantes comitari ſolita experiebatur,
ipſum.

ipsumque *in utero motum*, jamque indicia imminentis partus adesse rata, cubile, incunabula, cæteraque ad partum necessaria, in procinctu habuit: sed frustra omnia; *motus* enim cessasse, & ventrem detumuisse, absque ulla ægritudine. Similem juvenculam ante biennium hîc ipse sub cura mea habui, quæ omnia ad partum, jamjam imminentem, ut putabat ipsa, parârat; at cujus spes omnis in flatus evanuit.

4. Sed si ergo Fœtus, in præsentî nostro Casu, credendus videatur non ampliùs vixisse, dum motus ille quinquennialis perduraret, quid accidit circa fœtum, vel potiùs gemellos, quos utero gestasse prægnans videtur? Verisimile existimo, sub secundis laboribus (qui tempore legitimo, ac naturæ consveto, sc. sex septimanis post priores illos præmaturos sedatos, denuò fuerint exorti,) cum irritus hîc iterum, ut antè, esset exclusionis co-

natus, suo motu infantes validiores tandem perrupisse ipsum uterum, atque in abdomen proruisse; ibidemque extinctos (vel quòd abruptus umbilicus cum sanguine vitam ipsam profuderit, vel quòd requisitæ Respirationi commodus locus deesset,) in putrilaginem temporis tractu abiisse. Sic in utero quoque fœtus extinctos in putrilaginem abire, exempla testantur. Perire intus conceptum, inquit *Harvæus Exerc. de Partu*, & in putrilaginem versum sensim indies (tanquam fluores albos,) emanare, nonnunquam observavimus, tum in mulieribus, tum etiam in aliis animalibus. Erat non ita pridem Londini mulier, inquit, quæ post ejusmodi abortum, concepit denuò; debitoque tempore infantem peperit; postea verò, interpositis aliquot mensibus, dum consveta obit munia, sine dolore & ægritudine aliqua insigni, prioris abortus officula nigra frustulatim eiecit,

ejecit, &c. In *Harvaei* eqvidem istoc Exemplo dubitari potest, an mulier illa *bipartitum* fortè *uterum* habuerit; velut dubitat *Baubinus in Append ad lib. Rousseti de part. Cesar.* itemqve *Tbeatr. Anat. lib. 1. cap. 38. pag. 127.* an mulieres quæ superfoetare solent, aut plures foetus quam duos generant, *bipartitum uterum* habeant, ut canes, lepores & similia animalia, quæ multos generant fœtus? cujusmodi muliebrem uterum aliquando inventum commemorat ibidem. In præsentî nostro casu putrilago effluere, ipsa-que ossa prodire per muliebria nequiverè, utpote in ipsa abdominis capacitate (dum uteri hiatus coalesceret denuò, quod facile fieri à *Rousseto de partu casareo* aliisque per exempla ostenditur,) undiquaque conclusa: quæ postmodum, factò ad umbilicum sponte naturæ foramine, pro exitu contentorum, per id ipsum emanarunt. Sic & materiæ purulentæ in pectoris

cavitate longissimo tempore conclusæ exempla sunt obvia, nobisque non uno casu observata, ad quos *apb 15. f. 5.* non videbatur pertinere, non nisi ad illos qui ex pleuritide empyi fiunt referendus quod etiam *Gal. in comm.* insinuat. Prout autem corpora infantum abdomine matris clusorum, sensim in putrilaginem abierunt, ipsaque ossa eorundem sensim propius ad invicem collapsa sunt, quin & materiæ contentæ portio aliqua forsan calore dissipata est, vel intra vasa absorpta, ac sensim à natura quibuscunque tandem viis expulsa; ita *sensim* gestans *observavit* molem in abdomine contentam *constringi & imminui*. In difficili eqvidem partu disrupti quandoque ipsam uteri substantiam, ac foetum prolabi in abdominis cavitatem, nec alienum à ratione est, nec caret idipsum evidenti experientiâ: Quod tamen in *Fœtu Muscipontano*, (cujus Casum pronuper Cele-

Celeberrimus D. *Strausius* exhibuit cum erudita Resolutione,) nequaquam potuisse locum habere, ostendi plurib9 in Tractatu quem *Fœtus extra uterum in abdomine geniti Secundinas* libuit inscribere, *Sect.* 20. nec non in *Fœtus ejusdem Vindictis* (adversus Tenebriorem, qui *Blottesandei* nomine ficto varia nostra arrodere instituit,) *Sect.* 3. Unde in *Consideratione Pbyfico-Anat.* Casus illius à D. *Strausio* exhibiti, ostendere conatus sum, *Fœtum* illum *extra uterum in abdomine genitum* fuisse, nempe in uteri Tubis, quam item fuisse Tuæ Excell. sententiam, in judicio lato circa Casum eundem, ex iis cognovi, quæ postmodum Celeberrimus D. *Strausius* collegit, ac denique T. Excellent. *Hist.* 72. cent. 6. Cæterum alias sæpius in partu difficili, vel & alio casu, fuisse uterum disruptum, ac fœtum prolapsum in abdominis cavum, ibidemque sensim in putrilaginem abiisse, sicque ipsam se-

miputridam, vel purulentam materiam, ipsaqve ossa tandem affectatâ per abdomen viâ prodiisse, liquere potest exemplis allatis à D. *Baubino in Append. ad Rouffetum de Part. Cesario, Histor. 5. & 6.* quorum prius item commemorat *Platerus obs. lib. 1. Tit. Part. defect.* ut nunc prætermittam *Salmuth, obs. med. Cent. 1. obs. 16. Sennert. lib. 4. prax. part. 1. §. 2. cap. 17.* aliosqve plures aliorum exempla referentes, itemqve *Albucafin, Marcellum Donatum, Marsilium Cagnatum, Jo. Langium,* à Te allegatos prædictâ *Hist. 91. Cent. 6.* Nec mirum utiqve, Naturam hîc Fœtum putrescentem, vel ossa ejusdem, per abdomen excludere, quæ aliàs passim materiam quamvis irritantem sibiqve molestiam creantem protrudit ac propellit, ac propellendo materiam, eidem interim exitum parat. Sic ossium fragmenta, utut ipsis vulneribus vel ulceribus occlusis, per carnes sanas à natura protunduntur, atqve
ad exi-

ad exitum urgentur. Sic refert *Hildan. cent. 1. obs. 54. & cent. 5. obser. 75.* à *Laurentio Jouberto* ostensum fuisse cultellum obtusum, qui panno obductus ab Opilione alteri cuidam vi in os ingestus & per gulam dimissus fuerit, totoque biennio in corpore delitescens, tandem abscessu in ingvine facto, fuerit excretus, ipseque æger curatus, qui per septennium supervixerit. Historiam refert *Sennert. lib. 5. pract. part. 4. cap. 5.* Studiosi cujusdem, cui cum vulnus cultro infligeretur ad nasi radicem, internumque oculi angulum, cultri vi fracti dimedia pars, digiti fere longitudine inibi infixæ hæserit, quæ post anni quadrantem juxta columellam in faucibus prodiit, ibidemque à Chirurgo exempta est. Simile exemplum hic quoque Groningæ contigit ante aliquot annos, ut nempe homini cui culter per os syncipitis fuerat adactus, longè post tandem à vulnere sanato diffra-

diffRACTA cultri pars media circiter
juxta columellam prodiret, ibidem-
que eximeretur. Aciculam aliquan-
do, quam deglutiverat puer, per scro-
tum prodiisse, memorat *Heurnius*.
Plura id genus Exempla prætereo.
Certè Fœtus illi in nostro Casu extra
uterum prolapsi in abdominis cavita-
tem, molestiam ibidem Naturæ creâ-
runt, ipsaque ossa pungendo, ac mo-
les premendo, dolores continuos in
abdomine excitârunt, quæ adeò Na-
tura, quâ potuit commodè propelle-
re instituit, foramine factò in ipso
umbilico priùs intumescente, pro exi-
tu putrilaginis atq; ossium fœtus uni-
us forsan; alteroque vicino, pro exi-
tu ossium fœtus alterius. Interèa hi
fœtus disruptis membranis atqve ute-
ri substantiâ in abdomen prolapsi,
nullo illic in volucro fuere investiti,
alioqvi nequaquam per partes prodi-
issent: at aliter ille *Musipontanus*, in-
tra uteri cornu perpetuò conclusus,
cujus

cujus tunicam crassiores pro involu-
 lucro habebat: hi nullis ligamentis
 alligati ullis partibus vicinis; at *Mus-*
sipontanus peritonæi productiones, ip-
 sum uteri cornu hinc inde nectentes,
 pro ligamentis quasi habere videba-
 tur: Hi in locum alienum cum vio-
 lentia prolapsi, subitoque extincti,
 non potuere non in putrilaginem
 abire; at ille in loco sui conceptus
 remanens conclusus, cum vita sensim
 est exutus eâ corporis dispositione
 quâ ad putredinem inclinaret, sensim-
 que lapidescens, sicque à putredine
 immunis redditus, eodem statu per-
 mansit, eodem loco naturæ minùs in-
 commodo detentus, quo nempe ab
 initio fuerat conceptus. Dehiscente
 autem in præsentē Casu præ tumore
 umbilico, primùm aliquot diebus,
 dum scilicet nondum eatenus pateret
 umbilici foramen, (quod moliebatur
 natura,) ut contenta in abdomine
 materia promanaret, aqua limpida
 pro-

prodiit, fortasse ex nonnullis lymphaticis Tuis, vel fortè roriferis Bilsii dimanans, vel ipse serosus sanguinis humor, sive ordinarius sive superfluus (nam & diuturno morbo cachecticam pridem evasisse mulierem verisimile videtur,) faciliùs epidermide per umbilici tumorem ruptâ exsudans, ut solet passim post vesicationes aut excoriationes cutis accidere: At foramine magis patulo evadente, ipsaqve carne dehiscente, ex ruptis vasculis sanguis porrò profluxit; donec tandem hiatus in abdomen pateret, ac contentæ materiæ saniosæ ac purulentæ exitum daret; post quam officula præter naturam contenta, naturâ heterogeneam hanc molem respiciente, longo tempore prodibant, ipsumqve foramen apertum servabant; Quod cum post plurium annorum lapsum fuit tandem occlusum, nondum omni materia molestante exclusâ, vel quòd fœtus alterius officula
foran

forſan aliorsùm divergerent , pro ratione loci in qvo computruerat , his aliud foramen à natura est factum , qvo exitum invenirent. Sic eqvidem Natura sibi eligit vias , pro expellendis præter naturam contentis, ad quas ipsa contenta , quæ urgent naturam , imprimis inclinant. Hæc paucis volui ad Casum è Tua Excell. memoratum , Tuo judicio submittere : Nequaquam quòd putem, me videre hic posse , quod ipse non videas exactiùs & perspicaciùs ; sed ut promptissimum ad obsequia Tui Tibi comprobem animum , moremque Tuis desideriis geram.

Quæ prompto calamo & ingenio, vel ad historiam nostram doctè explicandam, vel nervosis dubiis illustrandam commentatus jam est Celeberrimus *Deusingius* in amplum mutui candoris & amoris testimonium, talia sunt, ut si largiore facundia vel eruditione illi respondere præsumam,

inge-

ingenii mei macies & calami fessi obsequium frustra sollicitetur. Plerisq; amicè applaudo, at de reliquis pro Ingera nostra, quæ ansam dedit inusitata referendi, captabo occasionem, versis jam ad exitum rebus, quam brevissimè explicare, de quibus scilicet dubitari posset.

I. An ullo signo gestationem gemellorum colligere potuerit Ingera nostra? Credo ego meram esse conjecturam, siquidem nullum signum certum datur, antequam in lucem gemelli prodeant. Non tumor abdominis, qui major in simplici fœtu aliquando, quam in gemellis, sicut optimè laudatus *Deusignius* scripsit; nec motuum diversitas, quam non rarò in gravidis ex solo embryone tantam observavi, ut jurassem gemellos utero claudi: & in gemellis motum adeò exilem vidi, præsertim ultimis mensibus, quia arctius inter se connexis gemellis, locus pro motu defice-

deficeret, ut pro simplici foetu vix sufficiens videretur. Novi tamen quæ falsæ non sunt in divinatione, quod casu evenisse suspicor. Non enim uterus est bipartitus, sed vesicæ similis, in qua præter communem quandam cavitatem nulla altera apparebat in muliere Ferrariensi gemellos pariente & per Cananum secta, referente *Amato Lusitano* Cent. I. Cur. 27. Nec id indicat externa linea medium abdomen dividens, quod aliqui pro certo signo habent, sed ego falsum in uxore mea deprehendi. *P. Packegvus* Obs. 45. ad Riverium, ultimis mensibus brevi tibias & pedes inflari, inter gemellorum signa numerat, non invita experientia; sed perpetuitatem & in hoc & aliis indiciis desideramus. Rebecca geminos se gestare ex motu vehementi quasi inter se collisorum embryonum suspicabatur, quam DEus suspicionem deinde consultus confirmavit *Genes. XXV, 22. 23. 24.* Dubita-

verat tamen ipsa , quod liquet ex commate 23, antequam Deum in consilium vocaret ; nec mirum , quum primipara esset , & signum ex motu embryonum ante pro gemellis non interpretaretur certò , quia dūbium , quam DEUS ad dignum vindice nōdum acclamaretur. Indicia verò quibus inducta fuit nostra Ingera , ut gemellos suspicaretur , suppeditavit ossiculorum copia , sensim post tot annorum moram excreta, quæ unius infantis esse non posset. Quæ penes me servantur ossicula, numero plura sunt, quam pro uno foetu, in primis capitis, & fatetur mulier hæc , numero totidem abjecta fuisse & neglecta.

II. De nihilo non est, quod in præsentī casu dubitat Cl. *Deusingius* , an labores primi duorum dierum, legitimo partus tempore obtigerint ; vel an non potius post septimum mensem gestationis præmaturi labores gestanti fuerint aborti , iterumq; dolo-

dolores illi sedati ad decimum usq;
 mensem, nempe ad tempus legiti-
 mum. Quamquam enim ita quandoq;
 fieri possit, tamen existimo ex relati-
 one feminæ, legitimum maturi par-
 tus terminum fuisse quo dolores ute-
 ro oborti, & ad puerperium omnia
 comparaverat harum rerum gnara.
 Frustrato verò partu, an superesse po-
 tuerint in viva matre fœtus ad duo-
 decimum mensem, si quæras, vero si-
 mile non credo, tanto tempore re-
 quiescere potuisse sine aliquo vitæ in-
 dicio, quod nullum fuisse, puerperæ
 testanti credimus. Recitat historiam
Horatius Augenius l. 2. de Hom. Part.
 c. 26. Lucretiæ Amici Scalini Camér-
 tis neptæ, quæ transacto decimo men-
 se, nec parturiente, dubitare cœpit an
 gravida esset. Ad Consultationem
 verò cum aliis vocatus *Augenius* & ge-
 stare uterum, & malum habere habi-
 tum dicebat. Erant autem conjectu-
 ræ præcipuè tres, quæ in utero habe-

re mulierem ostendebant. Una, quod lac in mammillis haberet licet paucum & aquosum : altera erat motus in utero perceptus à muliere judiciofa, & quæ alios portavit filios. Tertia, quod septimo mense & nono, quibus nasci solet homo, motus magis conspicuus apparuerit. Hæc anui partus historia, tempus quidem ad mensem duodecimum extendi posse docet, sed motu interea embryonis se prodente, qui cum cessaverit apud nostram spatio VI. hebdomadarum, vitam gemellis superfuisse persuadere mihi vix possum. Motus enim vitæ indicium, quo non aliud certius aut prægnantes habent, aut Medici de vitâ foetus judicaturi. Id illustrare lubet exemplo istius mulieris gravidæ septimestris Bruxellanae, quæ A. C. 1633. convulsionibus epilepticis die Jovis circa nonam vespertinam suffocata credebatur. Die Veneris spuma ex ore matris prodiit, exauditus mur-

murmurillus, quasi vagientis infantis in utero matris, tumq; venter ab assidentibus observatus attolli ac deprimi. Die Sabbathi circa decimam matutinam profluvium sanguinis coëgit adstantes denudare corpus, & intra femora matris provolutus infans deprehensus adhuc calidus. Inde nata quæstio, An fœtus extinctæ matri tamdiu superstes fuerit, ut post 36. horas ab interitu Matris, vivus suopte impetu ab ergastulo suo erumpere potuerit? Proposita illa fuit Medicis Gallis tum Bruxellis degentibus, inter quos erat *Jo. Riolanus*, quorum responsum in Anthropologiæ ultimæ l. VI. c. 8. legitur. Missa quoq; fuit ad Medicos Patavinos, quorum responsiones in Synopsi editæ fuerunt cura Magistri *Serafini* Patavini Augustiniani, quam hic repetere placet, non facile cuivis obviam.

Ad Primum: *Utrum infans post obitum Matris potuerit nasci, si non vixisset*

xisset tempore suæ nativitatis? Ex communi ferè omnium consensu statuitur Infantem tempore nativitatis suæ, omninò vixisse, quod comprobatur ex eo, quod ante partum, validè in corpore materno commotus fuerit, atq; in ipso partu ventrem matris sublevaverit. Supervixisse etiam ad tempus, post partum, à nemine negatur, quia vagitus Infantis evidenter perceptus fuit. Confirmat idem corpusculi tepor, labiorum rubor, & genarum divaricatio, atq; eorundem postea superveniens frigus & rigiditas. In illo dissentiunt: Utrum Infans natus fuerit in ipso agone mortis maternæ; an verò mater prius mortua, & paulo post Infans ex utero prodierit. Priorem sententiam tenent illi, qui existimant matrem ob salivam apparentem, & calorem circa ventrem, ac lumbos perseverantem, (ut in multis fieri solet Epilepticis mulieribus) non fuisse verè mortuam si-

am si-

am sicut adstantibus videbatur. Posterioriorem amplectuntur illi primò, qui indubitata fidei exempla adducunt, Infantium scilicet, paulo post extinctas matres ex utero erumpentium: deinde quod facta commotione corporis materni, nocte subsequente observata, nulla amplius signa vitæ præsentis apparuerint.

Ad secundum: *Utrum secundum Naturæ cursum, & rationem naturalem non sequatur, ut res vera & necessaria, dictum infantem vixisse post suam natiuitatem, & quod per copercula, aut aliter per materiam sangvinolentam fuerit extinctus, & suffocatus?* Ad hanc quæstionem, communi consensu determinatur, Infantem, partim ob nutrimenti defectum, corpusculi lassitudinem, sangvinisq; malignitatem, partim verò quia pronus jacuit, & stragulorum pondere oppressus secundinisq; implicitus fuerit, suffocatum interiisse.

Et Parisiensibus & Patavinis Medicis pro foetus vitalitate argumenta motus suppeditavit, quicum in nostris gemellis tot hebdomadis observatus non sit, neq; interea vitam habuisse credendi sunt.

III. Multò minus postliminio quasi reducta vita per quinque annos in utero perdurare potuit, quanquam id sibi Ingera falsò persuaserit. Nostræ igitur pronuper in hac Dissertatione productæ consona est Cl. *Deusingii* conjectura, motum illum partim ex fermentatione quadam vitioforum humorum, partimq; ex flatibus excitatis fuisse obortum : quanquam nobis videamur propius scopum ferire, quando ebullitionem à putredine carnosarum partium hic expressimus, quæ tamdiu observata fuit, donec sola ossa sicca remanserint. Flatus solos mihi suspectos reddidit *Horatius Augenus* l. d. qui contra eos qui motum quem in utero Lucretia perceperat, fieri

fieri à flatuoso spiritu contento in utero ob magnam viscerum imbecillitatem affirmabant, tribus argumentis insurrexit. Primum quidem, quod flatuosus spiritus non debebat facere negocium magis uno, quam alio mense: flatus enim continuam inferre debuisset molestiam: secundò, flatus dum movetur, dolorem facit, at hic motus erat sine dolore. Tercio, mulier erat maximè experta in discernendo motum à flatu & à puero. Eadem difficultates urgent flatus, quos Ingeræ nostræ assignamus, hoc tamen discrimine, quod sine dolore non senserit. Cætera, continui non fuere, nec esse debere, quia causa flatulenta continua non fuit, sed pro humorum motorum periodis affligens: & ab ebullitione parvo discrimine flatus distant, quos cum fermentatione recentiorum, ferè ubiq; *Hippocrates* confundit, etiam, quum de semine maximè loquitur, & de pueri confor-

O 5

matio-

matione. Quamquam deniq; ipsa hæc mulier experta sit & aliis puerperiis edocta tam propriis quam aliarum, quibus obstetricatur, flatus ab embryonis motu discernere debuerit: tamen in casu hoc insolito, cui similem illa non viderat, facile imponere ipsi similitudo utriusq; potuit.

IV. Irrito exclusionis conatu, suo tandem motu infantes validiores per-
rupisse ipsum uterum, atq; in abdomen proruisse, ibidemq; extinctos si-
ve à rupto umbilico, siue denegato
respirationi requisitæ loco, in putri-
laginem temporis tractu abiisse, in-
geniosè suspicatur Cl. *Deusingius*, à
quo amicâ voluntate dissentire, sine
ullo animorum dissensu, cogor. Cre-
do enim in utero mansisse gemellos,
donec apostemate ruptus uterus ossi-
cula residua adhuc, expelleret per um-
bilicum & ilia, quod pluribus jam an-
te persequutus sum. Nec enim ullam
necessitatem video, ut subitanæam &
vio-

violentam rupturam hic fingamus, quum nulla signa vulnerati uteri recenscantur, nullus rupturæ strepitus aut sonus, nec revera ullum impellens. Uteri enim capacitas adhuc tanta fuit, quæ contineret gemellos, præsertim jam mortuos & ab incremento remotos. A *Celso* l. V. c. 26, recensentur signa percussæ seu vulneratæ vulvæ, dolor inguinibus & coxis, & feminibus, sanguinis pars per naturale descendit, vel naturalia, ut *P. Pavius* in Codice suo, qui apud me servatur, emendaverat, vel naturam, quod in editione Doctissimi van der Linden substituitur: Vomitus bilis insequitur: quædam obmutescunt, quædam mente labuntur, quædam sui compotes, nervorum, oculorumq; dolore urgeri se confitentur, morientesq; tandem eadem quæ corde vulnerato patiuntur. Nihil horum passa est nostra Ingera, quanquam dolores acerbissimos senserit quum per apostema-

stemata successivè uterus vicinæq; partes per quas officula prodire, exulcerarentur. Vulnus hoc uteri, quod ab interna causa fit, gravius est, quam si ab externa infligatur, graviusq; est, quia subito & magna vi, à causa magna, magnam vim secum trahit, quam si sensim ab ulcere aperiat, quod in hoc casu opinatus sum. Non quod prorsus rejiciendam putem conjecturam *Deusingii*, Viri ingenio magni, sed quod rupturæ violentæ uteri nulla indicia inveniam, quæ nos cogant id statuere, deficientibus symptomatis in simili casu consuetis, malui in diversam ire sententiam, quam ante elegi quam quidquam de laudati Viri conjecturâ præscirem. Uterus quidem feminæ Lipsiensis in difficili partu ruptus ad ilion dextrum prope cervicem ad dimidiæ spithamæ longitudinem notatur à *Salmutho* Cent. I. Obs. 16. & *Tob. Knoblochius* apud *Horstium* Epist. Med. Sect. XVII. si.

XVII. similem rupturam infante extra uterum posito observavit; Sed nec hic nec ibi Mater superstes esse potuit. De ulcere verò uteri loquuntur historiæ à *Platero* l. 1. Obs. tit. de Part. defect. & *Baubino* in App. ad Rosset. hist. 6. 7. signatæ, quo ulcere successivè factò, ex utero effluxere ossa perq; musculos abdominis exulceratos permearunt, quod etiam confirmat *Albucaſis*, *Benedictus*, *Cordaſus*, hoc nomine quoq; laudati *Sennerto* l. IV. Prax. p. 1. f. 2. c. 18. An autem foetus interea in abdominis cavo hæserint, vel in utero remanserint, non additur, ut de posteriori major sit suspicio, præsertim quum in simili casu reapse id viderit *Augenius* l. 2. de Part. c. 27. suo loco à me productus. Ad argumenti illustrationem facit historia nuperrimè descripta ab *Henrico Roombusio* Chirurgo Amstelodamensi in Belgicis Observationibus part. I. Obs. 1. de femina ingentes dolores passa circa

circa umbilicum partus tempore , uteri osculo clauso & firmo chorio parere haud valente, exindeq; cum foetu mortua.

In aperto enim cadavere operâ exercitatissimi Viri *Francisci Sylvi*, inventus est 1. foetus nuperrimè mortuus inter intestina situs, 2. secundinarum pars intestinis accreta, 3. reliqua pars adhuc utero connexa, 4. magna ruptura uteri, 5. in abdomine sanguis concretus niger. Iconem ibidem addit, & ad oculum rem iconē dignam demonstrat, ut exinde appareat pro argumento nostro magnos dolores in hujusmodi ruptura uteri subesse, nec diu superstitem esse posse foetum in loco alieno maturum, & miseram matrem evadere non posse, causam deniq; impediti partus naturali via, fuisse arctam uteri clausuram & chorii densitatem, de quibus nos in Dissertatione hac non ita pridem prolixius egimus, ut hic jam, finitis
qvæ

quæ de hoc inusitati partus argumēto dici in exemplum Naturæ varian-
tis poterant, pedem figere liceat. De
cæteris nolo quisquam expectet judi-
cium meum. Pro me enim peroret
Symmachus l. 1. Epist. 83: *Quid varia
ingenia senserint, res intimavit. Fuit
enim in nostra oratione quod unusquisque
diligere, & pro genii sui qualitate lau-
daret. Nobis ad testimonium religionis
& diligentiae satis est, non siluisse vel
sententiam cæterorum, vel observatio-
nes doctiorum.*

DUlm ad exitum hic fatigato prælo
decurrerent operæ, tempestivè
mihi visus est & lectus *Jacobus Prim-
rosius* de Morbis Mulierum & Sympto-
matis, qui Lib. 4. c. 7. historiam de
Partu prodigioso, qui visus est in agro
Gradiniano juxta Burdigalam A. C.
M D XCV. mense Aug. cum *Stephani
Manialdi* Medici Burdigalensis in eandē
obser-

observatione eruditâ, breviter config-
nat, quam Coronidis loco appendam,
quia ad argumentum nostrum specta-
re videtur, nec postea verbum am-
plius addam.

Giralda Fontana conjunx *Grimonis*
Tiaci villici in agro *Gradiniano*, haud
procul urbe *Burdigala*, annos triginta
nata, foetus octo jam enixa, in quo nu-
mero editi sunt postremo patu gemi-
ni, Anno 1591, mense Martio, iterum
utero gestare coepit: cumque foelici-
ter ad nonum mensem & partus ge-
rendi & pariendi statutum tempus
pervenisset, dolor continuus lumbos
& inguina fatigat; tormina vexant,
locelli humectantur. Accersitur ob-
stetrix, gravidam partui exponit, ad
enixum hortatur, effertur humor len-
tus, aquosus & copiosus: vanus tan-
dem & irritus parturientis conatus.
Ab eo tempore mansit in utero sine
motu foetus, utpote intus emortuus.
Symptomata tamen quæ foetum mor-
tuum

tuum comitantur, aut nulla, aut pauca supervenerunt, nec illa multum gravia: adfuit ventris gravitas & spiratio graveolens: purgationes non apparuerunt. Post hæc mulier nec foetus motum, nec tormina sentiens, nullisque gravioribus doloribus devexata, insignem tantum in abdominis parte dextra tumorem deprehendens, consilio Medici cathartico duobus diluculis corpus expurgat. Purgatio tumorem nec tollit, nec minuit. Post aliquot dies ægrota sanitati restituitur, rebus rusticis gerendis dat operam. Ex utero sano per biennium menstrua certis stasisque temporibus fluxerunt, donec mense Majo, anno 1594. rursus concepit: venter intumescit, elucent veræ conceptionis signa; suo tempore concepti foetus motum observat. Octavo tamen mense cum sentit foetum inordinate & violenter moveri, premitque dolor in lumbis & in imo ventre, memor

præcedentis *duroxiæ* unam atque alteram convocat obstetricem, oratque ut omnis adhibeatur diligentia, ne sibi, vel foetui, calamitas ulla superveniat. Obstetrices ubi manum ventri admovent, nullum deprehendunt motum, evanescunt tormina, frigus in imo ventre sentitur: statimque suspicantur, vel extinctum foetum, vel e mentitam graviditatem: sic miseram illam æquinoctiis & doloribus confectam & afflictam, non tamen fractam aut victam deferunt & naturæ committunt. Ex utero per tres ferè menses mali odoris sanies profluxit: apparet tumor durus & ingens in parte abdominis læva, remanetque superstes adhuc manifestus & admodum molestus in altera abdominis parte tumor. Mulier interea propter ingestibile utrumque hoc onus, & propter malignos ex utroque foetu emortuo enascentes vapores exanguis & exanimis, cum nec rebus gerendis vacare
nec

nec stare posset, lectulo decumbere cogitur: sensim tamen moribunda miraculo quodam ex orci faucibus eripitur. Natura enim, quæ solet esse sui conservatrix, alienatum ab integro, mortuum à vivo separare contendit; mense etenim Junio, anno 1595, in ipso solstitio, abscessum molitur circa umbilicum in dextra abdominis parte. Huic cum vicina mulier aliquid puri movendo accommodatum imposuisset, tandem adaperitus est secundo die mensis Augusti, ex quo foetidi puris ingens erupit copia, & cum eo subpallidum os excernitur, quod admirata mulier, cum in abdomine non sint ossa, Chirurgum pagani convocat, qui abscessum jam apertum specillo explorans, ossa deprehendit, quod etiam ipse miratus, Jacobum Noierum Chirurgum Burdigalensem τῆς ἐμβρυολογίας peritum in consilium adhibendum censet, qui ubi foramen abscessus videret angustius,

stius, incidit, donec satis pateret: tum
 ferramentis ad id paratis emortui &
 jam à quatuor fere annis corrupti fœ-
 tus ossa frustillatim excernit: cùm-
 que idem tentaret in altero fœtu, qui
 à novem ferè mensibus in læva partē
 abdominis jacebat extinctus, palli-
 dam & languidam mulierculam de-
 prehensens, negotium in aliud tem-
 pus distulit, mihiqve hujus rei miran-
 dæ novitatem & raritatem communi-
 cat. Ego nullam moram interponen-
 dam putavi, quia rem istam admira-
 bilem viderem: itaque confestim ad
 mulierem ire perreximus decimo sex-
 to die mensis Augusti, tum ut in hoc
 gravissimo & periculi pleno casu mu-
 lieri suppetias ferrem, tum etiam ut
 incredibilem hunc partum *ἀποψία* ip-
 sa confirmaret. Ascivi etiam de indu-
 striâ *Joannem Danetum & Leonardum*
Villechabrolum Chirurgos *Burdigalen-*
ses, ut hæc res multorum oculis esset
 testatio. Ad eam cùm pervenissemus,

mus,

mus, primùm percontati sumus, quemadmodum se haberet, tum prætorum affectuum naturam, causas, signa ab ipsa ægrotante, à conjuge, ab obstetricibus & ab aliis, qui adfuerant, cognoscere volumus. Quæ ubi longa satis inquisitione fuerunt explorata, bono & forti animo illam esse jubemus, omnibus artis nostræ præsidiiis opem nos laturos bonâ fide pollicemur: tandem locum affectum ventrem nempe ipsum inspicimus, in quo abscessus foramen, in dextra abdominis parte juxta umbilicum observamus, per quod fœtus prioris emortui ossa cum copia puris excreta fuerunt: in læva verò parte abdominis, tumorem insignem eumque tactu durum deprehendimus, ibique extincti fœtus posterioris calvariam subesse prædiximus. Quam cum per foramen abscessus educere nos posse non videremus, quoniam jam illud carne replebatur, de dilatando orificio cæ-

pimus cogitare, vel de epigastrio sinistro incidendo, totumque negotium in alium diem differimus. Vigesimo ejusdem mensis Augusti die rursus ægotantem invisimus cum iisdem Chirurgis. Adfuerunt præterea Dominus *Brietus* Medicus peritissimus, *Joannes Eimericus*, *Joannes Duvernacus* Chirurgi, *Sebastianus Cavaillanus* Pharmacopœus, qui non solum rei hujus admirandæ spectatores oculati esse voluerunt, sed fuerunt etiam mulieri ad recuperandam valetudinem cordati authores. Itaque tunc communicatis consiliis, quod abscessus foramen angustius videbatur, in altera abdominis parte procul ab abscessu, secandum epigastrium statuimus, qua parte eminebat tumor, quem demortui foetus calvaria denotabat. Sectionem respuebat mulier: cum tamen necessariam esse persuasissemus, exhibuimus potionem cardiacam, ne vires deficerent: statimque præcidi

abdomen, & per locum incisionis, e-
mortui foetus ossa membratim edu-
ximus, & protinus vulneris oras quin-
que futuris junximus, sperantes reli-
quum puris per abscessus foramen ex-
cludi facile posse; ex quo tamen fo-
ramine jam calloso, in posterum non-
nihil puris effluxurum reformidamus.
Cæterum impositis quæ vulnus inci-
sionis glutinarent, mulier brevi cura-
tur, & deposita utriusque cadaveris
molestissimâ mole, pristinae sanitati
restituitur, quæ etiam nunc integrâ
fruitur, præter omnium spem, admi-
rando Dei beneficio.

Divinum & admirabile est sum-
mi opificis opus & institutum, quòd
ad conservationem singulorum gene-
rum machinatus est, & ad propagan-
dam successionem tanquam unicum
perpetuitatis subsidium excogitavit,
ne viventium omne genus conditio
mortalitatis extingueret. Generatio
certè hominis nobilissima est, & quod-

dam veluti naturæ miraculum : cuius opificiî solertiam incredibilem si quis velit attentius speculari , mente admirari poterit , non voce effari , nec pro dignitate recensere . Molestus essem & ineptus , si de hominis conformatione copiosius hoc loco vellem differere : à proposito enim me longius abduceret nusquam alibi spectatior hæc naturæ fabrica : Itaque ad historiam venio . Mulier hæc firma corporis constitutione & integra sanitate fruens , ante trigessimum ætatis annum , octo foetus , inter quos postremi gemini fuerunt , foeliciter utero gestavit & in lucem protulit . Cum autem nonus foetus ad nonum mensem pervenisset , nescio quo fato in utero extinctus , nulla foetæ contentione excludi , nulla obstetricis attractione educi potuit : quod non ita mirum , foetus enim emortuus *μὲγα ἀναισθητός* *ἢ πρὸς τὴν ἀναισθησίαν* , hoc verò mirandum , quomodo mulier in vitæ disci-

scri-

scrimen non venerit, intus emortuo & putrescente foetu, quum secundæ relictæ & in utero putrescentes sæpius puerperam in mortem præcipitent. Illud omnem admirationem longè superat, foetum mortuum in matris alvo quatuor annos remansisse. Quod sequitur, non tantum mirabile, sed potius incredibile videtur, mulierem eo tempore non modo sine vitæ periculo & absque corporis molestia fuisse, sed sanam vixisse, rebus rusticis operam dedisse, menses ei per biennium fluxisse statis temporibus: tandem quod est *ἡμίμα ἡμισυαρόμενον*, iterum concepisse, foetum in utero per octo menses sanum gestasse, eundemque tum mortuum, per octo alios menses pertulisse in alvo, & tandem duorum horum cadaverum deposita sarcina, non modò superstitem, sed firma & integra valetudine fruentem, etiam nunc vivere dum hæc literis mandamus mense Decembri anno

1595. Amplissimus sane disputationis campus sese nobis offert, in quo tamen latius spatium nec libet, nec licet. Ne quis verò partem hunc incredibilem judicet, ostendam primum, nihil novum aut inauditum contigisse; deinde cur hæc sic evenerint, causas explanabo. Exant in Medicorum veterum & recentiorum monumentis similia exempla, quorum nonnulla in medium proferam, ut hujus etiam partus veritas elucescat. *Albucaſis* inter *Arabes* nobilissimus Medicus & Chirurgus, *secundo libro methodi medendi*, similem ferè historiam describit his verbis: Vidi ego mulierem, in cujus ventre mortuus erat foetus, nihilominus imprægnata, postea mortuus foetus etiam secundo conceptus, accidit ergo ei post longum tempus abscessus in umbilico, & in tumorem attollitur & increſcit, donec apertus capit emittere pus. Vocatus sum ergo ad curationem ejus; & cum

& cùm multis remediis impositis coalescere non posset vulnus, superposui medicamenta valdè attrahentia, & sic excretum fuit os; & paucis post diebus exivit & aliud os; miratus sum ergo, cùm in ventre non sit os; causam tamen diligentius expendens & mecum omnia repetens, deprehendi esse ossa fœtus emortui. Causa igitur morbi certò cognita, medendi-que rationem hanc secutus, extraxi ossa multa, mulierqve pristinae sanitati restituta, diutius postea vixit: ex ulcere autem semper puris nonnihil fluxit. *Matthias Cornax* Medicus *Cæsareus* scribit hospitam quãdam *Vienne* in *Austriâ* quatuor annos fœtum emortuum in abdomine gestasse, quod ex cavitate uteri putrefacti penetraverat in vacuum abdominis spatium inter intestina & peritonæum: cùmque tumorem ingentem in ventre excitasset, adaper- tus est in medio epigastrio, ut vacuaretur abscessus. Perque illud
fora-

foramen ejectus fuit foetus non ita corruptus; quod mirum est, quin facile virilis sexus discernereetur. Illa verò sanitati restituta iterum concepit, foetumque ad legitimum pariendi tempus tulit, sed propter pariendi difficultatem, cum foetu perit mater, ex cuius ventre post obitum detractus fuit foetus. *Joannes Langius* Palat. electorum ἀρχίατρε^ς *epist.* 39. *lib.* 2. admirandam foetus in utero mortui excretionem recenset his verbis: *Andree* cujusdam uxor, foetum viventem aliquot menses in utero gestaverat; & quum jam tempus enixus appeteret, ubera ejus prius turgida lactis aqvosi rore madebant, ac decredebant, nec puer in utero subsiliit, quæ signa foetum mortuum testabantur. Tandem foetus in matrice putruit, cujus de cruribus & cranio ossa denigrata & carie obsita, incredibile dictu, sed verum, quum mulier ob intestini exulcerationem alvi profluvio

fluvio laboraret, tandem anno decimo, non per uteri ostiola, sed per anum excrevit: mulier tamen illa vel hodie adhuc est superstes. *Rondeletius* Medicinæ Professor regius in scholâ *Monspeliensi*, libri tertii *methodi curandorum morborum* cap. 65. scribit se vidisse puerum in utero putrefactum & frustulatim rejectum, relictis magnis ossibus in eodem utero per longum tempus, quæ post in utero matris mortuæ reperta sunt. Uxor autem fuit Chirurgi *Monspeliensis*, qui post mortem ut causam alicujus interni affectus cognosceret, passus est illam dissecari. Quid memorem portentosam illam & gypseam lithopædii sive embryonis lapidei & instar Niobes indurati in utero per 28. annos gestationem in civitate *Senonensi*? quam *commentario septimo* in *Hippocratis* librum priorem de mulierum morbis elegantissimè recenset *Mauricius Cordæus* Medicus *Parisiensis* doctissimus. Multa præ-

præterea similia exempla possunt proferri, sed diutius in his recensendis non immorabor: ad occulta enim & abstrusa naturæ opera, quæ in hoc partu apparuerunt, mea festinatoratio, si prius de naturæ miranda vi pauca dixerò. Natura ab antiquis philosophis variè usurpatur. Fuerunt enim qui naturam vocarunt primum rerum omnium principium. Alii dixerunt esse rerum omnium matrem, quasi dicerent, omnia sua sponte esse nata. Alii Naturam esse censent vim quandam sine ratione cipientem motus in corporibus necessarios. *Aristoteles* Naturam facit duplicem, materiam & formam. *Stoici* uno naturæ nomine duas res diversissimas comprehendunt, Deum & Mundum, Opificem & opus: Zenoni natura dicitur ignis artificiosus ad gignendum via progrediens. Communis loquendi ratio recipit, ut quòd est insitum quibusque rebus, Naturam
appel-

appellemus. Medici Naturam definiunt temperamentum in spiritu & humido primigenito situm. Alii credunt esse universam substantiam & temperiem, quæ ex primis quatuor qualitatibus conflatur: & *Galenus* scribit, hoc esse *Φύσις* significatum *καταστάσιν τὴν καὶ πρῶτον*. Quibusdam natura est calidum innatum, quod saltem est primum naturæ instrumentum: & naturæ sanè mirifica est vis & admiranda potentia, non solum in homine formando, alendo, augendo; cum sit omnium functionum naturalium causa, sed etiam in conservando & à mortis injuria vindicando: in morbis enim crises molitur, humores noxios coquit, à bonis secernit & tandem excernit; & in hac parte occultos & arcanos naturæ motus sæpius admiramur, vel, ut veriùs loquamur, plurima à naturæ conditore præter naturæ ordinem fieri videmus. Quod in hoc partu prodigioso quis non videt?

det? quomodo enim foetus mortuus putrescens uterum non affecit? quæ via ex utero egressus abdomen occupavit inter peritonæum & intestina? qui utero lacero & putredine corroso, medicam manum admovit? quo remediorum anxio apparatu potuit coalescere & pristinum robur recuperare? quomodo denique per biennium fluxerunt menses iterumque concepit? Crescit certè apud me hujus rei admiratio, dum omnia diligentius inquirō. Sed jam horum etiam causas ex medicinæ adytis & Medicorum edictis depromamus. Si secundæ (sic secundum foetus domicilium & internum infantis velamentum nominant) in utero diutius retineantur, dolores, labores & pericula non contemnenda imminent: putrescentes enim in utero, non exiguam noxam afferunt stomacho, cordi, cerebro, foedis vaporibus ad eas partes transmissis. Venter etiam durior intumescit,

scit, suffocatio non raro accidit & stranguria, præterea febris, aliaque gravia & periculosa symptomata succrescunt. Ex foetu vero mortuo hæc eadem, sed multo graviora nascuntur: sæpiusque matri calamitas supervenit cum anorexia, siti, horrore, dolore, dentium stridore, graveolente spiratione, ventris intensa frigiditate, febre, delirio & mortifera nervorum distentione. Quod si ocyus non eximatur e mortuus intus foetus, ex ingenti frigiditate tantam labem concipit uterus, ut vix postea ad antiquum reducatur statum. Nihil tale puerperæ huic contigit, sed brevi partus doloribus vacua sanitati restituitur, & uteri ipsius œconomia nullo modo labefactatur, imò intra paucos menses ex naturæ præscripto menstrua purgatio erumpit, statisque & certis temporibus recurrit. Mira solent esse naturæ robustæ & benè temperatæ opera: rectè à *Galeno* dictum, vires valentes & robustas omnia

Q

con-

contemnere & tolerare, infirmas verò absq̃uovis offendi. Sed ne diuturniore in utero mora foetus emortuus partes principes offenderet, natura, quæ solet esse ad noxii expulsionem quàm ad utilis attractionem diligentior, exitum brevi molita est? & erosa ea uteri parte, quæ ingvini adjacet foetus mortuum expulit ad inane illud spatium inter peritonæum & intestina quòd in abdomine subest. Sic natura licet *ἀρχὴ θευπὸς καὶ ἀδιδάκτ* & locum convenientem delegit, in quem sarcinam cadaveris extincti detruderet, & vere dixit *Hippocrates ἀνευρίσκει ἢ φύσις ἑαυτῇ τὰς ἐξόδους*, natura sibi viam molitur: & si robusta sit, materiam etiam crassam per exiles transmittit meatus, & per ossa etiam abscessus. Cæterum per inferiorem & orificio uteri vicinam partem foetus hunc expulsus fuisse, fidem mihi fecit uxor *Guilielmi Moræ Bibliopolæ Burdigalensis*. Cùm enim hæc per triduum aut quatrimum in
diffi-

difficili & laborioso partu fuisset, tandem cum langverent vires, dum sudor frigidus erumperet, nec moveretur partus, accersor ipse Calendis Septembris, anno 1595, ut potionem præscriberem, quæ foetum propelleret. Ego dum video puerperam ægrè membra sua attollentem, somno oppressam cum langvido & debili pulsu, dum animadverto mollius esse corpus parturientis & colorem subalbidum, dum etiam deprehendo frigere abdomen, prædico foetum esse mortuum, & matri in propinquo adesse mortem. Itaque reficiendis matris viribus præscribo cardiacam potionem ad foetum educendum, enema injiciendum svadeo, ut hoc pacto irritata natura cum excrementis foetum etiam mortuum deturbaret. Sed frustra omnia & assumpta & injecta fuerunt, mater enim obiit sequenti nocte. Pater verò Chirurgum statim convocat, qui foetum quem suspicabatur superstitem, ex utero per incisionem eximeret. Chirurgus epigastrii sinistram partem sectione cum aperuisset, foetum emortuum deprehendit inter peritonæum & intestina, qui inferiorem uteri partem sinistram ad inguina corrodingo penetrarat; cujus rei spectato-

rem me voluit esse. Ibi ego & uteri crassitudinem duorum saltem digitorum & partem uteri corrosam admiratus sum, & statim conjeci eam esse partem, quæ in partu hoc prodigioso exitum præbuit cadaveroso utrique fœtui.

Difficilis nunc & penè inextricabilis superest quæstio, quo modo corrosus uterus matri non fuerit exitialis, & quibus viis sanus factus coalescere potuit. Primum quidem hujus quæstionis caput non ita obscurum videri debet; quamvis enim ulcera uteri contemnenda non sint, quòd locus excrementis & putredini pateat, quodque nervosæ sit substantiæ, tum quòd periculosiora videantur ulcera, quæ ex corrosione sunt orta, cujusmodi fuerunt ista à putrescente fœtu utrinque excitata, attamen quotidianus rerum eventus & Medicorum omnium consensus docent non esse insanabilia uteri ulcera, ὥσπερ γὰρ ἡ μήτρα πολλάκις ἰσθρῆται, ἀφαιρεθῆναι, καὶ θάνατον ἰσθρῆταις μὴ γινώσκει. Constat plerumque, tota ablata matrice, mortem non inde sequi, ut testatur *Paulus Ægineta*. Uterus enim non solum proci-
dit, sed etiam in quibusdam præciditur, nec
tamen

ramen mortem affert, ut *Themiso* literarum monumentis consecravimus. Scribit etiam *Soranus*, in *Gallia* suos habitiores & validioris alimenti fieri postquam uterus abscissus fuerit, quod nemo non observat quotidie. Alteram quæstionis partem paulò obscuriorem jam explicemus, & fateamur verissimum esse senis illud oraculum, *νέσων φύσεως ἰητῆρες*, naturas morborum esse Medicos. Hominis certè natura semper præcipuus & internus est morborum Medicus; ἡ φύσις ἀπάσων τεχνῶν πρώτη καὶ κυριωτάτη ἰάσεως à *Galeno* merito censetur. Arcanis quidem & occultis motibus ea perficit natura, quæ fieri non posse videntur. Sic insanabiles quidam morbi naturæ potentia & bonitate superantur, eaque sæpe sine Medici officio morbos pellit: Medicus verò nunquam sine naturæ ope vel minimam ægritudinem potest propulsare, ut verum sit illud vetustissimi Medici, *ἔδὲν ἀντὶ φύσεως γίνεται*. quod in hac puerpera luce meridiana clarius apparet: siquidem natura viribus suis utens, nostra cognitione profundiora peregit, reconditis enim & arcanis viis uteri utrunque ulcus ad cicatricem perduxit, quod nec solers Medico-

rum industria , nec operosa Chirurgorum manus fortasse præstitisset. Sic naturæ solertiam nulla ars , nulla manus , nemo opifex consequi potest imitando , ut pereleganter à *Mario Tullio* dictum est. Quis enim crederet utrum remediis è naturæ sinu depremissis , non solum integrè sanum redditum fuisse , sed etiam ad concipiendum aptum idoneumque prioris foetus cadavere ex matris alvo nondum expulso ? Multa certè fieri non posse judicantur , priusquam sint facta ; & in multis naturæ vis fide caret , in iisque occultis naturæ operibus non ratio semper quærenda subtilius , sed cum admiratione spectandus effectus , fatendumque est multa in corporibus nostris quotidie fieri , quorum vim naturamque perspicere non possumus. Soli autem naturæ opifici naturæ opera perfectè nota sunt , qui causis omnibus naturalibus liber & solutus naturam ad ea peragenda dirigit , quæ humanæ mentis caput excedunt. Ego autem imbecillitatis meæ mihi conscius , & tenuitatis ingenii mei non immemor , nolo aliùs hæc mysteria scrutari , nec curiosius arcana naturæ rimari : nolo etiam posteros hoc raro & mi-

ranilo

rando spectaculo fraudare, nec recondere & intra me unum perire quæ vidi & novi: ab occultandis enim iis quæ hominum vitæ prodesse possunt, mei mores plurimum absunt. Itaque hanc historiam ex fide descripsi, fidisque testibus confirmavi, ut ea fidem apud posteros posset invenire.

Index Capitum.

Cap. 1. Historia Partus mirabilis, & dissertationis occasio.

Cap. 2. Legitimum & statum partus terminum, nec in hac muliere, nec in aliis unquam variare.

Cap. 3. Cur gemelli legitimo partus tempore via consuetæ editi in lucem non sint?

Cap. 4. Repigrationem horum gemellorum supra naturalem non esse.

Cap. 5. Cur per orificium uteri ossa gemellorum non prodierint?

Cap. 6. Vicinitatis jus in ossum horum per varias vias excretionē.

Cap.

- Cap. 7. De Christi nativitate miraculosā.*
Cap. 8. De Capite Puerpero.
Cap. 9. Ex ore nativitas.
Cap. 10. Fœtus ex umbilico exclusi.
Cap. 11. Embryones ex Tuba Veri erumpentes, ubi & de Fœtu Mussipontano differitur.
Cap. 12. Ex hypochondriis fœtum nonnunquam exire.
Cap. 13. Ex Iliis apertis nati.
Cap. 14. Ex ano infantes exclusi.
Cap. 15. De Dionysii nativitate ex femore Jovis.
Cap. 16. De Fœtu prægnante.
Cap. 17. De Obstetricum scientia.
Cap. 18. De Obstetricum Officiis.
Cap. 19. Quomodo insolita partus via declinandæ?
Cap. 20. Dubia nonnulla in Casu hoc raro proposita & soluta.

F I N I S.

